

網舊聞齋調刁集

孝育



通志館



溫州府 臨 如 院



网舊聞齋調刁集卷第十一

桐城方守彝



嘉興乙盦先生藏唐六如畫山水池館小卷子以爲唐所畫者陶隱居之朱陽館也客或僞之先生持不僞樊樊山方伯和其說喜曰吾屬謂爲眞誰復能僞之者哉載其說於卷徵題及守彝

不慮西山少薇蕨何須句漏有丹砂因緣傳說心能造眞幻當前眼欲花鼎竈依稀存舊隱畫圖流轉入名家頗思撫寫嘉禾館好供騷人點暮雅

癸丑二月由皖至申女幼蘭聞之自杭州來爲予影六十七歲小像時涵將有龍泉之役匣予影以行繫句送之古至人



以剛爲難得而又以剛爲至戒涵其索解於其間也

幻見人間亥字年正如雲影過長川  
林花開落春忽甚霄日圓虧  
髮皓然大地玄黃疑欲戰  
一家離散不成妍汝今往佩龍泉劍繞  
指臨風慰熟眠

涵以溫州輪船改期得緩發再成一律

生事催人作遠遊宵來悵別未能留  
遲遲海舶如有意逐逐夢魂

得暫收客話傷心聊強笑我知安命了無憂

伯豐由故京南歸過  
話近事禍機叵測也

山深獨念孤征遠可有鶯聲伴爾謳

和瑛德

并叙

余來吳中至申江視兒孫轉姑蘇視次孫瑛德於東吳大學

泛棹木瀆橫塘登靈巖窻嶺諸山泊光福步至柏因社

在司廟



俯仰清古奇怪四柏之下陟香雪海尋梅入玄墓山

即鄧山尉

萬

峯禪院

即聖恩寺

撫摩春秋時之邾鐘

邾公

展覽善財五十三參

聖迹圖訪晉青州太守郭泰玄墓寺僧為指示漁洋山並言

太湖洞庭飄緲峯之勝回船再經木瀆遊嚴氏羨園故錢氏

之端園也同治丁卯先府君攜守彝來遊於今三十七年

矣過寒山寺頂禮寒山拾得再泊姑蘇遊西園拙政園返申

聞龍華桃花方盛攜子婦孫女等驅車往觀散步溪橋村路

間意欣欣也瑛德呈詩有心隨杖履名山去夢與梅花繞膝

親之句喜其情真語秀依韻和之

鏡裏顛毛幻作銀怪來粲破遠山顰一家人散孫雛遠萬樹梅開

夢蝶親微雨葱蘢見老子遠峯飄緲隱仙真搜羅古意歸來後卻



被天桃笑我陳

窰 嶺 山 有 老 子 宮 飄  
縹 峯 在 太 湖 洞 庭 山

伯嚴至平濟利路見訪失僕所在歸由郵局寄一詩來依韻

酬答

甯有桃花迓漁父聊同仲蔚沒蒿蕪寒猶如許那堪駕聖已迷方  
尚欲呼微雨蘇端勞挂眼哀時杜老託吟須新詩三復增惆悵何  
處雲巢鶴弄雛

三月二十七日小萬柳堂讌集呈座上諸老並簡廉南湖

是日

瞿子玖 樊山沈乙 盧陳  
伯嚴 李梅庵 諸公 在坐

柳堂當汐社遺老此幽尋不忍春風去無言杯酒深一灣新漲淥

四座古山林

南 湖 君 收 藏 至 博 四 壁 丹 青  
如 坐 商 洛 間 接 秦 漢 人 物

芝朮年年長願聞黃綺

音



喜晤李審言次見贈韻

嚶嚶鳴鳥掠風過倚枕桑田感舊多斜月在梁見顏色贈篇開匣  
屢摩挲海濱絳帳能成列洞口紅蕉奈獨歌被劫以來審言與把  
僕同有遺挂之戚  
手拈髭一悲笑深尊苦句兩如何

四月二十二日訪伯嚴有觸而作

天地幾人在蒼雲惱我多懶心疏蠹簡冷眼數漁簑野馬吹成竦  
醯鷄大比鵝出門何所適呼伴訪行窩

往往清晨登隴首羌無故實浪吟詩枯藤倒曳虬須走短笛橫眠  
牛背師老值非王亦非霸頻簷靈草又靈龜公家久有泉如醴合  
作曹溪一滴施

癸丑初夏孝朗大姪自吉林南歸皖由皖來申相見蓋睽離



十七年矣垂老喜慰之深無足喻者然而存亡之感觸境愀然古道蔽虧後生澆黠四方多難家室漂搖支離憂嘆之中既傷逝者尋自念也孝朗卽歸營買山負土大事仍返吉林於其行賦詩二章

一別遂成十七年人間一老一沈泉九原可作開顏笑萬里眞看落眼前噫汝微霜侵種種向予遠道話綿綿今朝排遣繁愁去力轉歡觴泛酒船

彌天風雨黯喧江社社村村警吠龙遊子歸來愴將別詩懷惱亂不成腔大園墮地憂同杞上冢全家笑說龐安得太平安草野扶藜看爾擁旌幢

得鐵華書並示新句書中囑僕讀劍南集以取異己意思甚



盛僕內恐客氣之未能盡作者本原之未易有也從此日諷  
放翁點檢常憂害至誠之句而三復之以報故人

杏子紅初燕子飛綠波舉棹與君違春申潮小風如翦鄧尉梅殘  
雨溼衣聞雁懷人憑短扎剖魚無字悵空磯綵雲緘落瑤華句一

笑神清得解圍

予二月出門時鐵華臥疾甚懸懸也抵申郵  
書問狀久不見答再寄書致詰責乃得報

自養天和陸劍南掃空塵抱見雄譚忠如詩史憂真切醉寫山翁  
老益酣健句人貪橫槩好化身我獨野梅參倘能檢點無憂害拜  
度金針老學庵

叔節自京南歸過滬相見作五字以誌喜

止見人增老不聞時已和愁雲襲江海欲雨未滂沱喜極驚何瘦  
吟高妨過多半齋薄薄酒解得一春痾



五月三日陪馮蒿叟先生至小萬柳堂看宋元以來書畫次

先生寒字韻

香浮白玉破晨寒花氣如荷繞檻看

小萬柳堂園中玉蘭二株已二十年成高樹矣時正初花

幸奉笑言沾落塵曾親丰采整危冠  
榱折悲何易鳥噪猿呼避亦難  
且問米家書畫舫千條絲柳一灣瀾

題南湖詩意冊子十四首用南湖君夕陽穿樹補花紅之句  
爲韻成前七首用南湖吳夫人文雅風流子細論之句爲韻  
成後七首

淞波帆影

奇福非世情妙慧光令德美哉一室中  
炯炯麗連璧高懷淡世榮  
鹿門在咫尺種柳傳家風  
彈琴渡深碧柳外閱過帆  
白雲渡晨夕



南園遺暑

南園六畝地亦復水雲鄉竹籬通麋眼芭蕉生夏涼倚窗寄眞傲  
一榻枕羲皇想見陶翁媪移村挈兒郎擁几山海經扶疏漏微陽

空谷搏年

長公得內助一斗佐盤鮮好客如蘇子想見同心賢孤山尋野梅  
遠客聚殘年酒傾東鄰熟詩擬岐下篇娟娟亦惆悵歲月金梭穿

寒崖立雪

振裘上千仞寒衝細蛇路朗朗白玉山嶽立雄四顧交情看寶刀  
壯懷生警句何以慰別離寫圖託毫素圖外咏雪人風前摩柳樹

三橋夕浪

弓月落臥虹風來一起舞戲弄南高峯倒搖綠玉塵髣髴漢陂游



岑參邀杜甫暮色載兩翅道子筆能取更煩衛夫人河梁寫句補

南湖春泛

湖山有妙境大似詩文家領得此中意相逢一笑譁廉莊結屋處  
恰好不容誇綠波載佳友如坐天上槎汪倫論交道千尺晒桃花

西冷寒食

梨花冷巷犬柳絲挂露蟲念此平生契古俠遭英風子胥怒未已  
靈濤高於嵩可笑射潮手一律唉癡童寒食岳王墓旁添一炷紅

文廬式孝

荒村帶疏木野水依孤墳心傷起深敬貞孝老釵裙百年付寒餓  
九泉迷悲欣顛倒世上兒此事且厭聞寄語古君子勿吝表幽文

秋閣寫經



居士清淨室無垢不用灑天女有宿因能將煩惱捨敬信寫楞嚴  
安心不外假字字生光明書入三昧也擡頭月滿窗禪機助風雅

蘇盦學佛

昔有龐居士居室與人同心徹西來意直與初祖通見說登輿人  
一念師大雄佛已坐君懷不在蘇盦中龐婆真自在止是家常風

華陰夜宿

宵長念遠旅不聞人夜駒飛隼華山頂匹馬潼關秋三峯天矗矗  
四扇塵颼颼解裝入荒店愁強句多適坐覺春申浦嶽氣吞江流

皋蘭秋色

蒼茫皋蘭城下臨大河水嚴霜酣萬木發興古人擬杜陵夔府秋  
八首龍門史幕府千載後地異悲吟似一色斜陽中蒹葭勞之子



十二圖中屬於曹家渡者二屬於西泠者八皆琴瑟聲韻之  
地孫君寒崖南湖君之石友也雪泥鴻爪有離合風雨之思  
焉圖其西征詩意附於後者又二皆出於吳畫師觀岱之筆  
武陵與春申帶水通一柵深柳兩書堂總沿鼻祖制蘭皋博雅人  
圓照絕妙藝山隰望榛苓友道有所繫都賴畫師傳功德真不細  
最後重系

虛舟縱遊跡亦復尋兒孫兩從諸老後登堂倒酒尊古畫舊氈蠟  
題句皆蘭蓀詩圖開貝葉琴瑟聲和溫興來一放筆妍媸那復論  
至海藏樓訪鄭蘇盦先生以詩冊見贈讀罷成二律奉簡  
熱耳聲明三十年昨從皂帽接高賢文章事業國內外書法詩篇  
聖妙妍蚊聚殷雷風雨橫烏號大屋鼠狐便滄桑荆棘迷南北千



古登樓有仲宣

丈夫墮地氣吞牛  
讀破牙籤卻願侯  
百不能爲方坐嘯  
一從此事更增愁  
墨磨日月凋玄鬢  
筆走華嵩拂素秋  
飛動崢嶸入平淡  
眼中銀漢是高流

答仲實寄句見詢

與君久別聞君老  
我更支離心事非  
長棘萋萋煙冪冪  
一聲南雁送清輝

向來倔强被人嗤  
不作循行數墨詩  
一自江邊失桑樹  
老漁雖唱不成辭

讀馮蒿叟先生題湯貞愍詩窟卷子深有感於生亦非生死  
亦非死之言爲近喻以况遠悲亦傷世禍而切幽痛聊作短



歌

開卷復開卷往復百回讀變起商聲哀直欲放歌哭現身大園中  
正如處深屋門庭初整齊和氣釀家福敦說古禮樂賓敬鄉老宿  
家法流美型風雅追正鵠旁觀羨嘆深交際情文篤遇日成歡笑  
椒蕃桂鬱馥歲月曾幾何賢秀見凋剝陵替矩矱思薰染緇塵服  
絲管新聲張詩書高閣束涼風吹舊雨邪進正裹足房闔界華夷  
詬諄容羹粥鬼瞞盜啓心群偷在奴僕荒鷄糞堂前饑鼠號倉曲  
門網塵色深庭蔭望中禿一朝鳩鵲換路人笑以日零落有白頭  
守身行不辱恨多無言語流離弔影獨親見盛與衰老眼淚懸瀑  
生死兩不成淒風吹巾幅出門望八荒玄黃轉一軸悲哉眞不幸  
遭今動回矚人物百年餘忠貞三世續考獻徵斯文今古一昏旭



曉晴午風雨棉著扇已握不測不測間漲進不復縮今人哀古人  
古較今猶穀只恐後人哀比今哀更毒憂端決大河秋風懷漢築

爲高鶴年居士題行住坐臥四圖

居士求佛法名山參欲徧行行重行行御風冷然善

行

過境已了然前境尙未徹望雲支柱杖明月好仍缺

住

古木疏不榮細草淺猶碧斂襟結跏趺惺惺還歷歷

坐

得竟無所得說竟無可說翛然無事人尋夢夢亦滅

臥

節近中秋幽居感觸示諸兒子

白頭孤影對兒郎海沸江翻天色黃何處尙堪容意氣隔墻人誦

鵲鵲章

佳節不須供果餌折得銀元三兩枚一笑老夫手滋潤好持明月



照尊罍

槃君自皖來申相看時江南亂事小定蒼顏對話之餘成短  
律短歌各一章癸丑中秋夜月蝕復明後作

艱難天地在人物雪霜餘慰我驚魂定對君皓首初亟詢兒女態  
徐及蠹魚書燈穗深深落落蟾波黯黯蘇香回今夜桂酒下異鄉蔬  
且喜能無恙天全二散樗

東南殘破不忍談望裏家山淚雨涵更有金陵禍最酷邪正兵戈  
迷秉燭腥風十日秦淮鳴天下皆聞烏咽聲逃命競奔春申浦如  
潮湧浪蝗被土申浦繁華納垢多鳴梟夜來結深窠徼倖羸秦虎  
狼力大盜遺民同食息冷落江湖估客檣淒涼祠墓斷椒漿簫聲  
往往起吳市騷客時時血成字欲學蘭成賦續哀可憐衰劣筆無



才况復哀情十倍古蘭成縱起亦難裁劫火灰深餘燧在連城野  
哭涼秋來今年此日海畔語明年此日事難推與爾出尋一痛飲  
商量且掃家門苔

秋風一首用前詩瀾字韻呈蒿叟

滿耳秋風天下寒攬衣中夜出門看祇聞嗚咽秦淮水不見威儀  
漢代冠異日希文憂國老於今師誌建臺難徘徊悵恨歸房臥隱  
隱潮聲淚湧瀾

時有以金陵放  
事欲公任之者  
眼

噩夢

默默回頭默默傷西山晚日色蒼涼哀音高逐雁行去噩夢頻驚  
虎跡長刻薄纏藤欺樹老翻披殘歷算年光會將四大開除盡指  
點清虛是我鄉



舍車老人歌

而易徒賁初九之繇曰賁其趾至賁若有感於斯言

遂名其讀書之軒曰賁初  
或偶然自號舍車老人

舍車老人六十七又隨江水東流出春申江上有兒孫屈指已違  
三百日前年老人喪其妃老淚時時溼鬢絲還家舉帷塵滿屋倚  
壁枯鳩杖一枝杖既不動鳩不語廚無蹤跡蒿生圃在家兩兒又  
兩婦躊躇却顧看門戶紛拏委瑣四十年老人那得惜頰肩懷我  
二人不復見衣食遺與上留田秋陌徵租識農村清泉流澤潤儒  
門久以不才違世用衰遲幸未乞齊播邇來年荒世紛亂老夫影  
隻精氣散出門惘惘入門愁隱几無言有悲歎仰驚日星河嶽換  
不似詩書所稱讚風吹草低隨東西浪捲舟翻失畔岸狐兔威嚴  
蛙黽豪龍魚淆混猿鶴竄喙喙氣蒸霧雨黃營營心爆陽燄炭大



匠咨嗟柱礎摧老漁涕泣網網斷昏燈四壁咽寒蠶何日九苞鳴  
鳳旦老人延佇意眞愚偃促憂勞良失算遠處兒孫能客翁一笑  
且縱酒杯空手撫白頭偷閒過頗如白鳥出簷籠忽忽春去夏已  
退兵戈橫放哀秋風念我平生白髮伴一棺淒楚蕭寺中後死之  
責將奈何祇恐無顏地下逢鞠育劬勞支持苦蕭條離亂百年終  
兒肥母已成枯骨支離一叟首飛蓬繞堦小草萋萋長春無分別  
都噓融春歸春歸不可住小草應念春恩恩老夫亦有老盡日哀  
吟留動他年容欲通此情達幽渺泉臺不到冥飛鴻

庭草篇

老夫不肯天機洩收拾深言出淺說閒與庭草話寂寥對爾商量  
養生訣細思爾德爾性情歷有淵源略可挈春色王孫賦遠遊秋



根蟋蟀吟華月河畔詩人引興長窗前有道滋情悅香者大夫結  
佩帶靈者羲皇登挂探甘者和以佐參苓仙者採之綿耄耄能報  
春暉念恩勤能慰北堂忘衰茶骨勁知能當疾風指佞了如懷冰  
雪國中農野不可無海外毬場誇妙絕所以郊藪麒麟遊舉步之  
間親愛切吁嗟小草宜鄭重聖世已遙運多劣頻年野火滿山原  
強暴時時弄鋤鐵願爾小草根相結人欲拔之手脫節零落一莖  
秀白媚兒童笑侮輕易折物理如此可推尋即小見大歸賢哲雷  
雨風霜來無情老樹路旁曾飽閱

九月二日自申至上虞縣齋雜述一首示婿仲仁女幼蘭

暮發春中浦詰旦到甬江夜行無所見但聽海波撞頻起倚船檻  
隱隱遙山峴甬江古大郡要害占雄邦趨登海曙樓高日送遠腔



更升鐵塔頂四望千里降連嶺截天盡洪濤衍地窮密鱗湧繁會  
崇雉攢豪雄呼茶問名利雲壑指天童惆悵阻遙路近地訪觀宗  
觀堂最爲甬城古寺近者諦閑法  
師住錫於此易其額曰觀宗講寺大師諦閑老錫振天台風參禮

心自急喜驚意外逢握手話今昔宏願難爲空問饑歎我飯聽講

使我恭

師升座講妙法蓮華  
經一科予聽罷乃去

惜哉不可留別去心忡忡來朝車輪

啓火速無從容餘姚俄頃到午日正天中行李穿城去臨河入低  
蓬秀峯滿兩岸一一迎衰翁平疇與山際晚稻見年豐水色菱花  
碧照我纒顏紅放船青綠間古人吟句工鐫肝自摹寫縱好還嫌  
同日落郊野靜童唱過橋東人家深樹裏呼笑意融融地安復歲  
稔羨此太平農吾鄉胡獨苦頻年罹兵鋒江淮諸郡邑所遭况尤  
凶賢哉越都督低回感予衷短櫓鳴靜夜纖月挂晴穹三更水驛



盡輿入古城墉邑宰東牀玉女也情所鍾迎我走遠足相見笑顏  
濃外孫忍不睡牽扶亟呼公舉帷炳高燭茶香果餌充促坐細盼  
睽問答悲歡叢鷄聲警欲曙鋪牀休倦慵夢中嗟老矣下馬不成  
虹何以慰親愛展轉簷瞳瞳

九月十四在上虞縣署西廳夜讀杜詩罷開門月色滿階獨  
步成句

倦讀推書起開門月笑迎清光爲君好濁世與誰盟香歇桂子長  
風平荷露生寂寥相對久耿耿此孤明

遊鳳鳴山洞

志載鳳鳴山在縣東南十里昔有仙女跨鸞作鳳鳴至山後  
土人立祠祀之祠左有洞曰鳳鳴洞清李方湛遊記有云兩



山環抱奇峯插天石壁對立巨石壓其上水從空下如傾萬斛珠璣激射於亂石間文甚詳不具錄宋元明人皆有歌詩

詠之

黃梨洲先生子百家皆常遊覽各有詩文

山深導窈窕水靜生慧明籃輿松一壑石磴雲重扃拔澗修篁起潺潺漱泉聲戛玉垂鳳實草石碧流晶輿夫告已至古廟就微平珠冠坐神女朝眞肅吾誠夢幻想久滅笑看男樓名

土俗逢長至日男女羣至

廟祈夢分樓而宿

有額曰男樓女樓尋洞徑左轉披棘排長荆巨靈斧巖壁一裂十

丈羸飛石駕天闕嵌空牢神撐方軌容駟馬可以來英甥枝危鳥不借條垂猱可升羲娥窺竅入霧雨龍氣乘鐘鼓嚴宮奏時復雷憑憑捲來巫峽水洗此洞天激忽飛一匹練雪花寒紛騰噴潭漕石罅出洞科爭盈餘波猶作態委蛇滙深巖洞中石可步古砦造



化成久立神明王愛此奇且清幽祕宅靈異風起翩雲旌歸途屢  
回顧層巒媚我青願言入深嶂長嘯引天笙

金罍山漢魏伯陽舊隱處也實長者山下一高邱有伯陽丹  
井後人淘井得金罍因以爲名自築城上長者山遂入北城  
內然山光雲景頗據佳勝在古林野良稱高棲祠先生以啓  
遐想宜哉而增設天帝人鬼荒唐之像偶顏曰玄妙觀則蔽  
矣

參同久塵閣丹井自人間空說金罍見不聞白犬還蝸墻行篆籀  
蛛網結纓鬢門外疏林好雲霞獻黛鬢

玉岡山晚眺

小山在  
縣齋後

暝色生秋思散步登玉岡縱橫百弓地榛莽充四墻下有忠臣墳



上有百年樟碑題冷深隸柯蘚斑華霜羣岫抱郭起風旆聯飛颺  
嵐光襲煙靄波浪行低昂餘暉橫正練妙墨開青蒼五癸如端人  
嚴正領一方大雷鸞鶴翥表表露文章頗聞蘿巖俊清隱抗雲堂  
玉篆寫神女遠望神飛揚餘者多態度新來名莫詳竊願羅致之  
築閣迴修廊曉窗暮扶檻清歌引興長惜哉艱虞際一付天地荒  
我本過客耳偶然寄徜徉豁達掃沾戀無令此心妨正當隨所遇

歸坐吟滄浪

元末上虞尹死亂墓署後山五癸山在縣東北大有清  
在縣南為百雲山最高之峯蘿巖在縣東北內有清

隱庵有玉女峯頭雷古篆篆二篆字清王振綱  
詩云玉女峯頭雷古篆篆二篆字清王振綱

### 遊蘿巖

足弱慍天慳僅僅及半嶺危躋得夷遇逸興歛前猛引首睇層巔  
叢篠綠一頃其下有懸壑奧折孕幽冷背重負兩山蒼翮怒鷹睛



秋風颯颯來便欲翀天頂魂悚默無言更上奴屢請笑守佛道中  
山靈首我肯朽株或害之眚眚不可縋剛峻會意間雄放付心景  
回眸流青暉雲霞排岫烟野豁一河明萬象涵秋影瑩确來磴循  
椒蹙就平整竹深楓柏酣快意一舒騁信入雨山廟清茗對圭珽

廟祀桑王有功德膺封敕

童牧辭暮邱牛羊歸鞭打

德冷切

登輿返古城斜陽晚

色靜主人迎笑問佳處當全領瀛海水可清

極嶺可望海

棋枰賭孰幸

龍眼汨汨泉年深可未嘗神女邈深居肅肅霞裝靚苔花護篆文  
斯冰誰脫穎願得一一聞洗耳傾雋永惆悵墮迷茫呼酒醉不省

### 過赤石真人廟

指點斜陽上翠微巖阿恍惚女衣緋綠楊秧馬行靈雨黃葉村簫

款廟扉

民間禱求每得靈澤因立廟



九月二十五六二日仲仁陪遊東山歸而記其景物與山川  
形勢之大者

東山之上舊招提故老相傳謝傅宅門前雙柏閱世多蒼幹化爲  
太古璧枝垂石乳柯生瘦元氣內充外滴瀝旁趨橫出黛色幽幽  
蔭瓦苔厚一尺稍西高冢公所藏長松八九動精魄老龍轟轟鱗  
挾霜雲蓋浮空煙細碧神赴玄霄作勢騰爪掠厚地撐崖壁欲招  
黃鶴來巢居時引清風響寥寂松起公後柏與偕柏識公顏松躡  
迹肅立向柏問風流柏以不言言導客後山東西有兩峯放眼自  
能知歷歷果然磅礴更宏深百里之間最雄特巍巍天際山之祖  
展嶂排雲垂鵬翼銀河一路一掀波逶迤從容步大國大山爲宮  
宮小山螺黛雙鬢兩亭植負陰抱陽堂奧成日麗風融春護惜三



月鶯花憶芳時月露雲霞各得職天衣廣袖掩蔽長不教微塵犯  
座席開門一笑江水明襟帶威儀有異色何年落星鎮中流淳蓄  
波瀾秉淵塞江外羣山疊疊青排闥屏羅森畫戟村明帆遠物舒  
舒鳥靜雲閒秋閒閒回頭卻顧復徘徊如此名山中名德非公豈  
合探天藏造化詎爲等閒役漁弋日從支許遊人間引領待霖澤  
豈獨當世思榛苓曠代猶疑攀杖屐丈夫甯不當如斯媿我徒爲  
山水癖夜燈荒殿甥榻聯佛古無香僧頭白萬竿清隱寒玉肥風  
起微聞戛磔格抵足閒話不成眠垂老勝遊緣汝得商量待曉鼓  
興餘更上巔巖看海色

仲仁復陪遊龍田寺寺在東山北柏子禪師道場也

依巖臨壑侵曉行彷彿古墻蝸畫篆高處遠望夏蓋山萬頃湖中



甌作巘湖已成田秋穀黃微茫海水略可辨低處繆松出澗幽氣  
壓繁柯張羽繖中有龍骨千年枯禿露指天醜五管柏紅樟碧五  
里餘叢篁蕭寺當山轉門外廣長佛舌平當關一石驚猛贇始知  
柏子古道場踴躍深心緣不淺衲子神清茶味香山水清暉娛睽  
眄起尋寶塔禮禪師頗欲借寮止吾趺高崖虛碧夜月臨參取禪  
機應未遠

柏子書龍田山三字額於寺門題云風喘虛碧雲宮 虞甥

不會卻掉頭促我歸城防日短甥有公事分途去我亦登輿行強  
勉人生到老埋俗塵何日一庵息吾喘因緣未熟不成畱一路看

### 山聊自遣

#### 謁倪文貞公祠堂

莊簡排姦切文貞抗節嚴地靈生間世石氣表雙尖

上虞南鄉有雙石笋矗立



最高奇特十丈  
過客求文獻高山寄仰瞻倪公祠廟近香火得親拈

### 東山過薔薇洞

荒涼紅露杳歌音草色迎人古洞深自笑遊踪何所似白雲一片

### 過山林

#### 東山謁謝文靖公祠堂瞻仰遺像

躡磴攀巖到上方幽林深處指祠堂榜書字照行人眼塵座鑪餘

孝祀香肥水遙遙邈愁緒娥江寂寂映遺芳頗聞隔縣雲初盛蘋

藻趨踰澤未央公子姓皆家人歲以姚凡三支十八房春秋趨祠墓地

江在吾皖近年禍亂深矣曹娥

#### 布穀山憑城觀秋穫

布穀山頭雉色荒猖狂藤棘滿城墻卻宜野客登臨興一片秋光



打稻忙

偶得烏絲方闌廢紙數十番間中作字戲題一絕

遊罷東山興已闌強排詩句費吟安不如放筆成鴉陣當作秋田  
暮色看

上虞倚裝自題六十七歲影與幼蘭留別

小住人間積歲年風頭雲影浪頭船要知日暮停橈處萬壑千巖  
有勝緣

遺山自愛龐家好常著眼前卻是難憑此鬢絲雪色老朝朝暮暮  
勸加餐

外孫小女阿印索詩戲作此歌以發其爺娘一笑

芝蘭玉樹兒女子謝庭柳絮因風起我有外孫茁蘭芽久別入懷



笑口弛前年孤鶴鼓翼西今年孤舟此岸艤孤舟孤鶴兩悠悠且  
喜孤舟駕遠遊上虞本是山水縣爺娘招我意綢繆廣廳置座青  
榭馥呼姬出拜聲低柔爾輩漸長頗解事校裏歸來趨翁位呼公  
亟亟牽公衣要出衙齋看山翠姊好尤覺小妹奇秀色玲瓏性情  
摯捷似彌猴膝上加手攬長鬚略不畏攜之遊覽古精藍但見金  
容便拜地止有恭敬無要求却是此兒當神意西郊東郭遠不嫌  
老樹茂林通趣味回家小犬搖尾迎撫弄嬉嬉呼狗弟凡人養子  
欲易成狗保狗兒作名字老翁一笑向阿孃可爲家姬兆祥瑞明  
年此日笑轟堂果然狗弟是虞郎不睡灰窠睡錦褥金絨綵綫繡  
文章阿公再來作賀客看爾歡喜如顛狂

曹娥江上與仲仁別一首卻寄上虞



忍淚卽長路不知腸幾回垂老別親愛蒼茫秋水隈賢甥送我行  
曹娥江上來江長水色黃感動生古哀所賦甯獨厚弱質猶羸斂  
奮身赴洶湧蛟鱷失喧豗千載波濤聲含悽詎有涯霜來沙水寒  
風冷雨淒淒訪碑到祠廟摩挲手屢揩邕迹已煙滅名聲尙如雷  
表微古人心鑿白匪諧詼隱語發慧解奇辭俯奸猜從茲文學子  
芬芳漱瓊瑰藻行動慕悅牢牢入心脾豐珉申刻畫廟貌掃塵霾  
照波無窮已豈不有以哉到眼驚霜檜支離存形骸物意正如人  
能不心成灰起亭榜字大甃石墓塚嵬靜覘徹人理生意有潛荄  
不然隨運去流波常此隕黑風吹海立那可搖斗魁吁嗟乎與爾  
徘徊弔陳迹常覺山川生光輝今日攜手分手處指點或勞後人  
腮細思勝緣良不偶詩懷正爾風雲催古今多少不朽事未必天



意斬吾儕甥歸語蘭好相慰應聞髯語笑顏開

六十七歲生日至山陰遊禹廟廟東深林邃路一亭翼然狎

霄中有崇碑字方徑三尺曰大禹陵殆即史遷太白所謂會

稽禹穴者也

漠漠橫流大更誰疏鑿能魚供饗餐鱷臬化怒飛鵬眇想聖神出

頓教波浪激可憐生末劫不得透層深恨讀遠遊賦起擔長柄登

孤舟會稽郡古廟夏王陵巒氣開金闕河流下玉繩蒼龍護除步

檣星門內庭除深烏兔引階升殿陸數十級儼轟轟寒碑篆沈沈

荒殿錯空留遺石在文剝少書徵廟後山角有亭內立窆石高

曲箋字穿在上多漢以奇甚响嶮字怪多蝙蝠騰斜陽通嶽氣腥雨

鬱春蒸千响飛集殿梁遍地名今廟廊亦列响嶮碑尤攝鼻老嫗蹣跚



出高邱指點登

大禹陵碑後一邱如小山竹密樹深畧無陵冢踪跡傍徨尋求老嫗自稱姒姓臃腫可怪云年遠

不能實指其處相傳在碑後山以形勢觀殆是耳

林颺翔羽葉野色肅鱗脰孤意青蓮後

飄如黃蘖僧千秋悲俯仰百感入鬚鬢不見塗山會猶存禹甸稱  
可能容膝地嘯傲寄枯藤

冒雨遊山陰蘭亭癸丑十月八日

山雨喧溪溜林雲壓竹簾

沿路大溪多竹簾

遊襟爭激蕩衰髮破煙霾蒼

翠一亭湧風流千歲乖零殘舊甲子不與永和偕

杭州晤王漱巖贈句

昨訪漱巖述僕新自會稽東湖禹穴禹廟蘭亭柯巖諸勝遊

歷來杭漱巖欣然曰東湖蘭亭禹穴皆我近來登臨地且有

記並影攝其形出以相示僕喜先後步武之不遠文字紀載



印證之有資也援筆賦之

白髮扁舟萬木丹浙東山色許貪看每逢名勝眞神王來接方聞  
洽古懽燦燦圖書羅放失琤琤文字起波瀾遊蹤屢響追餘韻極  
有流暉照倚欄

十月十二日王漱巖招遊西湖明日以詩紀事且謝殷勤

西泠山水領東南漱巖詩文與之副昨日招我出城遊白傅長隄  
結襟袖孤山梅遲鶴不歸處士墓邊看苔繡典史官卑節義高一  
家忠骨塋清冑

典史林少崖全家

亂塋和靖墓下

何人作詩刻青珉爲我朗吟

誇健句故宮榛莽闢新園正有傲菊排霜妍危階曲磴爭後先導  
客直上蓬萊顛裏湖外湖涵脚底龕山赭山落眼前

二山在錢塘江外爲海潮

門衰翁喘息汗如瀑似有感慨淚潛然棲霞山下岳王樹青蓋高



冢蔭廟垣禮像讀碑意未足入城更索拜初君阡道自古腸自熱

聯蹤日墓窮搜研謂是宋朝大理獄螺螯慘淡護幽穿錢塘門內安萬橋有

岳王祠廟冢碣題王父子初阡王當日瘦死獄中有意尋忠骨且向螺其尸護以螺螯壳因為標識並題詩云後人有

螯殼裏碑版四壁無燈火手摩口語追邕賢蔡邕雖賢人已古於

今蠶白君操杵踏步徑上湖春樓酒旗風裏喚清醕白魚黃鷄巢

家菜大嚼劇談眉飛雨湖上游人不到此正好恣睢發狂語金錢

斥盡疥湖山豈識湖山有真主白公蘇公遺愛長祠宇敗爛比貧

戶杜陵秋風捲屋茅魯公漏痕滿墻土便須歸去染淋漓凜凜霜

鋒鳴殼羽殘齒氣衰為君回斗大如箕為君舉酣醉不知今何時

狼籍墨花亂翻舞

漱巖復陪遊表忠觀摩挲東坡碑文字畫簡漱巖



千年越國念錢王鷲嶺峯高照廟墻想見神人晦星月尚餘文字

閱冰霜潮來風起瑤弓靜陌暖花開玉艷涼消盡英靈存斷石與

君惆悵不成狂漱巖指殿上金安清一聯云此傳誦名作也聯云

開斐江上豔陌上花

浪遊來杭喜晤秦樨樵張春泉先後招飲長句致謝

清霜十月渡錢塘來訪吳山秦與張小別一年魚素遠盛名兩浙

雁聲長夏秋間東南之亂浙獨保農歌漁唱貔貅靜旆展馬鳴菱

芡香如此湖山好賓主能無對酒解高揚

連日時涵侍遊西湖追憶同治丁卯之秋守彝侍先府君遊

屐寓湖上舉日有異感焉成句示涵

劫後湖山雜喜瞋悲端來似水生鱗衣冠耆舊消沈日草樹榮枯



代謝人細雨高峯迷屐齒夕陽古寺老霜筠侍遊往迹飛雲杳攜爾重經一愴神

留別西湖卽持以留別漱巖

風吹客鬢任橫斜爲好清遊健自誇深入陀林古佛國甘滋法雨  
本山茶樓臺畫裏東西岸翠黛圍屏風月榭連日湖行明日別回  
頭留句送詩家

火車上回憶湖山

若爲處處挽人留綺縠清波丹翠邱虹影一雙銜月卧

二橋

鳧羣

三兩載雲遊

小白艇上以

紅墻半嶺照林纈黃葉前灣鳴澗璆風景

追摩髭撚斷回頭已失古杭州

到申讀乙盦先生見懷詩次韻



蓄薇洞口眺亭前夢落吳淞江月邊白髮書城隱絲竹紅塵春廡  
當林泉橫流何處可洗屐大厦看人爭度筵霜下草懷松柏蔭龍  
吟猶覺撼風烟

贈玉梅花盃主前以湯貞愍山水卷子乞題茲並催筆

壁立層巖松竹裏梅花雪冷白照人碑版頗聞傳遠裔乾坤欲壞  
正茲辰荒村孤野挂半月殘柝五更哭四鄰蜂蟻烏雛寒噤甚能  
無呵凍生微春

馮蒿叟先生用僕上虞留別詩韻送歸皖城依韻答謝

少經劫海登平陸又植霜凋萬木初去日俄侵原上草不材劣比  
社間樗在天星斗同時晦漏地江湖何處漁且喜靈光歸魯國法  
言時得解紳書



頻邀名句兼寬禮無奈寒江欲別時歸鑿楹書壁挂口仍憂幕燕  
火燃眉棋聲挾雨判柯爛竹色干霄有鳳姿仰首蒼天祝黃耆南  
山佳色照疏籬

次韻題馬冀平塘沽秋泛圖

證得南華第一遊逍遙寫意付題留塘沽謳起白蘋水河漢聲流  
烏鵲秋文字有靈驚腐蠹烟波無際羨閒鷗玉堂風雅南來望橫  
笛江山我背牛

題陳慎登不繫舟

誰從壑裏負舟去得者笑人失者悲藏之深深甯未固一旦乃不  
勞風吹蕩蕩青天雲無主洋洋綠波鳧自嬉后羿弓良無所用任  
公大釣將安施所以莊生善用瓠江湖浩淼任所之陶潛亦縱虛



舟棹優遊妙適笑傲姿此是自在寶筏佛所秘卻被吾友聖得知

次韻酬冀平

寒天潮落盡白鳥抱饑存山色自蒼勁吟懷入渾侖一筇歸皖口

雙笑值江村各把驪珠獻疑從星宿捫

清詩自適縱轉棹入涪深

君有讀黃詩之作

草落見山骨雲高亢鶴心隄

橋回望越

十月行段橋白隄

楓荻夢思潯欲學香山老自彈淥水琴

公夜

又琴詩云自弄還自罷亦不要人聽  
琴茶詩云琴裏知聞惟淥水

癸丑除夜次韻奉酬乙盦先生題寄合影之作合影四人月

霞上人乙盦先生歐陽居士賁叟

前身合伴商人皓支許重聯破笑看雪上偶然聚鴻爪雲間隱者是龍蟠欠伸驚醒打頭屋迢遞飛來脫手丸高唱不眠和殘漏心



隨白鶴守天寒

花來共歲有寒千里句梅

甲寅正月五日

飲

我輩猶健年爭老君

不

補註此文章虎豹然

如

陽合然學鳴

逐名逐道之黃馬采采

月臨關夫人錦字

君傑意耳道

溫州

神人曼殊為江湖

天竺



然

公

謝

不

如

温

... 江行各把... 游詩自... 橋回... 笑世除... 靈上人... 前身合... 國... ...



网舊聞齋調刁集卷第十二

桐城方守彝

甲寅正月五日贈句鐵華

我雖猶健年爭老君頗未衰病苦多芝朮有功期矍鑠光陰無計  
補蹉跎文章虎豹愁冥雨歲律烏蟾感逝波日暮蕭齋三嘆慨饑  
腸含怨學鳴鼃

迢迢遠道立黃馬采采幽蘭翠黛山借問馨香花滿袖何如三五  
月臨關美人錦字傳魚素客子荆扉響獸環靜邃房權瀛閬閣聯  
君襟帶與追攀

文辭高妙究不如此心光大圓明誦聖佛  
之言反其初心自有廣大高明之樂

禪人曼殊寫江湖滿地一漁翁圖與程總持畱別總持囑題  
天光搖積水八表入荒寒山影淡將滅樹色老欲乾孤竿向何許



危坐波上灘寥寂萬籟響刁騷一片瀾涼風生蘆叢冷月下露團  
廣大空明間時時起悲觀連鰲詎貪餌尺鯉知避竿羌予相漁父  
豈爲盤中餐江湖渺愁日日月送奔丸燦爛夢大園醒來秋水寬  
潮痕認今昔雲影瞥飛翻茅亭烏散盡磯石龍來蟠相逢素心人  
寫意託冰紈冰紈光可鑑照君損君歡回頭人已杳矯首天南端

題冀平詩卷

仲春時雨回生意鎮日幽房一炷香老佛慈悲如我大清詩吟諷  
對君忘才思便覺兼江海霸業漫云掃帝王且願深遊探五嶽胸  
間雲氣費人量

昨訪季野因與看館園桃花歸來投此章句

斯人如梅花冷性洽冰霰有時一冷嘯疏韻鶴鳴澗偶對忽忘機



稍乖輒思見我居鄰大江風波昏旦變日促鬢彫玄失盡故時倩  
人乃不我親我亦於人倦雨漏杜陵茅窠落呢喃燕疏放寂寞中  
獨寄斯人眷日昨扣蕭館閭如古佛殿推關驚午覺枕痕欵在面

一笑却春寒溫風滿江甸雜談略無序散步縱所便遂穿叢竹徑  
天桃媚白獻雨霽上微陽盈盈炫餘淀茅亭蒲塘曲輕豔明一片  
嗟我久枯槁動情流妙盼如此慘澹城疑是生意斷韶華故無恙  
似可舒幽怨究竟此時花何如周南讚作詩問騷人莫答無言粲

奉酬蒿叟先生見懷枉用拙韻之作

睽攜眞無奈栖遲勢不能愁心操別鶴大翼感垂鵬往風肅江甸  
魚鳥悅清徵於今忍回首密密羅與罽把杯撫長劍披卷出行簷  
寒光凜欲動推案上高陵奮手欲抉之陰蛇結強繩嗟哉此橫目



沈矣待誰升龍蟠海岸泥怒目懸兩燈流光千里外沙蟲朗可徵  
潛鱗送高唱幽室坐神騰江春寒漲起雨餘花氣蒸遠懷鬱不展  
頽闥聊爾登白雲凝層障青山複連塍丰采邈難睇零落悵歸僧  
春風噓故柳還作綠鬢鬢獨恨鬢絲雪沒世當何稱欲報眷睽厚  
繫日欠纏藤

惜別一首送馬通伯北行

風喧江海浪兼天草樹模糊春化煙雲意含愁閒出嶺水心不競  
湛如淵誦詩皓首崇明德敬子立身希大賢前路塵高垂老別緘  
情無限託茲篇

三月四日夜大雷雨至明日亭午小霽出訪臧雪樓潘季野  
雪樓方自桃源里居來皖先投示一再和季野粲字韻並簡



守彝之作依前韻奉酬兼報季野

風雷夜入江浪花激飛霰一雨倒天瓢瓦溝響奔澗感動鳴雞思  
起坐懷未見展誦稠疊章淵源楚騷變媿我攬春華一笑不成倩  
走訪趁微晴意專破午倦不借衝泥馬輕作斜風燕子春曳屣迎

雪樓新  
傷足

亟荷青青眷先烈報聖清春秋隆廟殿一領戰血衣千夫

橫涕面回首望龍眠碧色腥春句忠靈今何依欲言忍未便紀載  
有雄文耆老存徵獻隔世欣遇君翰洒墨花淀叙舊辭聯翩亢情  
雲孤片土貴金石心肯逐世顧盼古有斷水刀水固未能斷洋洋  
清泉流窮通了無怨抱此作眞常四方佛同讚寄語向河陽契證  
成三粲

雪樓季野又示三四疊粲字韻詩各有無端之感勉力再酬



兩慰解之

詩來威如雪伊誰先作霰汪洋流江河笑傲吞溪澗平時漫自誇  
於今喪我見二君松與筠歲寒真不變娥媚汲長孺甚憇乃甚倩

臧先客感多興寄雲心倦古意玳瑁梁沉吟雙棲燕潘子守立文

曾被六丁眷野三年前被災雷公又取餘驚奔遑敢殿四月二十二夜

客館天心至難測甯獨人如面不信看橫行雄據賦侯甸安樂常若

鄉威福頗自便二君所嗜者疑亦非貴獻承昌黎秋懷詩賤浩歌

昌黎詩注頤欲成淀棄置且勿論此獄折難片良友青眼歌佳人

空谷盼異地契同心黃金可以斷情至託風騷芳蘭能解怨莫外

求知音牙期互相讚仰天滿立雲中有星斗粲

虞山白龍松一片鱗甲歌依冀平原韻 并序



往歲遊常熟虞山入三峯寺寺有三百年白皮古松一株天  
矯疑眞龍也徘徊其下拾松鱗一片攜之歸皖挂於書室壁  
間兵事疊起先後避地海上久之乃還此片鱗在壁者歷劫  
不壞視之情益親冀平屢過寒齋因乞題詩讚歎逮詩來則  
誤爲廬山之松僕笑之乃再作詩自護前非強辭奪理難語  
圓融念此片鱗者來自佛土聞妙法音失其本地風光亦呵  
棒所加者也敢持此義諦還質之

君詩玲瓏十二峯雷雨縱橫煙濛濛炫目毫釐倏千里雲松上遊  
兜率宮拾來虞山龍一甲分明不與凡物同歸來挂壁當挂劍天  
陰月黑洪濤風兵火迴避大盜走高梧修竹歲青葱乃知靈異護  
衰老能傲大夫封岱宗忽逢作手逞狡獪自矜下筆氣如虹移山



拔木縱嘲笑挾持五老坐當胸正覺豈隨外緣轉要從實相悟妙  
空馬駒必冠江西字法界亦表靈所鍾侵奪尤關佛戒律寶樹況  
是十八公直下承當倘不肯獅子一聲三日聾

次韻酬丁弢庵見贈二首

惱徹春晴又春雨苔滋草合伴閒居歸從山水僧寮裏坐憶交親  
兵燹餘一笑酒尊疑午夢三年人事趁朝虛風波習慣心如砥自  
在鳴榔兩舊漁

九畹芳蘭襲襟素轉丸脫手妙成彈柳塘花塢家居好劍氣星文  
客思寒澤國龍吟極神主人間虎步稱心安相邀舉盞青天語灑  
落冰花誰得殘

甲寅三月十五日由大乙山莊至白麟坂亡友鄧君繩侯故



居遂登墓門禮新塚徘徊久之其孤叔存檢家書數十通裝  
爲巨冊出以相示遂乞題

言往悽入輿既來慘就館斜日滿四山竹樹紛到眼獨不見斯人  
相迎握手戰冥坐追平生悲歡苦激引歡亡付空花悲興叢怒筍  
長往了千艱後死苦百忍出門睇高邱新塚山木隱蹒跚曳屐登  
一壑松風緊遲我白髮翁躑躅墓門展賢智閉黃泉庸劣猶餘喘  
佇立看蒼天孤雲生遠巘悵悵恨循徑歸疏雨淒以泣

泣泣老屋瓦仰此麟鳳厦

君曾祖完白山人之故居至君祖守之  
先生拓而大之山人曾刻印文曰家在

麟山鳳水之間

山人寄鶴書高名亢風雅再傳及君子清迥一世寡翰采

嗣前徽峻行詔來者諸孤貞秀資茯苓青松下發篋出家書戒儼  
文淵馬妙墨又殊珍雁行官奴寫麻衣仁孝心兢持刻弗捨裝池



此貝葉供奉同般若即此慰幽冥信不墜良冶結交申婚媾兄弟  
邀傾瀉幾日邈山河繞阡兒樹櫃支頤吟復吟耿耿夜鐙施

弢庵再枉贈篇既盛陳其山居野趣泉聲之美亦讚嘆僕城  
宅高梧疏竹之奇仍依來韻酬答

名篇寫出山齋意想見伊人廣大居明月清風無盡藏倚松眠石  
自寬餘杯浮濁酒澆皇古胸有靈光接太虛未免傷春惜桃李落  
花幾度問溪漁

琅玕不實鳴鳳杳梧桐無絃清風彈綠陰深院蒼苔厚紅雨殘春  
碧玉寒天上雲來將鬢改年前雪大得心安自煨芋熟饑時啖若  
有人來分老殘

田母謝太夫人詩

并叙



謝太夫人山陽田贈公

先生之配進士安徽前太和縣

知縣署六安州知州魯儒大令毓璠之母艱苦強毅登壽八十有四終於 年 月 日大令追感劬勞仰述生平奉

狀馳書匄守彝爲詩章譏陋傍徨懼不足以發揚懿美作範人倫而大令督促不已爰據狀曰先府君幼卽孤露寄育於外多遭無禮每發憤狂走自先妣來歸始佐立門戶先外祖家素饒炊泔澣濯縫衽之事不曾習至是百爲一身先府君客江右粵匪阻絕音問數載家無擔石多子女勤十指以給日用諸兄就傅恒忍饑積錢買餅以飼之或食糜則先飽諸兒已食其餘有持稱貸之說進者怫然曰吾不受人德色也然先府君好施濟必贊成無吝吝容至典衣質簪珥以應戚友



之不能舉火者其後就養毓璠官齋年已七十餘積勞悴時  
奉參燕佐甘旨輒歎爲暴殄不多進即衣敝且不欲更新而  
歲時伏臘輒出所蓄以恤囚又嘗諭毓璠聽訟宜矜農人曰  
天下惟農最苦也故父老感德往往獻酒食爲壽去之日攀  
送百數十里而教家整肅尤有所以使門庭蔚然大啓者按  
狀又曰先妣臨下嚴毅絕不寬假毓璠兄弟雖已授室每於  
廣座呵斥過失莫敢仰視內外男婦問晨告寢儼飭朝典黃  
口丁穉皆知率循舉室凜凜私相戒警無敢違犯嘻太夫人  
之賢勞豈不大過人哉載於狀者詳謹最其尤難者詠歌之  
以慰大令之孝思云

國弱思良轉昌家卜賢姜功德各有立劬勞恩尤長粵稽田太公



孤兒昔中路自太君來歸立家得扶助慷慨井白親一屏羅綺御  
大盜橫戈行夫子出門去甕底無宿糧魚腸斷尺素兒啼女旁啼  
宵鐙十指度富鄰廩崔魏菜色人傲倨饑烏屋角啼月落聲催曙  
孤鴻嗷寒雲並擾夢中慮黔婁千載心不忘溝壑故澄泉無渾流  
蕃物在清露忍饑啜殘餘辛苦羣雛哺仁物刻其躬守高甘荼茹  
明禮到孩提薰習成天賦嘉禾報良耕威霜挺高樹親接神明宰  
深惟賢母慕祿養對曾參艱貞不改步眼看河陽花口道田間苦  
農歌囚徒頌豚酒獻眞趣聞說板輿移婦孺爭遮馭香風滿青旂  
靜野明白鷺循迹稱慈懷滿耳烹鮮譽太公慰九原太君全其天  
嗟哉託孤心止在勵貞堅塵霾正江海仁孝母涕漣請看古瀧岡  
文字照高阡



追和程總持花朝前四日集燕齋館值雷雨之作

春回冰雪彫殘後數點梅花共索歡飛簡召來星主酒驚雷擊破  
雨漂山雞聲感客傷時晦蠟炬催題得句艱起舞君前思漢將瀟  
瀟江海損朱顏

寄涵

京國緇塵似駭波詩思清澈可還多汝陰亦有西湖好縮地壺仙

事若何

時有安頴  
鐵路之議

憶簡

半年蕭寺繞僧龕得意髯蘇詩味醇倘傍西湖作太守老泉一笑

落巾箋

來書云近好  
讀坡公詩

送翮



看遍鄉園繞郭山峯峯霧雨夏猶寒北飛鳴雁成行去一曲朱絃  
老倚欄

總持投沈陰傷春二律並偶成一絕和絕句韻

寒雨連江困曉眠醯香細篆字如烟騷人得句敲門送啁鵲一雙  
飛上天

長歌一首爲姜母謝太夫人八十壽作

人壽八十鄉國瑞古來七十已稱稀賢母仁德兆千春百二十歲  
猶非奇大雷江口石簿鎮我昔看山曾過之天柱一峯生衆嶺散  
爲沃衍開平夷千村萬落接犬吠長林茂竹媚河湄尙父雲初實  
大姓母家尤重詩禮師當時耳聞與目見慕悅久已鑄心脾平生  
交遊少凡近鸞鶴聲韻虎豹姿母也三子吾識亞隣响霜骨翔文



翬長君季子闕緣分一己如此二可知望見門楣識內則身親賢  
秀窺母儀臺築金銀吾不羨轆馳朱紫吾不睎田間雞黍最心賞  
士人菽水關情思最是眞樂成老健曷看綵衣娛小兒咋咋紫荆  
鴉雀嘴榮榮青桂欄干枝大婦廚下炙羊鳴中婦閣裏洗盤匱少  
婦張帷結綵繡簪花出迓諸姑姨兒奉酒壺孫進斗六親九族賓  
四圍鶴髮初生千萬壽一堂齊唱髯蘇詩

見鶴髮句坡集

四月十三日季野見過同訪聖登聞舊藩署之成園天柱閣  
新理荒殘偕往遊陟明日聖登投示渡江至八都湖詩用僕  
霰粲字韻欣然命筆並簡季野兼示鐵華庶幾得吾說而加  
餐健起也

索句簷捕風斷髭瓊落霰徐徐起微波稍稍響枯澗摩壘一騎來



旌旆展相見示我渡江篇使我愠喜變馬矢高出城本來詩句意清吟

如許倩掃地自焚香日課想不倦昨者河陽君巧避賀人燕訪我

百尺桐嚶鳴動物眷季野逃豪門壽筵作幽尋吾家林雀自笑懶

頭陀歡來同出殿入君不繫舟書衣掀拂面晴轉積陰餘萬綠濃

夏甸散悶豁塵眚高閣登臨便欄干風雲通江山蒼茫獻森森八

都湖輕煙明積淀俯首愁思凝蓬蒿欺瓦片藩署後堂昔時言笑

地尊酒舒遐盼青苔覓行迹難忍風流斷愛樹幸有人聊慰林鴉

怨燭霄炳文章呵護賴神讚鐵華天柱閣記大持悅病相如飯添

雲子粲

幽居寂寥興懷乙盦先生因邀同季野慎登入成園上禮嶽

樓天柱閣時閣新修園亦竝理追思宴遊蒿日桑海仍次題



寄攝景韻

霧雨冥冥迷望眼起攀天柱倚雲看入山老鶴自高隱鼓浪長蛟不肯蟠苔砌餘香曾瀝酒露林清響警飛丸莊嚴樓閣扶花樹嶽

氣終多澈骨寒

壬子冬皖城大亂藩署以庫藏所在深入鎗林延燒前後堂廡此露響之所所以有餘警也

次韻酬冀平題僕詩藁

老農礪确費耕牛數畝山田總歉收求佛九華逢李白得來山月

一輪秋

贈童子馬郎冀平膝下英也時在四月剛半其庭前枇杷纍纍滿樹都成積金子賞玩不已冀平因笑謂曷不作詩遂並咏之仍依前韻

到眼於菟欲食牛老坡凜凜氣潛收回看庭樹黃金果已奪江南



丹橘秋

喜叔節來皖出近詩就正乃有望塵自傷之語不禁失笑題

句叔節詩卷後

山川百里言笑隔神鬼一朝撮合來正當落日恣昏昧且燒高燭  
照尊罍眷茲風騷老祭酒媿矣天壤一浮埃黃鐘瓦缶有人別非  
我不受非我推

不有橫風吹疾雨甯能聲色發奇觀如雲愁緒迴環起得句龍拏

鬱律盤北海歌成宮監泣天壇篇就柏枝寒卷中壇二歌精光垂

漢非難事焉知天漢上自有精止辨淵明酒自乾叔節此行有

次韻答冀平

飛符召將急如律工倕輸班紛紛集分布肝腎各效能為我彫鐫



出新什照人朗月總宜圓射的良弓貴能曲柔之不曲搏不圓坐  
此枯吟仍招敵輜軒久棄里巷詩醬瓿覆同子雲易安用雄陣橫  
掃除此理憑向姚髯質姚髯詩篇老杜陵四海雷聲誰敢觸君是  
飄然思不羣燁燁青蓮芒最劇同時作者王孟岑佳句教人愛成  
溺止有垂暮高達夫強逐班行攀鳳翼持較諸子真不如退作長  
沙長太息嬉笑怒罵一齊收聖鼻還求運斤術

甲寅三月至白麟鄧山人老屋過訪葛溫仲遂招飲

名鄉起高人安得移吾家羨君來結屋春雨看燒畚屋後一溪水

淪漪欲浮槎蒼巖遊碧漢奇峭疑三巴

大龍三縣尖一帶怪石嶙峋正在宅後

開門

賓環岫梯田種明霞果蔬獻母壽兒讀妻紡車鹿門懷隱者拾金  
吾笑華可憐江海上無林能穩鴉偶來訪契闊得意迎路義韻籍



賞鄰竹窈窕媚園花金石古書畫搜如張免冝頽雲堆几案展看  
驚成譁防我竊奪去醉我期無邪老矣不貪此神仙願略奢君曷  
發舊篋贈我幾丹砂

喜鐵華病起能吟和其投叔節韻以表欣懷端午前一日

頻爲文園失夜眠愁心一喜散如煙池塘靈運吟初就角黍湘纍  
望正懸翁翁遠來槃澗老丁丁相感國風年牀頭無藥江流靜青  
眼狂歌得不顛

翁翁鳥  
動反

約叔節慎登總持溫仲叔存至迎江寺僧茶冀平追尋有句  
敦和

一寺波濤上聯踪沙岸遊殿烟摩篆細塔影落潮浮山遠孤帆峭  
茶甘清磬柔法官愛吟句尋勝徑相求



次韻總持蓬萊四韻

仲是江日鄧叔存招集姚叔節陳慎登葛溫

嘯閣之長

閣上江山風月觴  
髯絲莽莽碧天長  
眼橫李白輕狂酒  
心恨麻姑

狡獪方遙識九華  
在雲外縱將一嘯  
落落峯旁鄉村城  
市都無賴羨

煞閒鷗心最涼

葛鄧鄉居姚陳江及僕皆居城閒鷗專美總持

反前詩之意重贈總持兼簡長嘯閣同座諸子

未易淋漓共舉觴  
聯翩嵇阮興何長  
一欄白水青山影  
千里蒼龍

朱雀方卽此桃源  
來世外笑渠漁父  
老溪旁不知更有  
塵寰在別

處松風竹月涼

酬綸士枉和迎江寺

閒倚千帆檻悠然  
雲水遊遠圍層嶺  
秀中有一尖浮香  
火魚龍獻



潮音天地流禪心與詩意共向不言求

喜雨

一雨歡聲竟若雷翹翹萬日意良哀隔江蝗欲遮天起荒野虎將  
哭婦來連日西風鳴箭弩陰雲南畝灌瓊瑰老農感激皇天厚或

免賣兒應吏催

前月見一農夫攜五  
歲兒沿衢巷呼賣

攜令孺出東城遊行田壟間

白髮蕭齋太覺清苔紋鳥迹不勝情綠秧繞郭過新雨攜爾穿田  
聽水聲

咏盆中炭根菖蒲

劫灰枯木無生意長養菖蒲青最多媿我有心未死盡浪拋香火  
禮彌陀



咏鷹石

時時繞屋風聲緊莽莽陰雲天宇寒止恐霜秋石氣勁驚人猛怒擊霄翰

和韻七姪亮病起相從江上晚眺之作

海上尋醫江上病今朝健起笑成譁同臨雨後波瀾水遠見山中圖畫家濃淡青峰深淺樹兩三白鳥一雙鴉詩成奇警驚衰老合

眼餘紅照鬢斜

落日飛紅映萬家卓然警句也

鐵華久病初起見和喜雨拙作奇情壯采欣慰不已遂疊韻相嬉不必激於時事也

龍虎天師掌有雷陰姦窮極鬼情哀轟傳猿鶴空巢出共看風雲

送雨來國史方修螽墮宋

春秋文三年雨螽於宋杜注宋人以其死為天佑宋喜而來告今江南千里生



蝗屢爲西來風雨所殄  
或亦同於天佑弱宋乎

木桃得報句爭瑰病中奇翼鳴聲王想是

### 乘軒意暗催

閏五月七日再同七姪江岸散步至二老柳下槃君已先在  
佇立徘徊間遇綸士遊行過此得句示七姪

高城日落晚涼多清景閒情與散痾新漲漫洲成海勢微陽戀岫  
與烟和人談二老須眉古客遇一狂裙屐過爾亦臨流足清詠昨  
來吟興復如何

### 叔節寄示喜雨古體和韻兼呈劉侯

萬井蘇枯青農者天所憐浩瀚千里雨曾不分愚賢得誰叩天閭  
喜讀姚髯篇吾邑老劉侯請命陳牲牲看禾乾欲死憂來不遑饘  
趨踰壇廟下祈禱晨宵連神明鑒正直解作遍秧田佇看沒牛尾



自長不須鞭遙聽行水歌繚亮繞鑪烟吾侯粲然笑詎得輕神權  
小人無忌憚驅之不受塵聖道隆享祀使人心有虔吁嗟縱蕩心  
寧堪照清泉走也滯江滸回首望鄉阡仁風百里至清涼解膚然  
和詩賡侯德鼓腹待豐年

送七姪亮隨父歸勺園

憐爾抱病累老翁嗟我齋廚僧家風正當日炙蛟龍宮病好還家  
一短蓬悵望悵望波濤東帆兮雲兮亂兩瞳勺園萬竿夏棗中扇  
涼枕簟睡老慵退亦將養書緩攻勿食多葷防體豐瘦健乃與風  
騷通詩句妙已古人同吟哦使心和且冲餘事暫閣吾言忠且寄  
詩與逍遙蒙

聖登賣文觴客醉後歌之



吾友一日賣其文得其潤筆邀客飲老饑亦荷促召及酒興迫人  
夜失寢寅盼速客直到申蓬萊廣產羅仙品蓬萊近在盛唐山長  
嘯閣高星可擘閣下萬雉倚江城江山重疊畫良坎其時炎熱鬱  
成蒸忽轉陽舒作陰驟巖雲排陣湧天濤雨脚江南明電閃白麻  
白烟看不分但有酣聲來逼檻快哉風勢滿一樓吾儕濡首魚羣  
淦賓醉如泥誇主人文章有神君不忝吁嗟乎聖登之文衡嶽祝  
融齊嶄嵌洞庭青草爲灩澦韻比湘娥夜瑟清騷有靈均蘭佩奄  
不論名山傳千秋定可逢時登薦剡乃無羔雁享奇榮天地孤舟  
吟幽感君以不繫舟名軒歌詠之賤售不較千金貲快與相知縱  
一噉自是胸中不流俗風流跌宕由恬澹醉眼看天發浩歌我歌  
不許時人覽



弢庵于役沿江圩田隄防事竣來皖遂負痾恙持句慰勞之

起痾喜對玉臺詠鐵華因病服妙手曾經三折人作客久傳吟句

健怪君近復藥鑪親縱橫風雨狂添漲約束龜鼉蠢得馴短短長

長楊柳岸自然辛苦費思神

喜弢庵病起歸裝贈句

柳絲娜露潤吟蟬荷菱曉風吹采蓮祇少詩來倍惆悵一聞病起

舞蹁躑玉壺貯得冰心冷石鼎鳴時蟹眼圓又恨延涼無勝侶怨

君徑返小寒泉弢庵家有舊園亭小寒泉其精舍也

次韻弢庵病起復往和含驗隄工便歸養息慨然有感之作

為魚憂本屬公卿紅錦障泥小隊行故事止存遺老說今時誰切

剝膚驚弢庵云吾鄉江隄號為官壩屏蔽廬和七屬故往者每遇大工如尹文端朱竹君英西林裕壽山皆以督撫親臨驗



年收自後則不見矣秀才自有天下任饑溺兼關鄉土情稷契杜陵

詩到聖且輸元亮荷鋤耕

季野在里以八十萬錢典宅湘鄉陳聖登聞而寄詩美之季  
野喜甚錄其和篇並聖登作郵示索賦今日新秋徘徊梧下  
得句次韻

龍眠雲樹鶴營巢榆莢錢輕狼籍拋從此養丹忘壽紀便看傲雪  
健寒毛閉門菽水親能養開卷英靈古與招得意張弦和湘瑟碧  
梧新響入秋高

感興一首和韻時涵寄句兼示其兩弟

何計尋歡獨倒觴望中水遠又山長已嗟老驥皮毛脫却有駢牛  
頭角方綠棘藤蘿緣樹上烏鴉梧鼠嘯枝旁眼看得意多奇趣下



酒酣眠一枕涼

季野再以巢字韻見酬復依答之

詩來神似巢經巢河鯉銀梭不惜拋晚歲交情夔一足有功文字  
穎諸毛幻雲蒼狗家寧守貪夢黃梁客競招風裏屋茅收拾好看  
人廣廈萬間高

爲槃君題蘇子谷畫條

瀟洒不羈蘇子谷有時高士有時僧滄海之涯曾一遇淡然如水  
寒如冰歸從程生見畫稿烹茶酌我題詩徵吾弟見詩袖出此亦  
欲得句先贊稱其人與我甚疏闊其畫使我眼頻經水墨山容寫  
意耳枯毫到處禪機生形骸外有至人在世不識者吾言憑

槃君請子善畫魯叡山中 先人往迹成八圖囑贅以詩



古柏

兒時樹下繞千回一別深經幾劫灰觸目丹青追警歎盈頭霜雪  
拜塵埃骨存神化天所放溪合山圍春未摧往日書聲滿林谷枝  
柯猶覺隱風雷

柏堂

天下兵戈時逃虛避深谷岡茅覆臥龍門蘿隱栖鹿追維我先人  
述遘蹈高足維谷在何許魯頌聚清族風雨何所庇享祀山堂肅  
白雲嶺四圍清溪流雙淥堂中列架書堂外森羣木生徒潛追蹤  
抗道宏講讀人紀載文章稟脫千毫禿出戶金石聲聽者天人目  
灘泉蝌蚪游園露菘葑綠谷口中屢來酒漿羅脫粟當時堂上賓  
一一皆名宿至今山中談時聚老農牧風微一以杏椒蘭久不馥



誰慰千秋思蒼柏表古屋

半天山居

吾族勤農耕一壑共樵隱就中半天峯高逼星斗緊伯叔兄弟行  
比屋通籬槿治田溝壟連上冢松楸近婚喪行慶弔先進野人謹  
小桃春墻開長棗秋園隕晚曛翠微陽人牛明在畛日月天上清  
風氣古初渾先祖眷雲巢種竹還山筍絃歌啓游夏雞黍接曾閔  
遠識景英懷高情仰肥遯亦思敦化翁履蹈儒行準詩書課子弟  
方巾誰敢哂即此老成人一失言不忍更傷母也慈亂離情事窘  
披圖憶寒威雪落山全粉

清流峽

清流峽在城迦灣兩三老屋夾清瀾土住農人客土族客中諸馬



丈人班媵聯通家最相習有兒善讀鶴鳴灘我時童子每獨往行  
 到峽口喜回還泉聲戛玉幽鳴澗書聲入雲高渡關兩聲合入松  
 風裏清圓佛磬繞空山亂中得樂有如此文酒磅礴趣尤寬樛木  
 怪藤峽中老流水磐石詩家壇春秋花月戲折簡壺盤瓜豆坐成  
 環府君修髯推祭酒兄與少長多妙顏豪呼細詠各盡態寧知世  
 外來憂患思往便如太古上人杳世杳何由攀聞說崖頭舊題句  
 風雨已失龍蛇蟠我欲續之聊寫寄付與樵牧傳人間

栖賢洞

不蓄髮見危城朱先府君遂迎居魯嶺山崖洞中既出  
 不蓄髮見危城朱先府君遂迎居魯嶺山崖洞中既出

因名之曰栖賢

賊砍不死真有道強起危坐歛衿吟豺狼號令山家恐扶入幽壑  
 玄巖陰松杉蔭高巢水鶴石泉響徹清如琳想見世外隱賓主月



明洞口談言深可惜當時穉不解舊德絕踵悲而今雲封谿訝草  
埋徑再逢浩劫誰能尋

### 小桃源

魯硤乃窮壑不可棹漁舟梯田隨山轉陡澗挂雲流窈窕煩登涉  
得此巖阿適樵父導引入茅屋寒臨湫別成小天地清氣迥以幽  
巖花高自媚林菌淨可羞妙香風露發衆綠雷雨抽鳥聲有異好  
虎氣亦和柔此宜儒養道避地眞無憂所以趙夫子攜家曾此留  
杖策平生親來話溪上頭相對游魚樂惠子與莊周佳名比於古  
勝地後人搜惜哉我欲往躬耕懶性偷惱極江水上紛紛羸與劉

### 龍亭

龍亭實奧秀柏堂隔一嶺彼有七十翁醫名齊仲景仙根祖子喬



龍髯老鶴頂風姿稱去聲佳地奉母命邀請跳澗穿楠篁捷與松鼠

等曉日上林稍丹碧一片影采雉明濕輦流音過龍井繞欄黃竹

肥扣之歌聲迥白水響綠陰風送銅韻冷清籟和寂寥村深煙細

靜還家開父文朗誦神與領宙合時不清殺氣連渤溟天地此孤

亭深藏幽妙境二三老儒生時聚巾杖影話檻冷風清極孤雲

耿惜無李公麟拂素邀首肯今老忽披圖潛焉有所省傷我連肩

弟病纏泉路永

龍井崖瀑布

由小桃源口噴薄而出長數  
丈大潭承之遂曲折成溪

山水何心名弗名地幽地顯屬天成仙源窈窕雲峯峻樹杪波濤  
雪練明高蹈空山養雷雨孤懸寒月照蛟鯨人間隱者如相訪可  
傍清溪問耦耕



令孺寄雪粉來卻寄

弄毫小女挽雲鴉雪粉親封題字斜  
一笑菩提枯槩樹遍開六出  
臘前花

喜吳辟重生子

六年夢長蒼龍孫春雨五色琅玕溫  
昨來遠訊烏雀喜虎生於菟  
排寒門海濶江深淼南北風高浪大連  
昕昏化鯤化鵬不可測蛟  
鼉勢已失其尊正當立黃龍野戰竊恐詩書秦再燔

時全歐劇戰  
吾國勢危

地上人情惶惑日君家乃以英物聞天公於此不無意況有明德  
與立文老夫老大難遠走一心歡喜眄燕雲湯餅筵上肥雞豚欠  
我作賀掀髯醺南華大年吾有分夷肆遇聖情尤欣已報赤鷹驚  
杜甫更待雛鳳鳴崑崙白頭狂客淳于髡華燭瓊漿海勢吞



久不見毅叔表弟去年秋越遊至杭客踪先後不相接湖山  
雖好離思惘然昨忽郵贈題咏彞會稽禹廟之作喜慰殊深  
次韻寄懷

回首越山紅樹叢秋風雲水一帆通頗穿訪古登臨屐漫浪濡毫  
苔蘚宮掃翠峨眉成悵望落霞皖口照衰翁顛狂喜極叨題咏曉  
樹鳴禽屋角東

毅叔再寄句題僕越遊諸作次韻

衰髮殘秋水上行扁舟霸國任縱橫何曾長頸逢烏喙雖有孤山  
無鶴鳴潮落魚龍呼不起詩來風雨醉孤傾得叨健句如雲至眞  
慰三年離別情

叔節寄來裴伯謙詩序囑爲交去因題其後以爲贈伯謙絕



域歸來名益高而道之所養者殆益深矣

丹穴一遠探高張鳳凰聲九苞垂五色音與箭韶成向來毛羽輩  
止解啁啾鳴老鴉太憨直黃鳥多哀矜勢利笑燕雀文雉乃不貞  
山鷄與孔翠默默妒華榮驕人惟百舌如簧美流鶯要皆河伯爾  
龐然秋潦橫試與聽朝陽能不海若驚干莫本良冶矯矯雙龍把  
一自埋獄底寶氣照分野從此出世間妖魔白晝寡吁嗟繞指柔  
端歸百鍊者

聞悔庵老衲夏日遊西湖郵贈此篇老衲遇吾兒孫未忘故  
舊之誼亦並及之

風雅勛名同不朽衡山臨淮兩無偶衡山高蹈誰得攀惟有神仙  
與交友千數百年淝水清世仰風姿瞻泰斗老龍鱗爪雲東西汗



血麒麟地上走架書三萬富文章早看魁儒著作手邇來海運鯤  
化鵬不比車攻魚貫柳雲師風伯天上行潤朽噓枯亦何厚在霄  
炯炯大星光在野穆穆衰髮醜將使揚英發其華時節未至且酣  
酒將軍名園停客車處士孤山問舊家風流太守兩隄柳無數藕  
花又菱花南屏曉色北高霞何似夜月彈琵琶畫船繞遍樓臺去  
爭識天人鬢始華大好湖山持作壽正同風景浩無涯老漁鳴榔  
樵叩斧隨秋送爽上衣紗

盛唐山之長嘯閣樓欄迴然軒城輕江江外羣峯螺鬢秀列  
八月十四夜一輪幾望水色天容上下瑩澈總持園居罷誦  
清興徐來乃升閣憑眺遺使招僕及聖登聖登如約僕負微  
疴未能也同心命酒撫檻懷人風景有無涯之樂亦正恐生



無涯之感矣報以絕句二章

桂花香歛月輪高有客登樓染素毫莫以支離敗清興奉君萬頃  
瀉明濤

三更玉宇有清寒湘水佳人伴倚欄喜得素娥能勸酒醉歸瀟洒  
坐吟壇

甲寅八月十五日寄槃君去年海上同過中秋亂離驚恐之  
餘曾有二詩相慰此詩乃有感於先後世變遙續舊詩而發

端

事過風靡草機深江發源竟成驚浪大猶覺亂鴉喧慰此今宵月  
來從故里園仍煩素娥手爲達倚欄言

次韻張石卿見寄



山送江流江繞城神傷逝水了無成名篇照眼軒軒舞短几披吟  
暗暗驚蟹熟悵違黃菊醉龍眠高臥白雲橫羲皇世遠君心近說  
到前型媿此生

甲寅九月讀竟伯謙吳船嶺雲西征化城風泉東歸諸集詩  
篇再題

餘生幸接大峨眉仙浩浩湖江吞楚天虎豹虬龍風月事惠瓊儋耳  
古今賢襟懷洒落非關酒造化往來成咏篇未免杜陵憂國恨回  
頭天寶淚如泉

與冀平別三月餘相見互索新詩遂邀贈句適少谷受田梧  
岡諸老見過乃招飲長嘯閣酒樓次冀平均

縱橫離思詩來慰鬱律香醪盞未深相對舊遊成野老恐談時事



動悲心疑晴疑雨江山在一笑一啼爾我吟索句佩壺總無賴相  
逢何必不披襟

前日過總持門見墻頭芙蓉盛開佇立良久乃去今辱贈園  
菊二種陳之几席之間至相媚也賦一絕謝之

君家花似謝家詩秋水城邊初日時未得摘來映華髮更教對菊  
憶東籬

總持得僕詩乃以二絕見酬聊報一章

連朝醉對傲霜花似有南山近我家豈料柴門破詩句斜陽小院  
手頻叉

總持有句云誰憐三徑凋殘後猶有黃花傍短籬諷誦良久  
再題四句



惆悵秋來三徑殘  
霜風冷峭有餘酸  
騷人傲骨終難折  
相對黃花媚晚寒

甲寅十月二十三夜夢中句

三月春衣五色鮮  
萬花羣鳥四飛旋  
大觀亭上一杯酒  
坐看長江水拍天

和韻伯謙枉贈二首

楊葉春前舊挽強  
仙鳧風翼正無旁  
海波橫起珠成淚  
關雪寒威路似腸  
萬里刀環頭欲白  
八方秋雨樹飛黃  
霜鐘敲出慈悲佛  
微笑拈花下道場

未解風騷敢說詩  
文明朗照喜逢離  
浣花眞覺前身是  
空谷多慚絕代姿  
覆瓿玄經空擬易  
焚碑野火不知斯  
英靈陶冶延薪火力



啓貞元晞大師

立春日晴暖後二日雨水凝奇寒送弢庵回里度歲兼謝醫  
治拙疾

自疑老臥病僧房懶到鼻頭涕尺長已廢吟情從藥裏深勞妙手  
示經方春芽草木生機活雪凝山河徹骨寒想得迎門兒女子獻  
椒暖酒鬧年芳

予病腸紅兩月餘倚榻披閱河海崑崙錄至十二月二十六

日閱竟有與伯謙書題詩於後

並載原書  
以當詩叙

承惠大著河海崑崙錄守彝病中奉讀一過內載王晉卿談  
說先府君令棗強時事一條守彝斂襟危坐莊復數回晉  
卿之祖重三先生振綱畿輔之碩學通德老輩人也與



先府君道義論交深相契重論學論事之手札遺命寶藏未  
敢散失王先生每命晉卿持文字出見 先府君 先府君  
特器異焉 先府君作宰蒞官行政不枉道以干百姓之譽  
李公秉衡初令棗強一年之間殺盜一百餘人當時以能治  
盜名 先府君繼之到任閱案卷嗟歎流涕親赴四鄉勸辦  
聯更法略仿守望相助之意每交冬令各紳富自僱本村及  
近村貧民守夜警更聯聲勢而交相趨禦惠分情合可以免  
饑寒消非心而收効力法至善也乃北地紳富吝財若命不  
肯照行至盜劫其室報案到堂 先府君飭責之實有深意  
而緝捕之役亦同時並發晉卿云云語焉未詳也其後遵行  
條教盜案遂鮮在任九年僅殺盜十餘人 先府君喜誦周



易君子以裒多益寡稱物平施之文在官多寬於貧而嚴於富結好邀名之地衆人所趨者先府君落落不厝意焉而辦均賦一事令凶年以賤值購貧民地產者至豐年准貧民備原價回贖皆爲紳富所怨至有入京師賄託御史奏參者製竹枝詞猶其技之小焉者也古今特立獨行實心任事之人不顧天下後世之是非而天下後世之是非至難憑矣於難憑之是非而能求得是非之正者是在知言之君子夫仁有術事有權居官臨民之際止求足以利濟豈暇參以悠悠毀譽之見哉傳聞異辭官書野史褒譏紛然往往各憑其好惡之偏或一時有所激於私憾借酒杯以澆塊壘求當乎春秋之義微詞深婉一出於正者蓋未易易也先生學問博瞻



有道君子也讀既竟伸其嚮慕之忱敢附陳之

浩亭丈人吾先執嗣賢繼聲四十年著書遠塞徹道要風塵蒼莽  
辭鮮妍有時借酒澆塊壘眼花清聖迷濁賢楞嚴座上日負耳幻  
妄所見非本然冤禽銜石口流血荒荒寒日照皇天我能識子用  
心苦風波海大何由填倚枕翻披三嘆息沾襟不覺涕淚漣寒江  
枯落饑鷗冷歲行盡矣病猶纏強挽白頭事追述寂寥相伴藥鑪  
煙

溫州







网舊聞齋調刁集卷第十三

桐城方守彝

次韻敬庵徵君見懷黔在萬山中徵君隱居奉親課耕讀屢  
辱書存問衰劣寄新詩數十篇深慰寂寞也

相思不可見相慰幾封書一病人增老千秋念已疏詩篇排岫出  
春氣渡江初感我凋蕭鬢眞慚朽木予

次韻敬庵徵君添孫

故人高蹈休官早歸舞斑衣再下惟有子料能堂構肯添孫報轉  
歲華時當門黃嶽鍾來秀縹緲青春弄最宜便擬登堂趨拜母親  
邀卮酒潤新詩

和韻槃君歲暮感懷之作



臥病江頭日問醫，餘生自戀笑兼悲。  
我衰爾亦須眉老，學廢心同猿鳥馳。  
骨肉一家雲四散，市朝屢改歲頻饑。  
崢嶸殘臘泉臺夢，驚覺東風入鬢吹。

浪滾波翻江海風，蛟蛇羣壓老龍宮。  
谷沈高岸騷人怨，汰擊中流物望空。  
相勸莫憂天欲墮，孤吟且喜句能工。  
羨君兒女堂前滿歲酒，酣時兩頰紅。

和韻時涵移新寓二律

若何收拾澄清志，鞭影甘推祖述先。  
棲息徑賃高士廡，遠遊不賦大夫篇。  
山河破爛滄桑後，魍魅猖狂城闕前。  
正好楹書閉門讀，儒家舊業世能專。

江波漂日去難留，且倚樓欄當臥遊。  
園竹不肥存節概，海棠未放



已風流莫云霄漢名曾勝縱力詩篇古可儔喜伴老夫破岑寂看  
吾白髮恰如鷗

五言三章送孝旭六姪應聘赴天津

悵違兵甲裏相見遠行時問病知驚老談深坐屢移爾賢親暗喜  
家瘦事難支負米入塵去人情繫我思

浮雲多態度送爾亦躊躕柳色寒猶嫩梅花香正腴折枝贈遠別  
深酒瀉吾愚叔度波千頃中涵明月珠

良宵圓滿月共爾皖江城鄭重不常有情懷中自盈詩思生驛路  
文字出家聲白首臨歧語郵書聽鵲鳴

趙君燧冬輓詞

冰時已結東臯淚

謂少谷先生

草色又滋冬日哀

冬日本春秋晉卿事

劍化雙龍



相約去蓬深三徑爲誰開。還傳野老談遺愛不共晨星照劫灰。泉路佳兒知攜手傷心鶴夜話歸來。

和丹石河上紀事之作

來詩自叙曰濮陽工次室廬多沒於水役者董役者之居皆取給於葦席疊磚成柱斷柳爲梁若椽與壁編秫代之其瓦及聖塗泥攝之雖使者之尊亦無以異所異者內糊紙以周拒風沙而已親見河岸民居之狀覺此已不啻十洲三島間之五宮十二樓也僕入居之日爐火驅寒而夏軋大作頗疑雪珠撒驟不知乃紙漿縮篋之聲戲用五言以紀其事詩曰河上得新廬見者拱手賀相語聲漸低若恐壁驚破客去仍吾儔正襟各危坐析歷四面起道是霰飛過助以東北風敲



徧竹萬个開戶急視之中天月正大

久病喜新蘇春雀窺簷賀塵几見遠書鯉魚手親破初讀展然笑  
繼吟驚起坐有聲起字間琅玕風雨過感我伐檀篇蘆中人一个  
想像杜陵翁胸藏廣厦大

時涵新寓海棠含苞未放折枝來入瓶并賦二絕句連日風  
沙甚重若有感於心者遂亦成咏

室有名花不在多孤吟無奈寂寥何膽瓶供上烏皮几便似朝雲  
伴老坡

我亦巢林寄一枝含芳憐爾避風吹向來處士無金屋相對青氈  
大布帷

娜露朝迎江上霞明妃顏色漢廷嗟天公力與春陰護莫教琵琶



怨塞沙

予既咏三絕句越數日時涵招韓伯韋陳慎登葛溫仲趙綸  
士吳梅廬飲海棠樹下外甥孫公拓亦攜其家兒展來陪侍  
是日微雨海棠盛開予以病後避酒從樓上望之花態賓顏  
醺然交映遂復賦之

江上日來風沙多海棠堅忍未肯放有意韜退待天時蘊蓄丰姿  
養高望可憐爭能桃與李爛熳郊原頗恣宕止解得意弄芳時天  
地塵昏略不量豈知脆骨不禁風流水斜陽邈惆悵昨者阮咸開  
竹林招邀三五嵇與向買魚沽酒到江村布席提壺林陰傍海棠  
聞是會名流窈窕朝來齊舉帳天公著意助流觴疏雨一林神更  
王樓頭翁髮白如銀一笑夢隨蝴蝶颺絲絲楊柳抱城青疊疊螺



鬢隔水映海上風狂浪正高萬竅鳴聲達江上鳩呼羊舞肆憑凌  
幾輩寒儒甯足抗貽禍端由桃李魂惱作秋心起悲壯海棠笑我  
懷抱低時危正合忘得喪嘉賓雅集不尋常故放酣顏開飲吭一  
花一斗樂今朝閒慮閒愁皆幻妄須妨善罵老韓康醉作金剛怒  
目相

槃君見予賦時涵新寓海棠詩來書稱其家園海棠亦盛開  
且與碧桃紅白相映頗已爛熳責吾詩不可偏枯語巧而詞  
意尙氣不禁啞然笑也聊寄二律

各有名花散寂寥祇予老屋似寒窰偶尋春色隨年少翻惱詩人  
逞舌佻爛縵芳園書札晚搜求吟句夢魂搖碎霞千點雲千片難  
我抽毫作背描



凌寒亭畔風光好可惜情懷未到兄不是雁懸詩句去甯知桃映  
海棠明連雲修竹成高友抱縣名山是故人安得相攜二三月花

光雙照倒瓶罌

吳才老韻補注庚古通真

三月十二日晨鐵華簡告病篤附詩二章為訣別囑後之詞

並囑傳示諸舊好乞和讀之惘然次韻以慰

君病當吾老情懷匪世期沈沈愁日晚莽莽悶雲垂化蝶要同幻

靈椿豈免悲達人解嘲笑厭勝事堪追

來詩云豫凶事非禮也亦道家厭勝之意耳

詩篇參佛慧眼底孰能如危坐摩來札難言擱答書懸崖從勒馬

歧路信回車藏我尊中酒待君歡盡餘

再次韻下一轉語以當靈藥之投冀鐵華一笑失痾也

高吟一傾瀉情至匪前期淚化珠光落天臨星影垂柴桑酒未足



皂櫪驥長悲

二句自况

更約十年飲驂虬相與追

古人亦爾爾今我自如如同一蟻旋磨空中雁作書最賢伶負鋪可笑籍窮車八表囊靈藥贈君探有餘

時簡自蘭州之白墩子寄西征三詩歸其叔父槃翁垂稱宿潼關長句其兄時涵亦和此篇予題短句六章郵示之

傲岸佛龕冷傍皇歲景奔窮冬走萬里七字塞雲屯

十年學鼓瑟聲滿五十絃囊錦暗復暗竿筒圓未圓

青青左侯柳長慰遠遊人春風滿關塞嚶鳥情相親

扶桑搏曉日皋蘭臨大河魚程與鳥道望望鬢絲皤

倚閭當年人報爾平安去白墩長城西西方國何處

冥雨濕渡鴻鳴聲正激烈起附白雲書短音慰遠別



行年六十又九初遊浮渡戲題金谷巖寺壁

一葉宵浮白蕩湖名山發興縱遊初祝天禁雨成孤笑權水翻星

擊太虛清籟微陽人健步古岩荒殿佛高居慣逢勝地忘衰朽關

上仙人或是予劉才甫先生浮山記出金谷而左陟其肩有大石穹起當道兩棖中虛如植玉環而埋其半於地自

遠望之天光見其下如弦月焉山中人有凌虛御風之致有神明書刻字曰紫霞關予步登其巔踞危石而坐有凌虛御風之致有神明書

爽幾欲仙去

首楞巖題句巖內鑿石為几榻几作棋枰無子劉先生記云可奕可飲可以望江南九華諸峰如予下

幾輩棋輸子亦盡難尋洞口爛柯翁躊躇卻顧人間世霖雨蒼生

懷謝公

一綫天題句劉先生記云丹障之西曲折甕如石罅螺以旋折而其

珠上上巖底四閣其頂開圓窳見百天人飛流從中環坐下而觀十焉者如噴



神人不奈青天大分付輸班縮範圍便作冰心壺一隻教人壺裏  
飲冰霏

乙卯三月二十六日辟置奉安摯父京卿窀穸於邑南鄉朱  
家灣守彝率姪時涵前往會葬致禮追懷老學感觸身世歸  
途成長句卻寄辟置

四方上下求不得十載迷勞夢自縈白髮無聞慙後死青山及見  
葬先生美邱端合酬明德人傑還將表地靈學者仰天思泰斗會  
看下馬拜高塋

五月十四日夜大雨翻盆明日槃君將返勺園悵然和其凌  
寒亭新句凌寒亭予舊有題篇誦新句所感浩然

舊題愁憶作詩年愁裏榴花似火然有地著書終覆瓿何人不寐



夜鳴絃孤亭閱世成今古寒色滿寰無近邊聊復高歌和新句離  
情龐雜雨喧天

雪樓過訪投贈疊扇扇畫蘭題詩次韻謝之

我逢古心人高步不草草落身戎馬間未改山澤老爽接松風涼  
韻流江月皎相許結素心願言永爲好何以見交情幽蘭寫貞抱  
茅葉承華露露重茅葉傾無香空自瀉潤物誤春功解下美人佩  
贈茲幽谷情動搖懷袖裏齋閣一時清

奉謝敬庵徵君寄野朮笋衣

采朮采朮黟山深貽我遠寄荒江溇山泥未落香氣足籤題親灑  
墨花淋望君不見勞項領遙遙白雲橫翠岑聞說黟山多竹箭粉  
筠綠節霜霄侵年年春雨龍蛇戟家家園味鷄豚燻先生清儉有



風采披剝虬豹縣簷陰風日經過乾可卷滕茲珍藥璆配琳朮能  
健體益神氣筭衣入胃清不淫倘復行鞭抽苗葉臟腑便可成山  
林江頭老禿寰間贅中自不足招外衺去年一病餘三月嘯歌坐  
廢酒罷斟行住坐臥成懶惰儀度全背賢人箴感君扶正加餐意  
待健腰脚往聽琴

往歲聽君彈平沙落雁一曲世變以來脫  
冠還山課耕課讀之餘頗復撫絃否也

新安宗人振民亂後來皖再見喜慰殊深頃還我借書並贈

徽茶告別返里次其藁中詩韻

一別山河改相逢乃有今羞予塵劫鬢感子古人心教思忘時難

君創設師範  
小學於鄉

徵君獨遠尋親訪胡敬庵弟子橫風吹百鳥誰上最

高林

正喜得君子為清水上源君教育會長延如何懷里舍不肯與流連



詩返香山卷茶生石鼎煙莫貪歸種玉恐有奪藍田

寄何子翔上海

北風天雨雪南風地蕃蕪維風與天地形響何曾殊神明宰氣化  
寒歛煥榮敷水部老風人兼曉歧黃書走筆詩百篇新警一世無  
醫門從多疾著手立時蘇側聞神農氏嘗草不愛軀定名揭厥性  
殷勤告人徒如何生死者參苓有悲愉字體造蒼聖義訓垂漢儒  
編排受驅遣百家相齟齬風雅吁派別巧拙溝精麤龜手異所用  
客悟買方初目視而神遇常屠非常屠邇來遭世難兵燹屋焚如  
竭來滄海上賃廡浮家居牢騷放篇什鍊氣運尻車活人亦自活  
嘯傲神采舒走也從吾弟詩披養浩廬震眩成慕悅飛入壺公壺  
頗自羞凡骨登階彎若弧乃蒙豁齒笑情親匪前圖握手口瀾翻



滾滾灌枯魚察顏審氣脈憐我老馬瘖示我肘後方教我運轆轤  
霍然神一王呼酒謝醫盧酒薄肴更惡未足邀歡娛罰出新詩篇  
斷我緣坡須瀟瀟江上雨雲濕山模糊還家十餘日流潦淹巷衢  
閉門不得出懷想空張盱念君造化手能使稊生枯呻吟此橫目  
瘖死肥者癯怨君不主病主者恐非夫坐令吟毫禿憂來甯可鋤  
便堪傳後世眼前嗟凋疏躊躇孰作計無益空勤劬登高縱遙矚  
草樹迷江湖

雪樓以予出筮求畫蘭即日揮灑系以詩曰花草原來有性  
情環肥燕瘦各生成牡丹蘭蕙得時放都有芬芳誰最清愛  
玩吟諷題句於後

東家富貴西家貧茅屋橫秋朱戶春明月中天光滿地素娥畢竟



意誰親

代答

一樓歌管拂雲霄一巷清風淡寂寥  
止有幽人戀良月隔墻花霧  
鼻雷高

長歌一首贈強齋使題強齋印譜

從來邁俗人心獨與古契極其契之深  
性命有不翅好古日孳孳  
遂與時俗戾戾俗焉能富厥身  
身間心古奇多執初爲古拘囚繼  
從古恣肆拘囚恣肆間不關根  
鈍利漫浪遊處溷吾曹  
心獨別藏一天地慷慨達者觀  
憂愁不平氣流露忽偶然發洩  
意所寄規矩準繩似有無是古  
非古皆絕世吾說何據依古今  
人可例雅鵲常萬千麟鳳時  
一二不用嘒嘒說古狂完白山  
人千年最高山仰磅



礧木石孕嶽氣北巖松始貞南嶺苓已秘誰云醴泉無靈源竹下  
龍孫長羣穉以此知潘生秉德淵源懿世遭外家風篤古以自媚  
積腹萬嶽崎到眼雙睥睨舉手秃筆掃龍蛇遊刃冰斯石上字刻  
畫臣能甯讓人咸陽殿上不得侍栖遲鄉里三十年章刻難活一  
家累風雨敞廬自突兀苔紋蝌蚪蟲篆砌點頭頑石得法靈踏雪  
飛鴻契詩意朋友歛門求無錢爭掉臂我最愧傳人青田浪磨礪  
名字尋湮滅思之汗流背吁嗟乎世間久斷周公才驕且吝者盈  
吾睇風斤何處斲妙質囊穎空自消精銳潘生好古抱執精變化  
神奇有餘事若要再作山人生莫嫌屋破衣裘敝

贈雪樓步其見示翁字韻之作

青熒老眼眷衰翁橫槩詩篇烈士風

百有五韻詩古史也

妙手蒙莊喻蝴



蝶秋心子美感林楓

首有秋風人之蝶比絕句四

流傳佳句江聲遠塊壘奇

懷酒聖空太息論交戎馬日謳吟夜夜一燈紅

辟蠹寄贈新印其先公摯父先生評校史記惜抱軒古文辭

類纂曾湘鄉經史百家雜鈔十八家詩鈔及先生門人武強

賀松濤文集代簡賦謝

貯腹慙無一斗墨枉輸卷軸比墳邱作者堂高象緯逼懸以月朗  
天星疏指南導我九疑去冀北斯人伯樂收初開驚怖終感激爽  
澈清涼天上秋

謝雪樓餽合肥小磨麻油附軍人轉運便持來

詩人憫我枯腸嚙聞有胡麻蟻磨油鞍馬傾囊高書記泥鴻封印  
小戎收金膏色奪蜂脾蜜玉杵香通蟾桂秋定是包公河上水清



芬澤物異常流

子翔來書云現攝一影一人乘飛艇空際下爲大海彌望無際乞爲題咏以絕句五章應之

秋水佩瓠南華叟海國乘桴東家邱一聖一狂兩夫子多君直上到清流

禦寇冷風且莫論靈均虬駟良有以仙槎棹入養天雲惆悵九關有無裏

昏昏塵世不可居幾多文字寄長嘯遊戲無聊正復爾蛟龍窺女將何如

寄身且向萬物表下看鯤鳴變化了雲中長爪美人呼回首田桑青萬杪



何處雲松好結巢  
摩天畫鷁視周遭  
倘逢黃鶴昔人在  
題句須煩

崔灝招

光孟超屬題三絕橋

出縣城宜民門至石莊中阻毛溪有虹無橋山洪盛漲居民病焉孟超之尊人經營爲橋用長板三爲橋材銜續成之初名三接既而有二客來遊一名詩一名畫一名能書遂易爲

三絕云

故園悵望百餘里  
景物新傳三絕橋  
白水荒城羈鶴爪  
綠楊小市夢虹腰  
山居舊識松筠古  
溪漲遙思風雨瀟  
過叟渡樵歡作態  
畫圖恰好鄭虔招

七夕邀臧雪樓韓伯韋陳慎登胡淵如湯葆民楊天適飲於



大觀亭時涵率孫煥德從伯韋歸即投句戲次來韻

詩句奇成下馬虹蛛絲小巧那能同將壇擒虎千夫指國子送窮  
四壁空龍睡得珠驕席上魚驚縮項逐波東今宵塊壘消杯酒天  
上人間頰盡紅

次韻酬聖登大觀亭七夕宴集憑欄望弔鐵華墓之作

忽此秋氣高星漢明吾矚織女理機絲牽牛飲河隩感彼常度安  
天上無陵谷慷慨嘯良儔亭皋攬清肅亦復載壺觴風鈴當絃竹  
疏檻通江山磅礴散積溥往往談言中忘機暢襟曲有時一大笑  
共盡杯中滌萬象備陰陽太盛忌九六眼前草木心眷此感枯綠  
惆悵文酒會昔日春蠶簇世變傷人琴憂來心如築誰促客辭家  
不待行李篤艱難成麟角霜林苦撼撼千載黃公鑪河山邈相續



與子掃悲歡去尋鹿苑鹿

次韻酬楊天適

暑退時方乍秋來天何遼幽居感節序平生念久要把卷不成  
靜坐寂起潛囂仰視河漢間倒影瓜庭看提壺喚吾侶象外求其超  
爽氣從西來山亭明孤標江楓香映酒塘柳鮮盈筓天機談灑落  
嘉客不負招惟有兀者惡

是日有毒生膝  
間跛行前往

老醜蓬飛毛

大鳥傳奇翼跬步生廉隅遙遙望古心閉門月滿除深井汲長繩  
清泉洗佩琚因風一奏響山木天籟舒老蒼逐少年江山開畫圖  
中有軒軒鶴天人之所娛從今與忘年春秋知蟪蛄物理有變化  
於人甯獨無

次韻天適同淵如聖登葆民飲後步湖隄訪鐵華墓之作



太息簪裾地斯人不復聯鳴塘照孤冢虹氣散林煙句失澄江口好  
情深掛劍賢短歌當哀竹風起滿芊芊

次韻雪樓大觀亭七夕宴集憑欄望弔詩人公徐君墓之作

高亭吟望一悽然恨入劉蕢墓草年天厄斯人泉路下秋橫我輩  
酒尊前江山蕭瑟愁相弔涯灌萋迷綿復芊仰羨雙星總無恙相

迎問織話耕田

郭璞江賦涯灌芊蕢涯側叢生也拙  
句意寄蘭桂凋謝蕭艾爭榮之感

伯韋以酒闌人散奢望轉多命題相要再投社詩句

知吞雲夢有寬胸徒黨高陽願日從十萬無靈難眩巧鶴五千能萃者  
比猶龍盛唐山近尤宜酒老漢家藏可破封哀怨耗比琶惜商婦酣

嬉楓荻對秋容

君詩有年來小  
婦同飄泊之句

鯨喜周晬寫句當歌



去年此日百步威今年今日長百丈江水更比涇渭深曾洗玉花  
光燦朗一周星紀又新秋解把明珠月在掌李杜文章萬丈芒坐  
待家雛追配兩掀髯一笑舉一杯句裏麻姑搔背痒

諸君子七夕大觀亭醉中望弔鐵華新阡以僕爲杯酒主人

詩篇紛投葆銘亦續至次韻酬答

秋到銀河烏鵲間憑欄詩酒放高閒繽紛落眼澄江練馥鬱宜人  
叢桂山若有靈來詞欲唱厄斯才去帝何顏幾聲鳴鳥如相怨蘋  
冷方塘碧玉潺

周頌膺自合肥至皖昨夜再過示近作悽感鐵華之逝誼甚  
高次其所示聞字韻長律爲贈

夜來見見更聞聞月色霜華浩不分論古源清星宿海吟詩敵卻



岳家軍淮淝大雅思前輩吳楚中樞接片雲坐感秋風悲宋玉鶴  
歸無迹失求羣

朝鮮遺民金起漢至皖相訪起漢承其師授守吾國有宋大  
儒之學抱負甚偉國亡後奉親率家人旅居奉天耕於山中  
時復孤遊東西各省訪求賢宿意欲行其所志栖栖不皇可  
敬尤可悲也於其行賦詩誌別

先生行義貞金石險阻艱難百不回烏鵲覆巢三匝去銅駝埋棘  
萬方哀誰能隻手扶寒日獨抱殘陽歷劫灰垂老遭逢天外友眼  
明疑是古人來

奉題懷甯先輩江楚帆先生藹園詩藁後

文必於己出不隨人作計每誦古人言未得古人意嘗遊叢灌間



飛集晒羣翅山光朗林柯鳴聲各自媚毅然不同音多識昧詩義  
就問山居翁側耳辨殊類凝立思其能一笑得所自松響作濤寒  
泉韻呈玉粹清香含幽蘭鬱馥蘊華桂大哉天地間了別甯可蔽  
由不相襲奪自發本然地小大皆足名濃淡寓深味假相視聽迷  
眞者失其位隨人而喪已將眞何所寄物情可引申因之悟文字  
我讀先生詩反覆獲冥契儼如從之遊村醪陶然醉百憂與相忘  
披襟散天吹俯仰萬籟中心獨領其異

伯韋聖登溫仲雨中招集迎江寺聖登歸復枉詩篇短句呈

謝

煙雨江天暝寺樓鐘磬深高情寄香飯欲寫不成吟  
追歡垂老日深識故人心正字閉門去詩篇苦見侵



乙卯十月初四日自皖遊潯挈內姪王容成侍行夜發初五  
抵埠燈火滿郭矣明日至江頭覓琵琶亭故址遂縱歷城內  
外晚步甘棠湖長堤呼艇子登煙水亭小坐渡湖而西入湖  
山第一樓酒館酣然歸寓愛煙水亭超然物外僧亦瀟灑可  
人發明自攜豆果再至亭上入禮五賢閣閣祀陶靖節白太  
傅李少室周元公王陽明皆有勝因於此退而與僧方照清  
齋相對閒話竟日亦起觀壁上題句記其佳者是日爲十月  
七日居士蓋行年六十又九矣來朝返皖即事賦二律

衰翁發興到潯陽擬醉匡山五老觴亦遣詩懷滿楓荻便從籬落  
望柴桑吞天九派帆雲遠落木雙峰劍氣涼來泛甘棠湖上艇澄

瀾能照老夫狂

廬山有雙劍峰  
正對煙水亭



一庭苔壁走蝸牛似是題詩在上頭文字有靈通溼化仙真無語  
笑風流長堤小寺魚收網疏柳清波山滿樓白髮孤遊無限意老  
僧相對話殘秋

輪船倚檻望彭澤馬當小孤

馬當彭澤總依山帶水西來繞半環野色一城荒草嶺詩情五柳  
古柴關帆風過處羣鷗白石氣蒼然落照殷高艦中流飄忽去得  
無神女笑衰顏

方照上人贈煙水亭前輩老和尚古懷畫梅一幅賦謝卻寄  
江州司馬風流處天竺高禪煙水間破衲倚欄紅寺老名山當戶  
白雲閒未妨樽酒寒相酌肯贈梅花俗與刪歸對古懷三尺紙時  
時飛夢落僧關



喜丹石南歸即送歸里

冰雪猶未至幸君能早歸相逢同喜健深語漸成瘕遂覺存亡淡  
何論人我饑眼前聊與醉惆悵手重揮

讀罷季野詩文卷子題數十字

文字無定質好醜根爲人世重古者作輾轉忘其真紛紛譏桃李  
隨口贊松筠一遭霰雪至促縮腰不伸花鳥二三月到處逐山春  
水涯野屋角凝情復含嘔回首看寒籬仰顏眴嶙峋巖色與霜色  
雖賞情非親然吾聞其聲凜凜正論陳五音易迷耳念之慘吾神  
自問胡爲然祇恐成比倫朝來憎藩牆除翳一揮斤雲霞豈不好  
中有秋山存冷性愀自抱采秀散繽紛情高意態遠每使幽人欣  
泠泠風泉徑窈窕薜蘿村窮探縱遐矚一笑識夫君願此永相保



亦許世間聞

潯陽遊歸槃弟有一律見寄毅叔和其韻續至感情文之盛  
成四絕句謝之兼簡槃弟喜來書有卽將來皖之語亦欲毅

叔同來也

斯人何寂寞孤嘯倚榆枌遙想籬邊菊經霜尙不羣  
喜雀報寒檐開門風滿簾吹來詩句好愁斷老夫髯  
小遊得煙水止納一天閒鶴去千年遠沙鷗何處攀  
且喜網雙魚樽邊已不虛蘇家好風雨君子興何如

答冀平

冀平有萬壑松風龍眠探藥二圖微題  
子亦適有感觸因來詩之意一發焉

有勝心者勿與爭平生此言默自盟是非卻有吾懶辯日月不語  
但光明自守常覺有我在丈六金身了了呈圓融廣大得無礙未



妨人我相縱橫有中自無無中有君一無之殊可驚既已無人復  
無我便當無僕無吾兄爾我皆無真已滅何由幻者我能生仰首  
看空空不見惟有浩浩天風聲二圖題句倘未起付與南華萬竅  
鳴

雪樓觴集臥雪廬用留聲機戲娛客季野先成長篇爲謝雪  
老和之先後垂示遂亦不能索然寡歡乃拾遺補闕成此以  
取笑趣

飲君之酒誦君之詩酒美難酬詩難和惘惘此心如有思金鼓齊  
奏聲繁會琵琶胡琴鳴寒絲間以短簫與長笛抑揚風月呈清吹  
中有歌者發高唱能令人喜令人悲餘音不絕梁塵動失聲一叫  
快稱奇賓酣主醉各散去至今不解唱者誰念君觴客復娛客好



客如此殊多姿眞情幻想感人意豈獨詩堪我輩師白魚黃鷄花  
猪肉生菜乾腊椒薑薑尋常品物不矜異烹調一出千庖低豐盤  
大鼎食單壓長爪突眼饑鷹馳頃刻秋風掃落葉止餘雅雀怨空  
枝饕餮要非客盡惡成連海上情自移聽君樂嘗君味得意忘形  
不自知倘能三日五日一爲主醉飽豈復憂時危寄語寒儒潘季  
野止解高言出佳句未辦貪心張朶頤我今新學滑稽辭願子臨  
風一誦之可能感動主人意他日留髡獨倒卮

賀淵如得子

古人急祿仕逮養始云樂生兒人所睇早遲紛然各大器多晚成  
遲者殊不惡最是慰衰親樂尤倍祿爵淵如吾黨賢學問造深博  
平生猛晉心健步不肯卻獨有生兒子一事稍示弱行年四十七



對茲殊落落朋輩忽過予未言先喜躍躍定道淵如竟得男於昨  
掀髯一大笑轟鳴滿城雀遙知老母情雙眸復故矚卻病更延年  
有喜占勿藥今朝湯餅筵詩人爭有作或云震得矣從此索復索  
或云石麒麟祥瑞世命託要之淵如兒總是嵇家鶴吾獨別有慮  
起滿君一酌工書久擅名自誇法精鑿異日王獻之不同將何若  
世人那得知還請君自度但恐庾安西家雞惱味薄

淵如母夫人  
久抱目疾

伯韋日前投詩有薛濤箋倩莫愁藏之句自注云詩箋每爲  
傭者所竊因囑姬人什襲之今日獨坐江風怒號聞屋瓦霰  
雪聲有觸呵手答此以調之

獨坐蕭齋閉兩睛北門老韋入吾情案頭詩句推不去瓦上雪珠  
撒有聲憶聳吟肩貪寫什定寒纖手屢呼卿一箋秘惜非天道歲



盡冬殘春自生

伯韋昨一日兩過僕先後投詩五章僕亦再留之飲酒伯韋頗盡歡也乃成此總答詩意兼謝其眷厚衰鄙

韓子胸中著酒壺把盞豪情古灌夫屈人之兵加四座百杯以外乃可俘韓子手中把兩筆善畫能詩王摩詰偶過飯顆山頭翁短句長篇破袖出妙處尤在半酣後似風病漢不可救市兒爭喚醉先生巧估前持贗鼎售擡頭忽見雪在山怪雪未曾到人間一笑回家亟磨墨高吟激烈響刀環秦失其鹿天下逐今秦失鹿由迫促削公兩眉手畫字口不敢言示以目嘆指莽莽此乾坤儘許鯁生遣歌哭擲筆提句到城南一日再來坐我屋我酒味薄詩格卑塊壘難消媿瓊玉頗聞如願在子家寄語小心事韓爺多藏名酷



待高興匣裏花箋勤買加醉到模糊時最好顛狂狼籍看塗雅

伯韋有感於斷髮示一絕頗及於僕聊復酬和

春風吹亦不成妍

原本昔人離意

滿眼牛山意惘然攬鏡飛蓬驚劫

火感君懷我白雲顛

伯韋昨者代買紅綠梅二盆復以自家供養之水仙分贈一本位置玩賞感而賦之卽以呈謝

老夫經亂喪其偶寂寞年深坐衰朽已傷歷劫生非時不死又看禍來陡自省皮囊何所用天地之間一芻狗爾來經史都懶讀一部華嚴日在手幻妄紛拏滿眼前何處須彌可離垢釋迦老子號慈悲廣大莊嚴空說口收心息慮倚南窗忽憶孤山姓林叟心情想亦與我同枯對梅花當作婦梅花雖好不笑言感此回頭看井



白我無孤山且無梅惘惘無聊尋我友頗思風雅學古人託買疏  
枝羅左右果然林下一二美來凍臉臙支映霜韭把鏡頻起頻照看  
冷性真堪陪老醜琴斷瑟壞久埋塵對此果能相慰否故人於我  
意何長自養水仙愛能剖分贈得伴冰心花羅韞凌波月照琇態  
度標格同不同強欲分別畏獅吼猛悟涪皤真解人一笑出門江  
上走冬晴日暖好追歡還望勤來對飲酒

酬伯韋疊和酒字韻之作

起衰手畢遭逢偶快刀來雕宰予朽竭蹶從之喘成箕駑馬長鳴  
太行陡頗思臂助呼阿雲傳書正欠黃耳狗要共仙人論丹訣力  
上懸崖急把手塵界迷茫可奈何亂風交吹眯眼垢巫峽猿啼愁  
煞人自古詩人累家口於今蜀道徧大園又見哀歌杜陵叟猛虎



之猛苛復苛沾襟一樣悲啼婦願偷靈藥上青天無奈兔兒守月  
白從知爲儒總長貧仍須抗希千載友便喜君似劉伯倫酒德之  
頌書座右幸不參商住一城交情衛八夜盤韭如何顛甚拜呼兄  
偏好不嫌石太醜祇恨有客無內賢何處歸謀有酒否相攜多在  
黃公壚醉裏情懷粗得剖鳴鷄盜狗盡公侯迂儒尙自辨玉琇詩來  
願有雖不成玉餓死甯復有人憐請聽晨鐘作鯨吼相期猛省縱清

狂坐放筆尖五岳走記否飲中有仙人雄辯高談五斗酒  
葉虹玉示五鳳二斷甄硯拓本並詩囑題蓋五鳳二年之闕  
文也

浮玉山下名詩人才筆開府清而新宰官身中好古者氈蠟徵文  
舊陶冶苔封漢壁隱篆勢剝剔殘餘五鳳二孝宣威德服南夷天



寵九苞年紀瑞斷甄落手洗龍蛇正似焦桐入蔡家硯質琴才各  
千古聲音文字兩咨嗟

僕剖分吾鄉風糕一團半贈伯韋半贈慎登別以柑子蘋果  
數枚貽伯韋小女伯韋三疊酒字韻爲謝詩中鄉思頗深感  
而依韻酬答

團團明月奇化偶馥馥桂花老不朽爲贈城北兩詩人斤運吳剛  
風勢陡瑤池仰望不見桃止見雲中吠仙狗擷取園果向人間蘋  
綠柑黃香滿手昨訪韓老談詩書名士從來面多垢最憐小女置  
膝前持以貽之笑開口今朝歡喜投報章韻鬪尖義頗傲叟極知  
再衰三已竭搏虎還思效馮婦波浪喧江沒金焦儼懸雙杵鳴深  
白嘗登北固最上頭到眼驚呼三奇友竹林鐘杳寺蒼蒼遠遠斜



陽青山右中冷之泉號第一黃流不染碧如韭烹茶遙望瘞鶴銘  
斷碑靈護蛟龍醜坡老風流想見之四大皆空得坐否狡獪佛印  
弄禪機畢竟胡盧何日刮遺留玉帶人愛惜黃幄補殘瑩若琇山  
川人物劇堪思句裏懷鄉聲似吼我近龍眠不得歸諷誦臨風慚  
欲走且問投味果何如鄉釀猶將謀臘酒

吾鄉陳臘酒  
最爲名釀

十二月十八日始大風雪伯韋四疊前韻投句勉強更和以

### 張六花之瑞

君追蘇髯作配偶戲拈強韻如拉朽一冬嘯傲倚晴窗雪壓屋山  
忽高陡寒儒望歲願多魚不願漢廷多功狗飛灑戰血洗河山誇  
詡男兒好身手何如瑞兆起歡呼玉宇眞看無一垢北門賢者不  
得志日日牢騷張吟口猛見盆裏數小松一夜化爲白頭叟撲面



紛紛柳絮飛想到王郎有妙婦詩情又覺汨汨來忍教墨磨硯成  
白索箋遙念交謫聲督和行嗟割席友老夫夜聞刮地風臂痛幾  
欲折其右也因連日寫詩多何以醫之熨葱韭曉起驚看已浩然  
破爛江山盡掩醜自疑眼病花滿空鴉影可辨鷗則否敲門僮喜  
韓爺書喜非魚傳逃冷剖回頭自訝鬚生冰閃閃纓鬢絡鈿琇如  
此嚴寒寂無聲虎豹虬龍猛不吼君縱高唱獨忘疲侍妾凍呵奴  
困走何妨一學揚子雲吃口能來白衣酒

酬伯韋五疊前韻之作

富貴暫耳貧亦偶有速朽者有不朽造化有權亦無權山立中流  
勿嫌陡悲哉貪夫忘其初空惱東門牽黃狗要識孟氏說丈夫乃  
是掀天揭地手世間何物是糝糠何物到眼是塵垢金石聲聞原



憲門橡栗歌傳同谷口傲睨恣睢著南華陶鑄堯舜漆園叟古之  
貧士意如何鬚眉甯遜黔婁婦慕君家世文章伯論交風誼存杵  
臼仰首向天咏孤雲青眼高歌矜勝友若論三益最多聞君堪爲  
史居圖右昨者贈我凌波仙根肥如蒜葉如韭衝寒似菊香似蘭  
肯伴支離老梅醜倘將花意比人情頗類君同馬走否冬寒雖嚴  
花自榮此理可爲貧者剖詩書華氣發文章星斗爛天山朗琇答  
君詩句細沉吟中有嬰兒作雷吼城南雪霽望城北街巷泥深妨  
吾走遣奴持往致殷懃可破牢愁可下酒

伯韋近日酬疊詩篇以強僕聖登見而以絕句二章來投諷  
耶嘲耶不可知也次韻報之

韓家舊德無雙士又見雲初風雅雄有客憑欄看雷雨誤將蚯蚓



指爲龍

紅葉題詩滿御溝  
娥眉寫恨那能休  
君看李廣惟貪醉  
射石何功怨不侯

和天適讀長慶集之作

老愛香山詩獨契  
謂無兩舉似天適  
子不言神已往歸  
讀以詩來語語背  
搔痒相視成一笑  
空谷答清響春花深  
徑迷蜂蝶結音賞  
寧知風雨冥龍吟  
江海廣唐虞淵明  
心稷契杜陵鞅白  
公飯老禪迹異情  
不爽微獨新樂府  
餘篇多慷慨民艱  
政闕失諷聞朝宁  
上纏綿忠友思語  
以約含讜外塵略  
似同中峻那可仰  
太息當時英公獨  
羣不黨未肯文艱  
深平易寫浩蕩國  
風二雅間定當邀  
聖獎遣憂何所寄  
琴酒意可想吁嗟  
天厄賢垂老珠失  
掌倘不近人情



豈非大奸罔風雅矜俊才崎嶇墮榛莽或者主性靈兒童許效倣  
梧櫂兩失之惜哉小者養相期華岳巔雲氣吞沆瀣出作近人月  
清光天地朗

伯韋贈其太夫人手製揚州麵餅盈一太盤簡謝

母住廿四橋記得明月好手出小團圓照人肝肺皎

謝再贈金鈴水仙

凌波復凌波風鈴舞龜鼉老漁倚竿笑塵鞿點塵多

綸士示風雪渡太湖沙河絕句

彌天風雪白沙河詩思愁潮可奈何未是花狂風自亂模糊畫稿  
笑人多

符曜今年三十初度槃老人有詩當時未能屬和歲暮興懷



亦喜聞明正來皖寄此長句以致倚杖之思

水仙清對掩書閒憶汝行年望故山三十春秋半花甲一雙鸞玉

兩人間

以暉侍姑里居農卿游學英倫海所以外國土風教不同意賢如

閔子言無間懷寫荆公髮益斑長半山有與舊德萊妻白首事慰情

且喜彩雲還

即事綸士和韻亦和綸士

一決銀河勢淼茫看郎牛背減清狂天孫呵手當機坐極目巫山

高雁行

吳少耕去年五十生辰里中知友愛其人投詩篇為壽者二

百餘茲來皖城玉山提學有詩頌禱僕亦自有難已者遂亦

和其介弟首唱原韻



松菊梅三稱寒友又傳石作米顛兄覺子清風兼衆美感予鳴雁  
寄遙聲奉觴祝壽追樽酒留客割鷄當鼎羹詎意昨宵長嘯閣八  
义好手遇飛卿

生卻無涯知有涯

莊謂無涯有

出言顛倒笑莊家誰明塵界風雲幻

足見知

古說壺中日月賒

豈非耶

雅頌詩篇山比壽鶴籌海屋歲

頻加惜君逃世將叢詬寡過遽瑗聖所嗟



眼

心

心

心

心

... 德來去白首事人... 山... 言... 知友愛其人... 米... 風... 知...



网舊聞齋調刁集卷第十四

桐城方守彝

清一齋題句

壯歲從人事叢猥中偷閒讀書搜求古籍顏其齋曰网舊聞  
蓋竊司馬氏之言也今歲齒且七十回頭惘惘了無所得登  
危求璞入險探龍而衣珠自失此日暮途窮之大可悲者矣  
老氏曰天得一以清地得一以寧僕乃納天於心化地爲身  
心清身寧最宜老人雖然身之寧否未能自操其柄心之清  
否夫誰可委抑使心果清也身亦不寧而寧遂置地之道而  
專取天之道改齋顏曰清一常日視之用以收拾末路焉其  
自喻而不可喻諸人者系之以詩



黃金曾把何人鑄般若經中忍辱仙六十九年流淼淼藏汗納垢  
大於天

下流濫漫柁宜收綠竹爲篙轉上流直到清湘玩湘水一箇明鏡  
一歸舟

塵路夢間拋客枕家園春老入風蘋尋思臨水一庵住負手清溪  
看戲鱗

騎鯨李白未荒唐世上兒童指作狂萬頃清波一輪月真宜歌嘯  
濯滄浪

禦寇御風真可人清冷天地養孤雲四方上下無心逐往古來今  
一笑存

黃雞亂唱風雨昏四面蛟龍擾水渾獨自倚欄看古井沉沉星斗



燦天文

丙辰正月二日姚慎思蕪湖來書枉寄見懷長篇次韻酬答  
閒看消長異暖冷天時略與人事竝野外老梅著花疏風韻能傲  
桃李靚自貯古春敵嚴寒風雪難欺泥難淨默參物理識其通勝  
以人者天難併腐儒枯坐有幽思欲說無朋口莫逞新年剖魚得  
君書大笑縱聲繞梁杏倘非歲除不得歸那可排盪詩思猛平時  
短句吝和章今惠長篇眞天幸潛窩別去懷賁初感君未竟從遠  
屏冷者回暖慰情多滿紙爪泥憶鴻影去冬一雪萬人歡尤喜我  
心囂入靜略無塵垢看江山止恐光明暫非永今朝盈室照瓊瑤  
方叔興來索鼓打定音高吟一讀一擊節喉出夜光圓不梗直覺歡  
笑聯一堂詎復憂危望四境鳩茲龍眠原非遠客感何多使人省



知君非必悵離鄉別有牢愁託醕酎尋梅曾否見梅花指日桃開  
共漁艇

過天適因得盡讀歲首十疊韻之作歸而和之

對雪看花餞殘臘焚香聽雨迓新年漸拋爐火消寒日喜近春江  
芳草天最憶衣冠追往事尙愁兵甲失高眠過君誦得瑤華什情  
似成連暗地遷

人日小醉得句再依前韻

塵甲輕彈六十九化機默赴又增年烏飛兔走尋無影草長鶯啼  
盼好天濁酒杯盤酣自醉羣兒金鼓擾人眠無嗔無喜緣何事留  
我寰間居未遷

天適酬和愈高亦因之引興三疊



渡江春意通梅柳暗送新年入舊年人日題詩追杜老卿雲擊壤  
憶堯天綠波漸許鳴兒暖紅旭初驚雀子眠新年自人始放晴伐木狂歌  
求我友商量幽谷可宜遷

讀淵如天適酬疊詩中揚雄篇有感

瓢飲顏回全陋巷何如生得子雲年法言著罷猶執戟綱目書之  
甯非天獨賴立文高後世最憐白酒欠酣眠盛名已致難甘寂此  
意未消國社遷

天適投示獨遊郊外疊韻詩因約同赴地藏庵訪慧明上人  
歸過聖登讀近作詩文即事成韻

盈懷詩意蒼葭子陶謝追尋忘歲年引手孤行繞春郭冥心幽思  
屬遙天招提有約來乘興佛法微聞歸熟眠過訪閉門陳正字論



文細處坐頻遷

和韻天適江上望彭澤有懷陶公之作

所思云在江南樹欲渡扁舟喚長年三笑人求蓮社友一籬神往  
菊花天長波渺渺愁如結古柳疏疏寒不眠共爾抗懷千載上眼  
前禹鼎幾番遷

前韻賦水仙花一首簡伯章

并叙

伯章爲予言水仙花產閩中某縣沙水地中初某氏子兄弟  
析家兄自占腴田以磽瘠犂确地授弟弟無怨也數年之間  
犂确地中忽生此花歲暮饑寒試攬取貨於市人愛其清妙  
特異競購之花乃歲益蕃購者歲益廣價亦因之益起利倍  
兄田數十且由天然省人費至今方滋未已也談罷客去奇



興忽生濡筆賦之

新年得意忘衰老  
仙子在房方穉年  
坐對神清深索句  
欣逢客到妙談天  
神奇物理心能會  
踴躍詩情夜不眠  
如此多聞勤掃徑  
還思卜宅就君遷

季野暫來雪樓忽去  
酒樓小集之後季野  
連投詩篇寥落情  
懷幾無以報和其萊  
字韻兼簡雪樓

悠悠天眷幾時回  
赤縣神州墮草萊  
春雨牢愁呼酒伴  
離騷哀怨舉杯來  
座中人物蕭蕭髮  
望裏詩情暗暗胎  
總是傷離復傷老  
更傷時難惜清才

和韻時涵催海棠詩

桃李驕春媚四郊  
倚欄獨自惱吟巢  
小園花樹關心事  
寒雨詩情



上筆梢秀語猶能奪山綠靈風便欲展雲旂連朝癡夢驚啼鳥細  
聽聲聲總帶嘲

次韻王冠石枉贈之作

閉門畏客略如禪鎮日詩篇對樂天自辦虛心靜師竹儼聞妙舌  
燦生蓮荒江寒雨春無色韋布高賓座有緣慙媿名章輸點綴蠹  
魚已老不能仙

季野以晒網名軒題句徵詩見及作此調之

裊裊琳瑯臥晒腹何如無絃虛張琴湖海浩浩魚曷曷斯人晒網  
是何心架上舊書手翻破伏几詩句流清音一軒風日無所用笑  
人運甓惜分陰去年江潭得數尾飽供一飯喜不禁卻恐鷗疑鷺  
猜忌漁家事業未宜今長日遲遲簷寂寂巢居幻想妙相侵簪笄



挂竿驚鳥雀破雲滿地午陰森我聞向空起語雀何曾真網水沾  
淋撐腸文字苦作怪傲睨意寄高人襟莫冀餘鯉縱爾啄嚶鳴正  
好在高林回思不用棄去可一曬吾欲窺其深銀鱗味美蔬盤闕  
寒網顧盼殆難任要覓先生索杯酌仍將踪跡水邊尋所怨有軒  
無網在徒使我輩嘔肝吟

季野和詩意高韻遠相感於微前韻再答

未覺山泉鳴澗玉已聞松籟送瑤琴蕭寥天地夜未旦誰能省識  
焦桐心起舞匪關功名念感時甯藉荒村音惡木成林聚雅雀漁  
舟一葉繫其陰雅喧雀笑意態足鷓蚌之利暗相禁我相漁父類  
彭澤無絃無網古與今無網妙作有網想有網不使橫江侵負歸  
卻向白日裏當窗掩映寶書森可晒無魚不飽飯遑問新熟葛巾



淋作詩勸令窮且忍細語曲折開吾襟讀書愈多愈無用正似遙  
望青梅林箕斗星高虛名耳酒香漿美壑自深頗念高軒名字網  
觀魚杜老笑難任君今一掃虛實盡正好浩蕩相追尋我有真魚  
長尺半不須舉網但邀吟

風雨海棠戲和伯章一律聖登見之題絕句依韻報答

洗花風雨醒詩魂一片斜曛水墨痕寫出披離情戀主隨波桃李  
悄無言

海棠巢迎予看風雨海棠會有所感酒闌人散歸而託興錄

示時涵

意遙花近且端詳霄漢樓邊貴女郎醞釀雲霞嗟妙質葳蕤珠翠  
欲輕狂塌來風雨三千界惱亂金釵十二行泥濘已深顏色改酣



餘一笑縱吟長

時簡君幹供白碧桃二盆於欄前賦一律

縞素花枝到眼明春星點點挂弓檠

園匠曲花之勢

胭脂洗盡雲容

淡柳絮飛纔月魄生蜂蝶不來嫌太冷鬢霜相對覺彌清多情兒女欄前供起向梅花借鶴聲

簷風忽下白碧桃花紛然曬地沾衣笑成一絕

三月如何小雪飛手揩老眼認天機龍鍾惹得花枝笑更遣微霜點我衣

雪樓將隨統部馬公軍幕赴金陵置酒登樓賦詩留別交情

世難縱橫杯酒之間深語奇懷感慨杜陵之叟依韻送行

吟毫繞離思撥觸浩無窮垂老論交日斯人君子風迷離看塵界



歌哭盡杯中鄭重臨江別心隨鞞鼓東

前韻再送之反復重言略本風人之旨也

酒闌人欲散惆悵意何窮黯黯河梁恨絲絲楊柳風我居江郭上  
君在古人中別後情何似林嚶日向東

雪樓索予影相題句贈之

面有萬絲胸無一物煙雲過影非虛非實持贈親交屋梁明月

奉懷乙盦先生上海託興代簡

彌天劫火又灰飛四望關河草樹微仲蔚一家蓬欲臺東陵五色  
地甯肥珠光映海宜多淚芝秀思山未可歸搔首興懷無一語壽  
昌南極夢依稀

寄懷子翔上海



不接斯人近二年幾時海照兩華顛別來酒興增多少想見詩篇  
遠播傳狡獪獼猴翻奕局哀憐鴻雁叫桑田愁眉高竝終南嶺安  
得相將一壑專

去年冬遊潯陽甘棠湖有所題詠吳君鏡天見於聖登几上  
歸而和之語重匪所當也鏡天於杜韓蘇黃詩用功頗有歲  
月出示諸作沉靜清邃駸駸乎入於古勉酬枉篇慨焉申感  
韓公蘇子各騰驤杜老黃涪細舉觴領取清風渙春水豁如曉日  
爛扶桑頗聞寒蟄勤修汲會看炎天快晚涼合沓高名等閒耳前  
賢事屬後來狂

甘棠湖裏喚漁舟曾學漁謳搔白頭豈料冷風送餘韻得邀清賞  
出常流陳年綠綺蛛封錦往事滄波蜃幻樓惆悵高山又流水對



君慙感望千秋

月前與徐君律昀議集貲印行鐵華詩適弢庵自皖北來亟  
欲弔鐵華之墓乃置酒大觀亭邀集二君暨諸徒友抵暮而  
散律昀有句次韻

若爲四望赴愁眸感舊哀時會一樓宿草露零和淚注大園雲重  
黯春遊尊前太息談遺稟世亂何如化古邱交誼竹林今昔在悲  
吟酬答坐扶頭

伯韋失去湘妃竹子煙袋以爲多年舊物患難相依情見於  
諷咏猶不能已乃強僕和

星移物換事年年急轉風輪天地旋無限塞翁談得失誰從釋子  
證因緣相依烽火秦淮岸頻夢潛痕湘竹煙爭似故人從閣去冥



冥鴻影落水絃

寄懷敬庵黔縣

江闊山重望不及  
懷人心逐白雲飛  
幾行雁影無來響  
獨自龍鐘對落暉  
南岫豆苗鋤帶月  
北堂萱草綵垂衣  
遙知樂事消憂患  
寡過尋思媿絕韋

奉懷蒿叟先生寶應先生去年冬於寄伯韋書內垂問衰劣  
又囑伯韋寫去唱和詩久闕修狀遂以代簡

蕭條江上居  
緬想國中老  
躡屣臨洪波  
照此顏鬢槁  
鬢槁匪所驚  
所驚洪波淼  
隱隱盼高山  
蒼然矗雲表  
中函太古雪  
常與峯月皎  
欲往不得前  
遺音感飛鳥  
蜷局仰止懷  
踽踽白頭矯  
長蛟太欺人  
陰森盤深窞  
腥風四面吹  
醜類長牙爪  
白日無精光  
頻疑眸失瞭



草樹受披靡生意漸覺少虎躩狼復嘯鬼物鬧昏曉中流萬斛船  
板蕩憂心悄西來雷雨聲轟騰若可掃靈龜惆悵言爭奈城狐狡  
吁嗟綱維絕誰續千丈綬縱使老蛟遯遍地皆潢潦造化大衰歇  
神禹甯再兆奠定不可期淚灑春花標東南幾黃髮人間留國寶  
拭眼望淮濱喃喃致私禱會當浮小艇拜瞻顏色好

季野出先德霽卿先生白雲歸岫圖卷子屬題卷內先生自  
賦十絕句鄉先輩姚伯昂徐詠之馬元白吳蝠山光栗原方

鶴泉六先生有題咏

往微如太古展卷心慨然龍眠畫圖間丰采當時賢白雲有時出  
碧山依舊旋既雨春事了抱石巖姿妍時哉星日麗繡壤山河全  
人歸竹萬籟繞屋蒼蒼煙清歌引樵牧羣鶴鳴蹠躡神遊百年上



幽恨來綿綿

簡鏡天

密雨冥冥至莓苔暗暗添溼雲雷力重積水浪花顛坐憶耽詩友  
高吟枉贈篇意長何以報惆悵美人絃

端午追和雪樓金陵寄懷長句時雪樓已返皖然猶將有行  
也對節物而有比興之託亦無聊之極思歟

午日烹鱗不厭鯉喜公佳節棹還停採蒲野水矜雄劍縛艾威風  
閃大星世事都將如此看醉人極好不須醒多情惆悵金陵句愁  
絕風吹水上萍

次韻張基生枉贈之作

閒閒十畝自耕桑可抗前人田子方城市偶來作遊戲詩篇引興



日增長深慙青眼雲亭酒錯誤朱絃江上堂識字未能音未解論  
交且喜許年忘

通伯寄示方水崖先生隸書東坡和陶詩先伯父儀衛方拳  
莊朱歌堂光栗園吳蝠山馬元伯六先生題詩卷子屬繫以  
篇

水崖先生明遺民尙友柴桑采菊人長公和陶詩作隸矯矯鸞鶴  
翔天羣桂林子孫重手澤天意未許一家珍江山屢經劫火改寶  
墨流入抱潤軒五月江城江水大時有輕寒潤長夏賁初居士喜  
臨池用作安心禪課假故人忽枉鯉魚書致此要予題卷罅擱筆  
拂几抽玉籤十丈橫雲落氎藉雲裏閃灼刺昏花星宿列行明露  
夜聯翩文字亦何精百年老輩鄉耆英風烈儀型傳勝國讚歎往



迹垂詩聲究中先德元白公及我伯父儀衛翁手畢爛若照絹素  
精靈往矣望昭融應得分藏兩家寶并州快剪行清風

燕巢

雙燕何勞苦呢喃子細聽擇棲情慘淡呼伴語丁寧帶雨啣泥重  
斜風觸戶扇巢成相與慰對刷紫毛翎

乳燕

生機眞浩蕩乳燕見墻窩簾影雙雙剪檐光札札梭水邊尋食遠  
火急覺慈多哺憶烏能反毛豐汝若何

伯韋索句贈六言二絕

家住孝子坊邊人是竹西舊客突兀當世之豪四壁碑殘石泐  
呼酒青蓮狂態睨客叔夜蓬頭灑遍山河水墨中有人第一流



髭參透木樨香

皖上中秋後一日得慎思蕪湖七月既望偕同人泛舟長句

有書敦和

橫鶴黃州去不留眼前幾輩又千秋名詩姚合吟當賦載酒鳩茲

客入舟白髮

勉謂仲

中流江似練紅欄簫管水明樓

蕪湖有陶塘

從

來風月無今古昨夜樨香我夢遊

同日讀仲勉和慎思句依韻簡仲勉

風襟塵垢埽無留正似明蟾新入秋灑落遠蹤蘇學士扶攜同棹

木蘭舟昨攀桂樹中宵月獨立蓬萊

皖城古稱

最上樓天碧江黃露華

白老仙孤嘯有神遊

落葉五首和天閔韻



落葉辭高柯  
陰日漸薄  
古今幾騷人  
傷秋各有作  
寂寞寫幽思  
抽蠶剝寒籜  
昨聽嘒黃鸝  
今歎飛烏鵲  
悅意曾幾時  
忍使心作惡  
悵恨來無端  
英懷付牢落

打階時復響  
苔缺補破綠  
意故驚我聞  
兼欲怵我目  
旅客感行路  
居士愁仰屋  
陰陽何苦催  
寒暑相角觸  
去矣功忌成  
等觀高岸谷  
青黃無所擇  
毅然隨風狂  
金谷與窮巷  
一時惜珠揚  
高楓冷江岸  
柔柳謝針窗  
賢愚老少人  
同撫夜來床

離枝無戀情  
爽去不嫌遽  
物理識時變  
甯作兒女絮  
長嘯杜陵詩  
無邊看處處  
且喜秀峯多  
邀君著屐去

山樵踏落葉  
泛然馬耳風  
歌唱秋林下  
如行風花中  
荷擔得得歸  
呼之耳若聾  
無情無限好  
悟我樂無窮



十四卷  
季野中秋登校樓看月越日和慎思詩遂有蒼茫客意自登樓之句題於後

飛雲過鳥任誰留冬去春回夏忽秋細數良宵七十度如乘急峽一孤舟高歌客意蒼茫句默想吟懷涼夜樓妄欲回頭年再少力尋樂處伴君遊

十月六日伯韋淵如季野聖登鏡天天閱見過遂邀往時涵宅看菊次韻酬鏡天並呈諸君時連遭期功之戚未免餘音淒楚有不能自禁者耳

此是淵明籬下花清貧對爾酒情賒南窗日暖羲皇夢白杜風高巾帶斜千載古人思抗友一時大雅接名家詩來值我傷心日淚雨蒼苔草不芽



寫懷一首題時涵呈看菊詩後紙

可笑看花眼已花悲端偏與老爭賒紛如黃葉風庭滿愁對朱絃  
霜鬢斜逝水無情衰柳岸殘陽餘照野人家一籬且喜多佳色祝  
汝年年護綠芽

槃君以予七十生日寄句寫懷和答兼訂後約用發一笑

老我橫流世枯枝無復春夢榮華髮弟永感白頭人風雨孤尊酒  
河山萬丈塵眼前何所悅鷗潔色如銀  
去者了無跡餘生尙自浮慰懷來好句隨運弄虛舟擬結機雲駕  
便同莊惠游相期百歲外攜手出常流

時涵於任家坡賃宅內編籬種菊菊盛開其旁西府海棠乃  
亦於老枝敗葉間疏疏著花而菊中麒麟角一種獨未放諸



弢庵自六安來邀至涵宅看菊承贈雨前茶又辱名句兩皆  
吾好次韻兩謝之

昨來鐙鼎動泉聲一盞霜毫澈底清得解歲時懷友渴竟雄談辯  
屈人兵欣然酒椀招嘉會作者詩篇舊盛名把手莫嗟蒼狗幻看  
花寫句遣離情

江干晚步

江頭負手看潮痕惆悵空江不可論無語白鷗閒掠水如花紅樹  
遠圍村笑迎返照生顏色情與遙山作弟兄忽憶談詩多勝友沿  
門行到北城根

寄懷子誼長沙追謝箋毫前贈

天寒木葉洞庭波去較歸時意若何桐雨竹風孤坐裏湘煙楚岫



遠懷多摩挲班管移駒影把玩冰箋佇雁過默想殷勤知憶我呼  
雲憑寄一聲歌

伯韋蓄梅四盆分二盆見贈媵以長篇媿未能和成一律報  
謝

一二畫還君得二梅心慙高士落塵埃一童已擅無雙譽四皓何堪  
分半來得意支離伴枯槩輸君珠玉莖寒灰略能晒日拈衣蝨待  
報肥多花似罍

附一絕句

寫罷新詩覓酒盃天寒呵手一徘徊碧梧盡換黃金葉可惜鸞凰  
不肯來

七十歲生日後縱筆三首



采薇歌動歲陽回老驥槽頭千里哀五夜青燈呼劍起一天黃葉  
挾風來孤斟濁酒深杯杓醉擁高愁擻斗魁世未太平書欠讀甯  
容大壑便生堆

錯磨逼仄苦低徊白日青天安在哉忽自欠身觸河漢洗來顏色  
似嬰孩龍行誰布蒼生雨蠖伏當聞淵默雷俯仰吾生聊一放披  
襟肆兀又崔嵬

呂望鷹陽天有命孔融虎步地多窮可憐寂寞千秋事坐老沉冥  
一輩雄遠嶺梅花來驛使寒香春色點飛蓬籬邊更映黃金菊鼓  
興狂歌氣似虹

以箋紙一百片贈伯韋戲題絕句於上

老來最愛白家詩也愛東坡風趣辭君是東坡我非白妒君斷取



百根髭

有感而作

說有江樓五月梅吹從玉笛落塵埃此聲端爲靈均起時節疑當  
笠飯來搔首問天天道遠招魂歸國國人哀作詩略比清商奏迷  
望瀟湘雲水隈

酬表弟蘇毅叔見和回字韻

故山望爾首頻回各擁平生一段哀坐送春花秋月去幾番電影  
雨聲來深言長話遙遙夢佳句名篇的的魁敝帚千金且如此悲  
歡寫盡遂成堆

酬季野枉過投見和回字韻

消沈哲匠不曾回寂寞乾坤付一哀獨坐寒齋心事落忽聞空谷



足音來笑開懷寶投荆壁喜向山田收芋菱得意老農充一飽嘯  
歌聲入白雲堆

次韻岐生見懷

孤城憑望一長嗟衰柳寒楓凋歲華斗覺駸駸添老態相思默默  
到山家新營堂小宜鋪瓦夜讀燈深應有花詩句傳來情款款清  
光隨月滿江涯

槃君寄和回字韻並爲予訂句作此報之

蒼江無復萬牛回山谷吟高意自哀今有雙龍埋獄久化爲二鳥  
入詩來情違夜話牀連兩人比梅花寒占魁愛我商量千古事遙  
知剪燭燼成堆

田魯儒大令枉過手一册子語僕曰吾鄉老儒段蔗安先生



年八十餘矣有秋林習隱圖徵題願子賦之

獨抱遺經一老儒  
淮山淮水結幽居  
踰垣高節淵源在  
入畫孤懷披覽餘  
叢桂秋風吹杖履  
幅巾山澤問樵漁  
無心去作非熊夢  
滿眼寒巖木葉疏

後有感而作

寰天神武震蠶叢  
憔悴鋤奸慰此衷  
憑仗寶刀寄肝膽  
蕭疏大樹見英雄  
嗚呼魔衆佛愁大  
畢竟芝亡野棘豐  
我有無私一滴淚  
不妨未得識元公

東坡有未識魯公空此生之句

天閔枉過寫示歲暮書懷一律感題其後

往哲消沈又到予  
幽吟便作著立書  
筆毛禿盡愁仍廣  
酒量增高歲逼除  
水渴魚龍甘寂寞  
野空鴉雀欲何如  
桃花春卸菊秋落  
冰



雪寒梅笑續渠

深夜孤誦忽伯韋投大醉短篇走筆戲成次韻

風聲怒號欺懦儒酒索牀頭空有壺君從何處得大醉得非偷竊  
憑刁狐夜半高歌神恂恍忽驚明月墮吾廬又來狡獪弄詩句急  
絳肝肺呼千夫

偶吟

忽有奇懷下筆神電明雷響落冠巾滿聽颯颯千山雨正是盈盈  
萬象春詩到大家通造化人能傳誦必清真幾多作者爭風雅苦  
望橫鯨釣海綸

讀罷槃君詩卷題句

君詩吟誦動精神霧卷昏花獨見真騷屑清風噓可凜淋浪村酒



醉含春未妨襟抱狂兼狷苦恨艱難夜未晨一卷凌寒亭上句時  
聞風雨響高筠

十一月二十三日同姪時晉祭謁太乙山莊

白頭兒子壯年孫出郭趨山到墓門默喚爺娘碑下拜繞看松柏  
翠猶屯天雲不動巖風息酒氣微香簋饌溫總是蒼顏終古隔萬  
端愁恨滿乾坤

雪樓畫蘭一本一葉遠垂下著一怪石傍石題詩寄祝彝七  
十生日蕭疏蘊藉賞對怡情次韻謝之

怪石大一拳幽蔭芳蘭葉醜與我相如花因君許擷高意托空山  
望望邈愁絕黑雲欲垂天寒風凜作雪老眼忽生明寫出兩心潔  
歡來狂距石曲作猫銜蝶



伯韋設饌期槃君往看所藏碑拓遂亦及僕適大雪嚴寒辭

不赴次其見招詩韻

身似漁童敲後針一鈎拳曲苦寒侵陳年裘老難溫體小火爐深

且慰心曳杖神遊千仞上

君昨為作畫巖巖

題封墨濕數行音未能

把盞看碑去風雪江天龍正吟

凌寒亭大硯歌硯為文衡山舊物刻有玉蘭堂二篆里人自

土中鋤出者

大硯四百年撫摩一慨然曾追故主避黃泉愁見滄海變桑田桑田有歌者鬚眉一古賢手攬龍蛇作大字低昂鱗角行蜿蜒作罷挂屋壁精采映山川大硯奮身起似有平生緣本是玉蘭堂上物丹青隱隱生雲煙中有銀鈎與鐵畫恍惚芒吐秋毫顛歌者一大



笑吟肩聳兩山磨墨揮雷雨寶氣騰星躔得意訂石交妙契傳不  
傳攜來句我作長歌永以千載付深鐫

又以四言贊之

古硯龐龐蒼山秋江翳維椽筆濡墨成瀧千金市冷尺壁誰雙青  
青萬竹熒熒一釭玉蘭沈影凌寒聞堊古人如接風雨一窗可以  
永年共老幽磴

丙辰嘉平十日之夜江山積雪明月中天挑鐙題劉石遺寒  
燈課讀圖記蓋石遺述母德也

積雪山河明青天懸夜月舉帷立寒堦大千皎可咄上有千丈寒  
羣宿稍稍暱獨見長庚星劍芒光四出下有無數冰閃閃凹兼凸  
幾多僵龍蛇庭樹落拗折興來還入房撥火恣披閱窗紙透清暉



白晝眞一律快讀劉侯記字字響金鐵微諷又縱聲中情搖瑟瑟  
嗟哉母也慈惻惻孤兒劣送兒曉就傅望兒倚日映伴兒一燈青  
教兒書衣揭經傳古文字章句聽音節兒勤餉兒果兒惰搥兒帕  
喜兒爲加餐笑顏生百纈怒兒徑登牀擁被語嗚咽一母一兒子  
相濡以淚血想當三冬時呵凍煖相慰庭院堆寒鹽雞聲和講說  
陰陽催寸莖百尺纔一瞥兒今已老大頗聞豎脊骨巖巖文與行  
高視俯一切收名滿東南合轍望聖哲洵無忝所生子道得主臬  
萱凋衣綫殘回首爲兒日洒涕晝短檠漆室照白髮抱書睨餅餌  
永永依母膝兒成自母恩母今指不齧悠悠視蒼天何以解明發  
嗟哉孝子情感我難盡述夜深月西墮風吹四墻雪忽憶昔山居  
從母困顛越天寒衣裳溼爲兒燒檜楸



謝歧生贈小盆石菖蒲

并叙

旬日之前歧生遣贈小盆石菖蒲蓋其里之隱者王老人所蓄其法緣三寸拳曲之沙石植蒲隨其勢之所至顛趾之間蔚然葱蒨望之幾疑爲山陰之茂林修竹也王老人平生不娶業紙札以自給一弟爲人傭耕獨居幽谷敞廬小院櫃藏名人字畫三五軸案頭置古書數卷院多四時嘉植偶於其間作畫有清逸之致蓄菖蒲至數百本墻隅石隙羅列層疊各有佳趣予弟槃君一日至樅陽訪李君光燭光燭爲槃君言老人遂親至其室歸而爲予言如此

拳石不盈握種蒲成碧山頗同君眼青來此對衰顏短短綠玉鞭亦作蟄龍蟠嘉苗叢美蔭翠蔚垂風鬢曉潤一瓢水雨過泉潺潺



持之置吾前揭開一吟誦蛟珠跳寒氎連讀八九首窗風寒兩肩  
淒緊欲掩卷似聞澗咽泉惻惻苦相感兩眼涵潺湲挑鐙整襟帽  
縱聲得終篇終篇三嘆息忽覺神爲妍斯人雖玩世刻鑑嚴自閑  
辛苦種樹木一旦生風煙幾經羊腸路快哉登青天揮斥雲霞裏  
毛骨皆神仙細思何緣得心清志氣專而我尙凡近攬勵羞霜顛  
除夜禱司命增我如君年此計甚奇秘秘之勿浪傳

蜀開縣李範之過訪袖出詩篇囑和

對君思尙書涵淚欲注頰吁嗟曾幾時揚塵又桑海神龍化爲魚  
浪高風未退愁蹙失常容兩眉相觸礙伏想在天靈痛哭冠履代  
久聞大臣孫瀟洒蠲瑣碎太尉清白風綿傳不危殆鳥爲覆巢飛  
仰天有長慨昨辱枉敝廬禮數荷寬貸衰殘偷視息蠖伏蟄含塊



忽接風雅雄氣欲振聾廢黃鐘親瓦缶貶損將母乃詩道源風騷  
平生殊憤憤美人捧心顰效者增形猥青蓮高不羣貞志原无悔  
千載嗣盛名純羹美鄉菜定復日百篇酣恣斗酒對快棄榮利塲  
從容椒蘭珮環顧近世情去昔千萬倍追念尙書時到眼甯得再  
卓立橫波中應自有人在願君振大雅風力迴坤載吟嘯本性情  
含珠舒蚌采流韻滿東南新聲續舊愛

時以安慶遺缺知府過鄂中丞嚴公以安慶未克復留公居  
幕中因得朝夕親接風采後公官至兩江總督範之公孫也

### 歲暮寄懷槃君

來似春風入我簾枯枝寒草回青尖去似高山隱明月延望不見  
塵生匳人生最患年歲暮秋禾已熟來腰鎌一割何由得再續誰  
念同氣藏其銛君住山城我江水天教兩地著兩髯百里何曾殊



萬里笑語隔聲睇妨瞻明日除舊換新歲多年臘酒不同酣兒有  
 未歸女多去衰情止覺勞馳函人事如此念皆苦畢竟吟詩味差  
 甘寫句聊當椒花頌屈指兩日齒同添祝世太平會合易興來有  
 作不須謙



溫

州

印



网舊聞齋調刁集卷第十五

丁巳仲春一夕

天閔見過告天津之行袖出詩卷示僕又留

桐城方守彝

贈句知好不常聚世難年衰寂寥無窮之感成句贈別

爲君起舞商聲放颯颯寒江帶雨黃掩戶詩篇嚼冰雪照人星月下天光眼前大地橫流遠心念孤征細夢長竹色蕭疏梧老秃可憐無鳳伴朝陽

二月二十日集三數知友餞天閔於長嘯閣寒春細雨難勝折柳之情濁酒深杯再作臨歧之句

一尊斟酌賢人酒共醉江天風雨時聚散浮雲等閒爾清盈潭水正如斯白駒空谷嗟今夕青眼高歌送所知我有河梁無限意播



爲春柳萬千枝

敬題江陰諸生趙君彝鼎殉節記

慨乎詩旣亡遂有春秋作憂世先聖人急如火自灼大義括微言  
是非凜然皦因之生人心不死藉大藥鳴鳳聲消沈嗥狼臭郛廓  
玄黃顛莫正烏兔墮誰託責任到儒生望望懷抱惡奮身塞潰河  
舍命支崩嶠藐茲寧可救拚壓拚漂泊耿衷起長虹兩曜光同躍  
其照徹九幽羣鬼應轟卻縱彼大厲狂要爲神明薄其餘流浪輩  
夜氣發慙忤盛陰存一陽天心復可索吁嗟乎趙君生值天日落  
一死當春秋大義振鈴鐸清清冬日波荒荒古城郭巋然三賢祠  
風雨舊丹艧求仁在明倫英靈同許諾當時一片聲市人與鴉雀  
鴉雀噪晚風一震聞天鶴題詩丁巳年待聖起刪削



贈毅叔表弟二首久別欣逢兼賀續絃新喜

浪遊吳越歸來日把手逢迎一笑親今昔萬端悲恨事山川百里  
望思人塵琴且喜朱絃理榴火正同華燭新歸去明年報生子辦  
將詩句寫麒麟

惡札勞頻索戒詩忽復吟止緣離思切未忍拒君深惆悵雲帆起  
徘徊蘿院陰林曦映白髮寂寂聽鳴禽

天閔得子乃喪其嘉偶詩以慰解之

合是才高天忌之慰君惆悵不成辭莊盆歌放非眞達錦瑟詩裁  
若許悲邁世名流古如此庸人厚福較何爲於今卻聽皇皇泣火  
色鳶肩已有兒

予既去杭州王漱巖追送以長句次韻卻寄方予之在杭也



漱巖出其近詩手彙見示因知六潭先生歸道山遊興爲之

頓減

越山黯淡傷遊日老輩凋零漸欲無千里相尋話塵海一身將槁

笑枯株斜風細雨詩橫草

王半山字如斜風細雨

清聖濁賢客濡須繾綣又

緘雙鯉句相思飛夢繞西湖

到金陵柳翼謀邀遊秦淮遂飲於問柳歸皖郤寄

曳杖孤遊復此回白門繞郭看山來幾多舊館叢荒草相對高人  
話劫灰到耳哀絃又悲管放懷繫艇且深杯黑髯頻入歸來夢社  
櫟婆娑幸不才

得天閱天津書並近作長句一首依韻寄懷

凋零萬木剩秋清猶夢青楓送遠行僮報打門來驛使南飛歸雁



響雲鳴宵深落月梁間滿曉起數峯江上橫披札臨風展吟句愁  
潮高湧浪花生

槃君自里赴申將爲七姪迎新婦過皖於重九日置酒長嘯  
閣集宗虞二婿及子姪諸孫陪侍明日槃君行

提攜綠鬢酒家樓並坐華顛炯照秋爲趁菊花重九節同消塵海  
萬千愁蟹筐黃滿醪香烈烏柏紅飛霜氣流正是時艱盼鳴鳳清  
聲采翮看君收

竹西舊客投簡云九月中齋中綠萼忽放一枝矜喜相告繫  
詩督和噫習俗移人賢者不免爭時獻媚之事乃見於傲冰  
雪之老梅此騷人所最感而傷也次韻調之

當令著花吾貴之未宜便捷巧爭時嶺梅忽失平生素籬菊相逢



一笑奇忍待歲寒表高格能招孤賞寫清詩竹西舊客鐵作骨好在孤芳還要遲

叔節送眷屬南歸仍赴北京賦五言一首送之

七十幸未死再值君南旋握手相慰問霜髭照華顛各道眠食好

更稱腰脚便因之憶仲兄仲實前亦南兩度晤今年神全道氣腴

關山走老賢天心有將護君家尤拳拳仲兄議新學嚴正兼妙圓

君亦偶及之冷語聽粲然袖出詩與文手彙紛存刪到眼亟披誦

且復置他端纂言及紀事妙以少見全林疏列岫朗清峻玩秋山

悲哉天欲喪零落柳配韓走亦嘗學詩衰醜不成妍反復新製作

似魚遊廣淵輕風行水面渙然生淪漣何曾費噓力汪洋歎萬千

人間老作手屈指誰堪先掩卷更問法頗蒙情相憐為講古人詩



拈花示妙禪惜哉墮昏沈兩失魚與筌回頭見驥子雍容拜吾前  
乳母抱幼至的若荷上蓮長者吾相之童齒慄威顏幼者得摩頂  
老夫有奇緣一笑道往日交君髮初編愛君讀書聲九皋鶴聞天  
畢竟不尋常四海大名專得交不朽人歲月如許寬頻分頻會合  
賞及身後傳生兒又若此能不喜成顛明日君行矣獨我榻坐穿  
滄桑復滄桑凋盡頭上玄看棊劫未了惆悵爛柯仙枰空子且盡  
君行其慎旃舉杯發長嘯蒼茫九州煙

丁巳八月二十三日查嶺返棹過樅陽遂訪光燭於湖居一  
宿旋皖愛其湖山勝境遺世高踪賦詩寄之

山水美如此避世隱人豪久聞曾未至結想繫心牢扁舟忽乘興  
頓慰三年勞修篁參雲雨濃碧寒蕭蕭坡陁轉曲逕緩步上林梢



夏然驚鳥起門扣幽人巢逢迎一大笑置身爾何高向來肯摩頂  
今乃吝拔毛靈區養肥遜計兼身名逃案頭蓄古卷得意授兒曹  
壁上幾幅字寂寞平生交稻香山田得柳鮮竹竿操布蔬經籍外  
市鬩心無罣樂哉良有以祇恐仁者嘲茶罷急登覽後嶺躡松濤  
闢畦竹籬小礙路秋茅驕巖風吹我立峰壑羣相招平湖展明鏡  
文綺散輕綃綠楊紅蓼國村落隱漁舸茲邱水一方古木蔭榮條  
月來照良夜雪至圍瓊瑤秋清春華秀雨霽雲霞遙經營數弓拓  
收覽萬象肴嘯歌恣偃蹇天與人境超暫來疑仙化久住眞松喬  
安得託比鄰容我聯昏朝擺脫聞見垢往來清虛邀略分衣食計  
賣魚買村醪時時一二髯者舉杯話寂寥沈酣延歲齒鼓腹待生堯  
畫家遇高士一幅丹青描流轉百代下慕此兩條條茲意見許否



歸來心搖搖風雨幾番橫  
江海無限潮作詩亟問訊  
兼以申久要傳之周家  
漢鳴榔助謳謠

阮公懷白伊蘭來書索詩賦寄

與君阻絕萬餘里水遠山長  
夢寐遙榆塞聲名騰道路  
尺書親切問漁樵逢迎申浦  
迷兵火感慨宗周賦稷苗  
屈指歲華相望老彌天風雨  
總瀟瀟

江頭憂患度年光浩蕩橫流  
正未央吟咏總嫌傷世事  
掃除近已斷篇章書來欵曲  
深相迫筆下躊躇負所望  
雷雨方屯須健者高天雲雁  
繫情長

喜季野病起來皖

人間多健者矯捷過於猴  
獨子身纏病庸醫藥浪投  
秋清餐漸進



神淡菊仍愁果有道消長從茲罷閤修

江上愁相憶幽居興不揚傳來詩更好暗喜病無妨天相終歸哲

足音遽欲狂斯人美如玉茅屋有寒芒

仲勉慎思二君主蕪湖女校有年今年九月校中菊花開時

有宿蘭亦亭亭破萼異事徵祥造物之意蓋有所表也讀慎

思蘭菊齊芳長篇題其後以申咏歎

籬菊灑灑黃金羞庭蘭馥馥風吹幽鳩茲江上忘春秋霜清日暖

兩同秀階除喜動祥光浮二老風流恰堪擬一堂弟子薰殊美風

歌窈窕憶周家俯仰謳吟對物華

爲孫君聞源題里中中學校愛景亭

古之豪傑致不朽一樣崢嶸好身手可憐成敗爭幾時美好方誇



忽衰醜如何無限蟲沙人浪送奔駒懶回首雷霆雨露天辛勤辜  
負青春是花柳化萍委地欠堅牢寂寞林空鳥不語相彼楸楠松  
柏姿爭長風煙甯肯苟歲月無差造化同不才孰與成才久孫君  
築亭愛景名有心磨切鄉黨友一堂俊傑劇驚人一日千里期抖  
擻文章經術火待傳濟世成名事儘有走也感激亦悲歌櫪上鳴  
嘶奈老何願把一繩繫兩曜追隨吾黨挽蹉跎

贈唐汝梅題其詩卷

之子詩才澈底清挑鐙往復到雞鳴力追風雅情何切正賴窮愁  
意不平天地兵戈誰好士江湖漁釣有知名相逢且道高吟好日  
和蕭蕭落葉聲

戲呈季野



常遇江湖上敲金帶繫猴衣冠作人弄泉幣滿囊投一笑心開悟

三餐眉放愁止期能狡獪汲綆不須修

偶病猶逢歉春慵簸不揚否傾能得泰憂重實多妨術者說眞瞽

信之愚且狂一陽君識取轉眼見春芳

寫意呈季野時讀其近日詩卷

靜者心多妙君詩獨得之披吟怡永日掩卷有餘思雲壑聽鳴澗

村醪對故知忘言成一笑寫句幾拈髭

亂頭麤服老骨裏不清奇時露乞兒相頻遭道者嗤澤深龍養氣

松古鶴多姿往哲邈難接斯人喜可師

得梅花小硯甚舊題句贈宗外孫白華

何處山中雲不藏過溪含雨落前岡化成處土梅花石中有外孫



齋白香

得乙盦先生海上書遠寄長句命必和之敬步原韻

枯心正似久枯木伴入寒松意更寒倚枕滄江流夢遠沈雲哀雁  
繫書難詩來苦作離騷讀恨起微聞古井瀾昨接仲容問眠食幾  
回搔首仰天看

戲答毅叔

枉君頻疊寄詩篇想對如賓興浩然舉案已甘疏食美佑香彌覺  
古懷添閒看花影侵雲鬢時起吟聲繞玉鈿猶有情懷到江上衰  
翁得句也能妍

讀李範之雨中偕張易吾遊西湖雜詩興會感觸洒然成篇  
題其後



高駕乘黃鶴逍遙萬里遊不然御風行亦可八極周惜哉兩未能  
摧頽老此都李侯眞健者發興向名區不藉風與鶴破雨恣冥搜  
登巘泛廣澤雙鳥挾韓儔瀟瀟滿天地矯矯聯龍螭巖蘿石蘚間  
泥迹仿鴻留交逵斷輿擔臥草無馬牛大邦佳麗地都被寂寥收  
一笑適所適憑欄觴酒樓聽山泉響高萬壑赴爭流采水蓴葉溼  
一儉明繁漚白雲戀紅寺長堤縻低邱鈴沈鐘磬杳樹重枝葉柔  
玉女忽開鏡晃漾朗一州頃刻閉蘭房群兒嬉鼓桴陰陽幻明滅  
喧動兼靜幽奇情動奇賞較比尋常優樂極忘言說黯黯清思抽  
浩瀚入文字造化相獻酬吟成句法健蘇白遜其迺景物爭附託  
勇赴硯池投山神拱手待湖仙低顏求幾處丈六身隱入兔毫頭  
金光照我讀失我凡夫愁有聲橫江東宵籟搖房櫺神思自超舉



儼然老氏龍乃左招黃鶴更右引清風清風颯然至黃鶴下蒼穹  
騎鶴馭風起雲翼導南鴻越州古城外南北兩高峰中涵西子湖  
下散浮屠宮鏗鐘扣立寂卓塔鑽虛空圖畫入顧盼點綴妙玲瓏  
或亭圍漪綠或洞吐霞紅或大潭月上或宵井龍獅或溪聲清冷  
或竹徑深叢梅花或雪似楊柳或煙籠遺鼎或沈嶺穹橋或偃弓  
仙靈所弢隱佛像所磨礱玄湫之法雨跑虎之神通華厦之新鬼  
敗屋之詩翁謂白蘇祠處士之荒冢名姝之舊封靈潮憶王烈古廟  
表臣忠輕艇縱所往園林亦多容一一動忻感處處與遭逢恍然  
似昔遊驚疑破夢融夢醒風鶴滅起證名篇中但未沾溼耳餘皆  
符所蹤開卷復開卷吟玩味無窮最是雲棲寺昔侍先人筇追維  
淚潛落情略與君同洗心禮蓮池靜對篆煙濃



元帝各請...

孫氏繼...

飲

文

遂百...

與...

知

命...

知...

知

世...

通

不...

識...



网舊聞齋調刁集卷第十六

桐城方守彝

次韻答慎思蕪湖見寄

積雨孤城雅雀靜滿聞兵動向誰何起看白髮白難數持較愁雲  
愁孰多洞裏秦人成暴客水邊虎跡亂橫波與君何處同茅屋醉  
倚青松弄碧蘿

叔節子誼聞江上有警偕歸至皖叔節爲雨阻子誼眷屬在  
湘岳州兵梗難進賦此兩慰之

兵戈南國兩髯歸雨雪從橫春意微亟宰黃鷄餐遠客起斟綠酒  
遣寒威艱難波路瀟湘夢切近家山兒女睇天意人情兩相戾白  
頭且喜暫無違



戊午正月十三日敬庵徵君至皖明日陪登舊文昌宮之魁

星閣又明日徵君歸黔歸後寄句咏登閣事感觸興懷賦二律奉答一次本韻一追次前年寄懷秋字韻

鄭重時艱把手年危欄同倚早春天山連故楚橫愁黛城落翔烏

語古闡劇時楚地亦戒嚴方往迹寒餘蒼翠柏愴懷人感後先賢同吳

宮於伯閣前宣統初沈柏方伯會植就立存古學堂延黟縣老儒程抑

均齋先後謝其人間事沈公流寓海濱衰且老矣生雲霄星斗今無色星魁

舉文昌罷同其祀且宿毀棄科高閣詩書裏舊氈詩書相親近且倡議廢

文經典以冊說束置話高閣矣教育高

斜陽淡淡晚風樓我似殘冬君亦秋自恨無聞空老去得瞻高蹈

羨良謀皋比大布諸生擁郡徽師範學徒開講學會請臨校主席人徵

羨良謀皋比大布諸生擁郡徽師範學徒開講學會請臨校主席人徵



菽水班衣愛日稠別後雲山青隔斷望思又白幾分頭

孝深夫婦今歲花朝前後同屆五十生日吾年七十有二矣  
舉鐵畫雙幹古松松間一鶴石上一鹿與明月松間照清泉  
石上流鐵字楹聯付孫及曾孫懸之海棠巢用佐盤觴旣以  
誌歡兼以自慶二律寫意

鶴壽不知紀鹿門偕隱賢孕芝浮紫氣張蓋偃青天我取後凋意  
汝添無盡年清泉成聖飲明月好同圓

風和鱗甲動領起百花春掩映海棠色招來風雅人自然生古意  
於以健精神相對忘塵世松間石上身

早起讀雪樓答胡敬庵徵君長句次韻

潮來誰把玉琯弓倒去狂瀾一挽東眼裏臥龍顛有雪袖中文虎



嘯生風揮毫落紙蛟蛇走橫槩賦詩旌旆雄遙想山人剖雙鯉高  
吟正對萬花紅

與葵文久別去冬來皖相見歲闌多人事未盡所懷次韻除

夕贈句

別緒長於江水長年華隙馬費追亡我衰君亦容添老世亂身無  
邱可藏入夜玄雲鳴怪鳥何時赤日上扶桑相逢未倒盈尊酒黯  
黯情懷結曲腸

清明獨遊東郭遂過三畝園訪主人戴君

清明時節出東門迤邐孤雲向遠村徑草滋泥經夜雨林花含睇  
待朝暎芳塋一叟春同繡新柳多姿風與婚信步野園無主在藤

絲卉葉自偏翻

過一新園茅屋竹籬寂寂無人詢  
農父始知淵如之弟所結構



半分欲雨半分晴  
半苦兵戈半太平  
偷取寬閒眺佳節  
謬爲老健攬春榮  
青回草木枯全失  
白守顛鬚立不生  
安也順天乘造化  
眼前生意浩盈盈

不入城中有戴逵  
斯人近在水邊籬  
經年未到疏攜手  
今日相尋喜上眉  
抱甕淡忘朝市換  
賣花薄免婦孺饑  
高懷動我成詩句  
傳與人間意可師

東郊紀遊一首送金梅僧北行兼起居其尊人子善先生是日同遊者湯葆明吳鏡天鄧季宣及從子孝澈  
彼美老醜成隊伍  
襟帶揚風吹笑語  
眼看腳踏皆春光  
手攬未曾得幾許  
歸來索句一字無  
困臥藤牀夢栩栩  
迷離倦態不自知  
醒回已是明朝午  
坐思昨遊良極樂  
清景佳辰又勝侶  
天地瘡痍野

十六卷



酬程綏儒寄題清明獨遊東郊過三畝園訪園主人戴君之

作

往歲徐菽孖主政往來江上每道綏儒文行優美客遊踪迹  
意契至深風采如接椒翁下世後音塵遂闊邈不相聞昨者  
槃君來書備述綏儒歸隱里社吟嘯往還時復眷情衰朽近  
見彝詩咏戴君行迹欣然有合抑尤愴然有感焉枉題二律  
囑槃君寄彝彝驚喜諷誦往復俯仰三十年間耆舊云亡世  
變大以菽翁忠孝之懷使及見近世情事蓋不知悲憤若何  
夫世濁乃見行清橫風旋塵蚯蟻皆含飛動之勢乃有率其  
布素之常託生事於抱甕絕迹城市若將終焉如戴君者以  
視擁厚藏坐高明而猶次盜攫恣睢夜行急進者何若耶昔龐



士元性好人倫每所稱述多過其才時人怪而問之答曰天  
下大亂雅道陵遲善人少惡人多方欲興風俗長道業不美  
其譚即聲名不足慕企不足慕企而爲善者少矣竊慕其用  
心不意綏儒之默有契也異感中生盛懷宜報率然成句  
望裏家山隔老成江花江草幾枯榮卅年風采聞耆舊四戰中原  
有變更騎省墓門嗟拱木洛濱世德話歸耕親交蒼莽兼身世惆  
悵開函見姓名

銀鯉傳詩出大江驚開霧眼看臨窗浪傳託興春郊句異獲如聞  
空谷楚五色東陵甯有邵一家南峴詎無龐俯瀾縱唱遙山應流  
落人間聲與雙

章素五自龍眠來訪示六十自壽一律次韻



廿六卷  
五  
兵火殘生把手初久聞抱膝老吟廬人間方夢王侯蟻國外環窺  
狡獪狙一片山雲閒欵戶四墻蘿葉靜耽書逢迎各遣蒼顏霽散  
去千憂不復餘

早喧文譽抗肩吾晚坐龍眠映美鬚歷落晨星相看老典型前輩  
漸疑無壽身合禮光明佛昌後知符陰德於奉此祝翁邀一笑願  
陪杖履閱榮枯

贈桂林李梅庵用弓字韻

使君心地拓千弓朗若扶桑日上東到處隨車行好雨論交傾蓋  
接英風玉溪詩句三唐秀鐵幹梅花百豔雄見說輕裝滿明月可  
能常遣醉顏紅

次韻天閔見懷



一片飛花惱煞人  
沾衣點髮故頻頻  
書中古蠹伴成老  
絃上蒼鴻送盡春  
解佩不逢當日鄭  
思苓空賦國風秦  
離懷入句能多少  
且瀝渾醪下葛巾

張易吾投示夜字韻長篇李範之投示疊字淺字春字垂字古近體諸作作者五人二君日前由迎江寺金剛般若波羅蜜經講座歸集飲賦詩約諸客詩成送予閱因題句諸作者後呈張李

山居愛白雲水居愛帆影  
一昔移葢茅舉目喪前境  
迷者惱其常悟者意各騁  
帆影自飄瀾白雲自橫嶺  
匪關居者情愛悅渠不肯  
性各從所適貴能順其等  
取捨兩埽除圓喉咽脫梗  
大哉天地寬鸞和鶴清警  
露蟬涼霜蟋應機赴時景  
考擊登明堂漁樵唱箕穎



廿六卷  
穀別宮商聲陰陽適天秉爛然繁會中玄兮藏妙靜一視而兼聽  
忘言欣默領奉質張長公更就藥師請金剛得勝意般若內照炳  
酒食文字禪應云一概屏

毅叔至皖彝出湯貞愍詩畫卷乞題詠洒墨悲涼情韻清亮  
呈次韻一首

經年不見愁心積喜報詩人載筆來急檢篋珍瑩碧血渴求囊句  
寫餘哀摩挲翰藻甯非妄慘淡河山且欲灰不笑癡翁癡絕處濡  
毫染墨費徘徊

五月十四日迎江寺僧饌小集和壁上東坡詩韻簡座上諸  
君

隔江雲斷山成畫滿院桐高枝拂椽作客郡城知悶甚憑欄寶地



與陶然老仙有句揩睛看古佛無言曲臂眠座上幾翁幾年少放  
懷談笑各生妍

五月十七日積雨小霽追隨槃君江上散步遂登木簾觀水  
勢槃君有詩次韻

凋零雁影不成橫鬢挂繁霜相向明分手年光驚隔歲傷心時事  
訪衰兄奈何愁緒邀臨水如此江流好洗兵莫便乘桴東入海三  
山更有黑雲生

同槃君韻題範之江亭餞別圖江亭者即舊京之陶然亭蓋  
已往之事也其外舅喬公茂萱題字引首喬公下世範之撫  
遺墨益珍貴之

披圖情惘惘回首事如烟寶墨常精好典型遂邈然迷離分手處



吟望入愁邊風雨江干夕題詩相與憐

喜天迺來皖即送歸蕪湖

榛莽塞天地三年未見君夢多隨逝水老去戀餘曠夜火鐙花喜

晨簷雀啁聞衣裳一顛倒愁緒散如雲  
握手成雙笑庭梧風葉飛高辭驚妙句名理印禪機作計強尋樂  
暫親旋悵違蒼茫一杯酒無限入秋晞

次韻範之示句

黃花照白髮秋氣澈霜根落葉埋行徑瓣香禮世尊馬塵一吹息  
雁木兩難言諷誦清詩罷爐邊酒正溫

唐人寫經卷子爲男時簡題

吁嗟遠役金城陽滿志歸來篋有藏懿茲經卷寫自唐土花不蝕



蓮生光石室啟幽曜敦煌縞紵臨歧慰徬徨威護關山風雨長恭  
敬供養持心香白頭濡墨爛題行一笑東籬菊色黃

九月天閔聞母病歸自天津遂遭喪又殤幼子蕭條四壁子  
然不可久留取其客中詩冊讀之題句兼送北行

懷納秋天高聲流河漢朗哀角與清商一片沙潮響  
我有江海淚對君不能揮河梁一惆悵雪滿鬢邊絲

手錄鄭巢經先生送潘遵義公南歸序紀載行義甚高慨焉

感慕既寄季野得其枉謝二絕句依韻酬之

窗外群林脫落盡焚香掃地靜鈔書無端望古生憂思有病欲除  
不可除

高詠堅貧君太劬思君有夢幻華胥一年老瘦苦無計塗七百鴉



換兩璣

鄭序凡七  
百餘字

叔節來書言年內不歸相見當在暑中並索近詩之得意者

賦寄四絕句

梧桐秃盡竹披離寒雪千山動遠思  
啟戶看泥鴻杳杳惱人最是蠟梅枝

自蓄玉壺一片冰待除渴病解煩蒸  
南歸莫破陶潛夢柳樹蕭疏人曲肱

眼前正是雪如花難寫物華比范家  
多謝仲言苦相憶向來嗟賞已曾差

半年孤鶴不成眠老去無聲得到天  
倘有心情題野老不妨一寄浣花篇



往歲遊金陵龍盤里訪魏默深先生故居庭廡荒老而高竹  
數千竿尙復響清風而韻苔徑徘徊佇盼有遺輝之思近聞  
孝深買地於彼當相近也得句寄之

曾尋魏野當年宅寒碧瀟瀟竹滿欄此地一灣好流水待看分筭  
長琅玕

全椒薛丈慰農先生之薛廬亦在龍盤里 先大夫嘗撰杖  
經過 先德昔賢慕思感觸再成短章

太守休官此結廬四時文酒盛簪裾當年賓客先公長一帶林皋  
屢響餘

慎思枉過自云久不作詩矣乃於坐間寫示新成五言律一  
章今日又接到逆旅留贈七言律一章時艱發憤枯腸亦鳴



次韻和寄

詩腸一決勢成滔撲我鬚眉白鶴毛已覺髯如靈運美兼來句比  
杜陵高途窮痛哭誰非阮天下英雄竟憶曹敗瓦排鱗風雨屋一  
窰苦竄嘆新陶

昭君咏

羞把黃金買漢家獨留青冢照胡沙羣山萬壑荆門路望斷春風  
騷客車

讀槃君詩題句

新詩到眼四十首首首沈吟細玩思擬上高崖逐明月清風坐聽  
古松枝



网舊聞齋調刁集卷第十七

桐城方守彝

己未正月人日答伯韋

老去詩心呼不起大似枯木辭春容韓子頻番投好句多情何啻

溫和風解凍成流通響澗伸勾出土著寒葱雖然生意有微動噓

拂未免勞天工去年臘盡歲闌日幾多貧客留城中聞北京旅館

候館之客數十萬各旅館青燈矮無燄憂心思婦吟草蟲八方屯

兵苛征歛荒荒郊野斷村春督索如狼逋似鼠有勒派軍費者有

業者竈寒香火祖寒供韓子館金豐蓄積一已獨樂忘人窮敗殘碑

版高價買刁遵瘞鶴一世空裝潢灑掃過除夕伯韋自備大冊子

手自剪裁粘帖子於冊其餘紙零揚縱橫可念也長魚大肉酒盈鍾

十一卷



嘯傲恣睢到新歲狂作風漢尋衰翁朝探懷篇暮送簡自誇風比  
大王雄牢舉舊事追新和人日酣矣興尤濃衰翁年衰甘寂寞兼  
復臂痛手長籠住近江頭習鷗鳥心灰去浪長年東詩好難絆奔  
駒日觸懷哀忿語不恭譏嘲刺罵了無益祇惹煩惱柴吾胸不如  
省事且甯已緘默還可安癡聾古云萬事不掛眼此意能養氣和  
冲養氣延年化社樑要看大地春融融韓子雄風莫浪用去吹萬  
朽榮繁叢腐言奉答無文采擲筆起繞梅花紅

槃君寄示元日同季野出北門登觀音崖看萬山冰雪之作

和韻

百二十里苦無徑不得追從助高興想見千丈危立時鸞嘯鶴鳴  
徹天聽我有冰雪一片心萬壑千峰腹內陳斗室光明自覺大照



取觀音崖上人

吾未得登崖因讀來詩而萬山水雪皎然  
吾心胸之間崖上遊人亦覺朗朗可見然

壽黟縣胡在乾先生七十敬庵徵君叔父也應先生嗣君朗

軒之請

徽國大賢鄉胡氏有儒者望鄉仰止中斯儒今代寡紫陽世已遙  
其人手幸把幼孤撫節母節行曾傳寫茹苦斷機絲訓廉封魚鮓  
近讀紀壽文先生實陶冶諸父本同父古訓凜然也先生行義敦  
三代步高踪淵源不尋常白眉生於馬勤劬呱呱初己子愛能捨  
安兄靈在天慰嫂淚自瀉從師與交友一一擇尤雅毓德追淵騫  
著文擬游夏坐看學行高聲名半天下先生願遂矣眉壽當祝嘏  
徵辭渡江來謗陋不容啞吁嗟俗偷薄人倫賤礫瓦淳行獨師古  
蓄德老在野餘美以此推咸足勵都社從來仁者壽天與不須假



遙想大年人坐繞山霞赭山黦之萬子姪聯雁行堂高華燭地舉爵

醜容顏扶鳩健腰髀芝玉悅性情孫曾弄嬌姪歲歲逢誕日親賓

合晉筭走亦當趨前恭祝不苟且直到大椿年獻頌墨揮灑

前韻和季野見寄

澹臺子羽行不徑只是無人發遊興先生倘邀踏雪泥或戒徑危

定不聽茲崖自經神禹奠久與天地俱同陳從此新奇刮目看端

賴二三風雅人

全椒金梅僧亦元日同季野槃君遊有詩槃君寫以寄余因

憶季野詩中有云傳神憑仗全椒筆更貌山陰訪戴人梅僧

固善畫也然僅畫同遊者而不著一未同遊者於其間是猶

滯於世間法未能超然於出世間者也有句再依韻寄梅僧



高崖蒼古苔繡徑雪泥更助飛鴻興玉山瑤島非塵間笑語應有  
羣仙聽大千潔白兆太平遠喚酣眠人姓陳喚起貌入金農筆能  
教丹青重後人

讀槃君寄七姪孝徹近詩欣然復和其徑字韻寄七姪

縱浪樵歌散山徑樵父甯能解比興我詩野俗正似之那堪聲入  
風人聽汝才確近賀季真吐言高雋一掃陳止欠鏡湖好明月華  
顛綠鬢照三人

和韻寄毅叔聞將客遊道經皖上

雨雪飄零泥滿徑佳句傳來動吟興思腸冷寂如水河俯首  
黃狐聽蘇仙瀟灑性情真最愛閉門索句陳已辦春醪與早韭恭

迎過客酌詩人

里中唱和諸作者皆親遊崖上惟予  
未往遊而吟故以閉門索句自擬



季野又見簡疊韻之作答其意

周道都成荒草徑閉日垂眉養孤興六合廣大有神遊萬籟清冷  
入心聽傲睨之人古意真好客妙趣大言陳我不挈提饑客去恐  
驚送酒白衣人

再和槃君寄示疊韻有感贈季野之作

春農子婦話野徑衰翁暗動芳郊興崖頭遊客飽寒姿句裏冰泉  
不斷聽畢竟寒姿賞誰真惡寒愛熱盡陳陳傳語寒深無久立相

期老健壓邦人

季野有寒風獨立向來情之  
句非體羸多病者所宜也

再和毅叔見懷

草色寒多不滿徑柳條未起迎風興幾時君度大龍山驢項鈴聲  
隱隱聽世上交情爭道真勿頸乃有張與陳低徊中表論昆弟各



是傷心無限人

槃君疊複前韻寄予並示七姪有感於新近才士之言詩也  
來書又云此番看雪和韻紛然急宜收兵結束因更和一章  
與來詩之意並贊唱之

朗朗清風明月徑明月照我尋芳興

喻

昭

昧

何人迷霧五里長一

杵鐘聲醒清聽

來

詩

看雪聯吟樂最真我亦忘老將成陳雪消泥

淨春光暖袖手閒遊是可人

題姚巨農江上雲山圖圖爲韓伯韋所作

五十年來江水上老盡須眉閱去浪江神念我能久居不逐利名  
肆奔放得邀恭敬致多情留此雲山作供養不然載入往來船載  
去螺鬢成悵望巨農作客遍四方使酒揮毫一世狂黃金擲了神



瀟灑青珉刻罷星光芒斯邈懾伏入筆硯墨花飛處風雨涼如此  
奇懷高世執應居華屋奴人王如何棲遲此江上偏與老朽爭山  
光我住城中偶一出散步江頭放閒逸山向我青分外多雲作態  
度資詩筆倚天排疊羅兒孫著絮林巒倏陰日得意興來寫高咏  
自分此生永相暱君今借屋徑臨江有樓更有西南窗奪我積年  
爽氣去浮樽嵐影翠搖眩淋漓大筆自書榜招來顛米狂一雙顛  
甚但知貪醉飽爲作圖書懸奔瀧此意殆作久估計氣力何止鼎  
能扛嗟吾衰矣便相讓君當感激言毋咙責謝不驚春江鴨更莫  
餽魚喚漁柳止辦清茗家製餅有時聽我足音登雲山與君皆老  
友相對啜餅斟茶缸

再和孝徹七姪



行出梅花橋邊徑李白招仙滿逸興太白詩徑出梅花橋雙溪可

招又有逸興也如看雪觀音崖要借高寒清視聽凡託興遊仙放

今騷不平惡世之混濁耳古絕俗襟懷果有真神奇能化萬古陳上

天生才苦不易丹成還在鍊丹人

酬程綏予用槃君徑字韻見寄往來詩篇皆由槃君轉致兼簡槃君

去年江頭印沙徑得識吟風弄月興別去龍眠悵望閒梅柳春江聲入聽垂老懷人情最真此情各抱未披陳黃耳傳書一破笑春風百里渡風人

章竹虛亦用徑字韻寄懷奉酬竹虛名其居曰屋裏青山與前輩詩人陳滌岑先生故居為鄰



入屋青山不由徑飛來發我髯翁興髯翁日坐青山頭吟聲還遣  
青山聽擬召畫工寫髯真兼寫髯鄰前輩陳挂我賁初軒裏壁瓣  
香今古兩詩人

和韻李範之游龍興寺瞻明太祖遺像

範之時權  
淮泗道尹

從容簿領耽遊咏聞此風流幾輩興古寺豪瞻火藻繡大雄舊是  
水雲僧真人天表威猶凜健筆神摩句欲騰豐沛帝鄉一淮水浪  
沙鳴岸若爲謦

興字韻唱和詩愈推愈遠離本事而別尋釁端勢且未已槃  
君書來要予解紛魯仲連久已高蹈不復與聞人間事姑答

槃君

大道本夷民好徑

老子語

行入紛歧倍多興崖頭景物盡拋荒伐木



他山屬垣聽從來傳遠總失真末流何處借箸陳還以三緘煩聖  
手無言燦爛是金人

慎思自鳩茲來出槃君元日登崖看雪詩及羣和與閱即據  
几立成和篇情韻深美疊韻酬之並寫寄槃君

蓬門春冷無花徑儘有求聲嚶鳥興掀帷迓坐黑髯翁一捲冰泉  
請翁聽槃君有冰底寒翁師杜陵詩味真新句雖短意具陳置之  
襟袖日三復同我士龍懷故人

鏡天和槃君詩有句云一老蕭間著勝處下得著字全首皆  
生姿媚昔人所謂似倩麻姑癢處搔者也此得字法於后山  
喜極疊酬並寄槃君

流傳歌嘯出崖徑江上勝流動詩興到眼冰底寒流春

槃君冰底  
寒流句



新時以爲

稱揚警句滿城聽吳子不婚全童真近與正字締朱陳

近君

山潛心后

妙著老槃於勝處羨君長爪得佳人

### 疊韻酬潘晉華見寄

春色媚人窈窕徑安得攜手乘春興二年不見聞負病消息時從  
旁人聽種花高咏養天真納氣常新不留陳能王神明能健句傳  
來傾倒江頭人

次韻晉華祝其卻病參學忘憂味道

臥病心情開妙慧

靜來入詩有思病之句

經冬物象轉多姿歷從冰雪幾

番後屹若金焦萬派支藥石由來成益友幻塵徹悟失憂思請君  
參透維摩詰香積厨中飯味滋

傷梅僧

并叙



梅僧吾故人全椒金子善先生長子承儒家世德趨庭聞訓  
顧視岸然涉足囂塵獨有高步雖在盛年具老成之風故所  
與交遊者皆一時清修君子善丹青近益究心文學遊情風  
雅之林比年隨父客燕薊寄家桐城母及妻子兄弟所在也  
體質敦健耐勤勞去冬父命南歸今二月間來皖與其友鄧  
季先寓地藏庵庵有旁院齋舍三楹修竹數千竿讀書其間  
翛然意得三過予笑談留飯絕未聞有所苦乃不相見者七  
八日耳忽十五之夕季先偕合肥湯葆民銅陵章立庵先後  
至言梅僧近六七日以腹痛醫治無驟效昨入美國醫院美  
醫視之稱病重爲之剖腹割腸竟不治而死矣驚惶駭愕不  
勝痛惜怨恨之情寫句傷之



斯人不合致如此小病何由若許深異族技甯同一聖擅外國地醫術

然未必人人皆造精微

垂堂義忽喪千金古人垂堂之戒其敬慎之於垂堂

者

故人有子賢兼長遭世多憂老更侵猛雨翻盆寒起粟衰年感

愴寫哀吟

寄槃君元日觀音崖看雪詩與敬庵徵君二疊三和興

甚高內感事一首雋朗清遠愛其辭不能通其旨酬句問之

草茅不鋤杜陵徑

反杜公草茅無徑欲鋤

斗酒捷得青蓮興三

疊暉暉白雪辭寄向冷風送遙聽雲護山顏看未真山中人兮為

我陳微詞寄意時不幸當世莫知況後人

送毅叔赴北京

向來難合易分離兼復時艱身際之更是白頭滿明鏡幾能紅燭



對清卮春花春草逢迎裏江柳江樓惆悵時長短話言都不說憑  
將愛護託微詞

京華不是舊京華此去正防感觸賒榮落四時紛笑涕迹蹄萬怪  
怒蓬麻斜陽宮闕依稀在故物尊彝聊復誇未識騷人意何似傳  
經且喜事非差

惜抱先生墨迹殘彙先生來孫立凡出示藏冊敬題  
何人解釋不傳傳

先生詩有昔人已  
與不傳亡之句

傷簡脫精神墨妙歎天全毫芒流落人間世薪火微茫桑海年故  
國名家有儒澤到今焦尾守青氈

惜抱先生墨迹殘彙季野題詩極爲高作乃復督僕久之無  
以應更來二絕句相迫因向立凡索觀墨迹冊子題句並次



韻答季野

釀蜜不成蜂力乏笑渠香抱沒多存唐人詩歸曷看清漢張雲錦

高手當機天帝孫

文章太僕字宗伯一手兼之妙莫雙欲識曹溪真髓在使心如鴨

暖春江

惜抱先生有太僕文章宗伯字也如得髓自曹溪之句

南豐劉伯遠官貴池日枉過惠贈長篇今年已解縣事久闕

酬答昨來督迫

苦覺對君難出手年來詩句老益醜垢聞穢見塞天光靈想清思  
墮淵黜兼逢敏捷謫仙人氣攝羣英況衰窆投我篇章手自書驚  
落長虹下南斗張之塵壁走龍蛇貓鼠狂奔竄雞狗邇來雷電頻  
窺搜時有大聲殷戶牖所施過分非所當曳尾泥龜甘縮首文采



如此談且雄枉過不與地上走嬉笑怒罵見古狂快我襟開風解  
紐吁嗟禹鼎淪橫流鬼怪神姦競抖擻吹腥轉地更滔天民盡爲  
魚密張笏捷又興高風淒淒大盜狂揮懸印肘子產爲政不尋常  
深念惠人獎聖口世有子產無聖人坐嘆三星魚在柳仰面玄穹  
祝畱年要看風培鵬力厚怒飛垂天雲氣寬廣作蒼霖潤枯朽詩  
文小道何足言獻此止當剪園菲

次韻張易吾休假示句

幻形生幻苦幻破本無愆鶴骨何妨瘦詩心自在圓方塘開水鑑  
深柳約廚煙香飯時當熟飽餐一味禪

謝伯遠贈景德窰茶碗霍山茶去年招遊貴池杏花村之小

杜祠祠乃在官日所修復也今年又邀遊匡廬匡廬固其鄉



之名勝雖皆未能往然稠疊盛誼中心藏之秋風窺林將戒

北征之駕兼以送別

我雖沉冥愧高鴻荷君揮絃注兩日我雖支離愧古松荷君張琴  
對蒼髡欲通情感迴雲翔眞覺神親作幹曲能教衰朽屏千憂無  
怪頌歌盈萬屋景德窰蒸茶具精霍山之茶舊盛名斧木作匣遠  
裝固充庭滿几昏花明連朝煩熱渴求飲煮泉鑿面蟹日生破封  
各取細點注團團明月桂青榮玉色浮動香霧溢四圍冰雪鬪旂  
鎗老賤坐思忝寵眷喉甘舌潤心慚驚匡君高蹈隱君子匡山年  
年夢寐裏邇來香火禮彌陀精舍白蓮尤可喜此情忽被君窺覷  
要我往探邱壑美宦迹昨繼杜牧之小杜祠荒親料理曾邀去賞  
古風流侯命殷勤未卽唯茲來陳說口瀾翻海人舟車鳥翼比蓮



花洞邊就筭輿牯牛嶺上安行李最是高處清涼多六月不熱風  
隨履看瀑尋僧聽山禽須眉五老頗不鄙正好放浪數日閒吞吐  
星辰未爲侈我謝君誼攬晴雲勝侶佳遊誰得擬顧念塵寰七十  
年塵垢深侵到骨髓偶借一雨滋根芽旋被八風損蓓蕾大好多  
山住不常雲龍霄鶴祇暫爾不如安心地獄中待佛來遊拔身起  
君且北上天津橋高張雲錦散霞綺攜手天孫話歸甯下看疲氓  
形盡毀亟乘機會布宏慈力轉生機傾運否功成拂袖追匡君皖  
口煎茶盞再洗便當提挈過虎溪十日遨遊君還里我從遠公伴  
閒居埽地焚香供瓶水懷我抱琴望碧松一曲泠泠鴻遠矣臨歧  
折柳致久要發君顛狂笑口弛

和韻易吾見示長律



雨灑庭蘿細咏詩名篇雅正是吾師簿書法律皆般若風采清襟  
照鬢眉浩劫塵沙須佛度平生憂樂使人思一身通介存常我儘  
有寬閒撚斷髭

謝義甯陳師曾寄扇扇畫竹書新詩用其法源寺餞春十七

韻

踉蹌海上初相見亂煙堆裏一峰現八年作別老江城渺渺離思  
腸內轉每從兒郎得消息矯首燕雲騁遐眷清風朗月想見之安  
得笑言接閒宴天下紛紛惱煞人住世不辭吾真倦頗憂西方無  
樂國更恐佛失光明殿長此顛風惡浪中一付蓬頭與垢面昨朝  
拭眼失昏花遊子歸裝挾冰霰名家書畫竝詩篇一段清涼爽衰  
賤希夷先生臥鍾山虎嘯龍吟圍聖彥奇翼又聽玄鶴鳴雲響疏



揚似小變濡毫磅礪太和碑古意泔泔生凹硯興高更寫千霄姿  
蔭我夢清無蟻戰得來歡喜便作狂大扇手搖屢斜燕節換驚看  
秋氣新牛女相迎今已餞索居偃仰誦君詩極日高天南雁便

答天閔

苦李蠮食餘仲子肯窺井恰似殘年翁莫浪風斤郢  
炎風吹劫火瀰漫兩無垠寂寞行歌地爲君語笑頻

寄霍山紅綠茶徽墨與師曾次其題鹿崖精舍容字韻

無復龍團繼往蹤邈來紅綠亦多容雨前時節芽如玉嶺上雲鬢  
秀比松諸山采茶多仕女香合麝煤煙馥馥潤生鳳尾露濃濃墨能助寫  
茶清思日費時辰應幾鐘

寄章石二乞師曾篆刻小印次其題鹿崖精舍寒字韻



窗外瀟瀟碧玉寒就涼移榻靜相看苦思君子悵遙路夢附高翰  
度遠巒泥賤願邀鴻與印弓強想見馬驕盤聞君篆刻亦千古甯

止吟詩不費安

師會篆刻矜惜不浪應人故意  
用昔人盤馬彎弓惜不發句意

讀興化李審言所撰死事游擊李君墓誌銘感賦二律題其

後 并叙

李游擊合肥人名世鴻字海珊以宣統甲午禦敵於蓋平縣  
之牽馬嶺又戰敵於蓋平縣之東門外陣亡失尸當其將赴  
敵也戒子善事大母無他言子寅賓寅恭哭抱衣冠返葬於  
鄉嗣寅恭從蒯觀察光典赴英倫遂留學西洋學成歸狀父  
烈求文當世有道己未之夏來皖過訪因得讀斯文寅恭字  
颺丞篤棊人也



幸餘天地在未覺日星臨文字一披罷哀歌三歎深何年牽馬嶺  
戰血化愁霖大作波濤勢東趨洗恨心

尸亦不須裹骨從爛作泥留言念衰母承志起賢兒無媿丈夫事  
所憐孝子思顛狂風滿地塵黯路多疑

送七姪孝徹赴聘池州師範校

過庭詩禮十年後滿腹琳瑯寶軸編定有文章立聲譽仍傳道業  
起行羶亂鴉成陣秋原大獨鶴如輪雪翅妍汝去池陽誦師說舌  
頭應出九華蓮

昨日中夜不寐獨起對月皓然空庭動懷天閱因有憾於十  
五之夕不與共醉成句送簡

爲邀天上清秋月照我嬋娟絕代人蘭桂繫腰誰解佩風騷在手



不堪貧判澆磊塊同尊酒忽走干將破路塵几席天涯成惘惘孤  
明霄魄坐相親

仲實赴北過皖留句爲別追少驚老惜別感物之情每吟誦

往復如不克勝違闊又旬日矣次韻寄懷

故舊各乖散詩書覺獨親日長頻掩卷庭靜邈懷人後學趨師表  
高流濯漢津少交老不進搔首怨秋蘋

閏秋二十日伯韋招往看秋海棠時海棠盛開從低松叢竹  
間望之風姿幽妙使人忘老歸成四絕句簡伯韋並簡同座  
範之易吾

秋陰偷得春陰意爲護韓家秋海棠最是斷碑殘碣裏相逢一笑

不荒涼

伯韋齋中四壁皆斷殘碑版



叢竹低松秀滿欄  
女兒結隊冒輕寒  
簪紅曳綠無言語  
生長貧家似怕官

揚州十里映珠簾  
獨愛梅花繞四簷  
舊客風流仍似舊  
貪看冷豔

媚秋奩

伯韋自號竹西舊客居揚州梅花書院甚久

一枝秃筆太無花  
欲寫妍姿語總差  
帶醉歸來滿牀夢  
遍身蝴蝶話南華

伯韋著海棠花於拳石間  
秋來嫋嫋亦有凌波態  
度含笑嫣然伯韋以予對之  
不能無情遂以移贈

不費珍珠得兩姝  
久爲名士守菖蒲  
自然風致無凡俗  
便作瓊奴伴老夫

再酬伯韋和韻之作



記乘春興臨春水楊柳桃花映野棠忽向秋光對秋豔舉杯惆悵  
裕衣涼

蕭齋小結一方欄抱甕澆花家自寒嬌態養成邀客看但能風雅  
不嫌官

小屋低窗不掛簾晚霞弄影倚風檐嫦娥有恨偏憐汝天上移來  
月作箇

柔腸九曲繞酸花風漢風流果不差傳語堦前小詩婢也撩衰朽

滿顛華

來簡有語固未工柔腸九曲之說又云  
瓶史秋海棠嬌有酸態鄭康成之侍兒

答伯韋

春風何必春時有但見花開春在中凡與不凡同卉耳高人彈指  
盡成空



奉懷乙盦先生代簡並爲蕭夫人轉致謝濟金書

一別紫芝曲三經紅樹秋望雲高結思臨水渺浮愁欲近忘言叟  
化爲自下鷗沉沉天不曉止作夢相求

夜犬吠羣盜潛蛟鼓太陰香冥叢桂樹淚溼一瑤琴風雨甘棠地  
山川白髮心杜陵哀寡婦三嘆寫幽吟

張使君易吾奉太夫人南遊西泠西上匡廬竹西舊客韓伯  
韋爲作畫圖守彝幸以贅疣歲月得見人倫美樂之事可謂  
今日之景星慶雲爲世祥瑞者矣成此短歌奉繫圖后

閱世七十年夢寐人如玉老益荷天慈欣然覲名德懿歟張使君  
政美由道力廷尉天下平此意幾人得使君來執法秋野生春色  
自行仁者心蘊藉見正直蒿日此哀矜安得使君千萬億使君風



流本儒雅居官常似居林下祿養已擬古賢人承歡自同菽水者  
潔蘭進甘旨繞膝性情真曾參善養志所以怡其親西冷攬取東  
南秀匡廬高納雲霞新使君奉母所到處以名山水資精神見說  
太夫人得意健腰脚湖船穿雨聲綺縠飛鳧掠不覺山徑危安步  
度巖嶠南北峰下白蘇隄鳩藤繡幃映玻璃九江彭蠡開曉鏡五  
老香鑪燒金猊南遊西上高年興千里扶持王母藜風月清華景  
物輾綵衣颺曳嬉嬰兒母心足真樂春暉長復寬江湖所經成福  
海指點皖山皆壽山山下村落不知數士農女婦繞如環慈孝化  
流被閨闈薰仁漸德紀無干坐看皖風扇和氣庶幾古治猶能還  
白首老民欣所遇作歌高唱滿江關更煩竹西丹青手爲畫萬本

傳人間



範之病中枉句問守彝臂痛次韻答謝

爲求極樂離諸苦妄想紛然媿佛香  
伸臂自陳當受棒此心頻動  
不如墻應官君以叢煩病何日我同民  
庶康起共衆生祝強健大  
盤甘露得分嘗

範之再韻敦和

詩人作吏偏宜病倚枕清吟燕寢香  
堪笑衰翁如落葉止和疏雨  
響空墻偶然臥閣人思黯懶到蓬頭  
性比康頗憶顧厨多美味俟  
能騎馬就君嘗

題潘晉華海棠菖蒲詩畫冊子

并序

焦桐布衣俊才磊落大志在抱遭際非時  
中年傷逝遂棲遲  
家巷抱甕事親喜蓄石菖蒲又絕愛秋海棠  
得異種四時皆



花石牀木架之間供養至數十盆每入山林輒以自隨一日  
太夫人笑而謂曰汝其以海棠爲妻菖蒲爲子蓋喜其篤愛  
足以移情也繪圖寫咏徵題風雅之杯己未九月來皖挾册  
出示亦以見督古傷心人別有懷抱厲情於物遐思邈然成  
長句繫於后

乖時作達具風流厲物忘機不自由載舸五湖西子少閉門三徑  
菊花秋英雄遯跡成高士卉草滋榮解故愁好與纏綿爲眷屬慈  
顏喜爾幻莊周

爲懷甯江潤臬題明人周如海天球手札墨迹册子如海手  
札似閣帖中文字書法師文衡山而時上規大令潤臬從人  
家故紙篋中拾出裝池珍愛徧徵題咏



放失遺文事可哀  
網羅收拾屬清才  
揮毫得意情千古  
能不前賢仗後來

己未十月二日大風晦冥  
易吾置酒招客僕畏風不敢出奉  
句陳謝

使君青眼照江天  
存問頻叨惜暮年  
文酒屢陪長夜飲  
風流傾倒大峨眉  
仙捲沙聲起迷城  
郭立海瀾高溼宿  
躔老氣不橫深閉  
戶敢求寬禮奉吟箋

槃君和予不赴飲詩適有幽感觸於懷依韻酬唱之  
與君各養抱中天  
神煞從渠獰值年  
道術逢時縱兒輩  
山林自我

作逋仙看來形影皆秦越  
仰笑星辰泥次躔  
搔首蕭蕭無限意  
未能傾瀉滿冰箋



次韻酬鄭覲侯

救時良吏未可歇歲寒要作不凋葉可憐小民今何如敲髓流膏  
枯剩骨生機正要春風扇詎可秋箱藏寶篋懿彼陶元山次白韋蘇  
仰止高山青幾疊皆以名宦作詩人仁似麒麟義比鵠我欲置君  
數公閒甯止名教時人讐走也怯敵老兵耳不能張強空帶鞢爲  
報青眼故人情率布吾真當手帖

覲侯再和亦再酬之

大雅得君振衰歇如我乃似好龍葉真龍何在意躊躕卻愛九皋  
收駿骨老媪未遇王右軍那得價高手中筭好我頗同歐說梅襲  
我新衣開篋疊君詩格老氣清迺丹嶂蒼松騫霜鵲啁啾百鳥滿  
昏林雲裏一聲羣飛讐所願大力開黃間政虎驅除指解鞞琴堂



花落詩興長到處絃歌民安帖

範之易吾再次箋字見投督和

門掩玄雲向晚天雪飛窮巷話堯年紅泥小火深孤酌白髮酣顏  
漸覺仙要遣詩歌傳後世爭齊日月朗高躔蜀江李杜居遊地時  
落寒芒上寶箋

二君皆蜀人

僕傷心人也自先人見背後益絕口不及生日二字每遇茲  
辰豫戒家庭一守平常冷淡不得相擾齋食自供或閉軒獨  
坐或孤遊野寺越日解齋家庭人守誠便覺懷抱清爽或不  
然則作惡數日範之不知從何處風聞下走日前生辰病假  
休沐之中遽以奇麗詩辭下祝高誼名篇惶懼不敢承當敬  
申下情於世好有道之前冀曲諒焉繫句陳謝



平生恨事多於水每遇生辰倍惘然嚴戒兒曹觴祝進清齋居士  
佛香前畏人知覺妨吾靜大句褒榮下語妍吐氣成虹當病起恐  
惶驚怖聳山肩

即事有感七十三歲生辰後五日得句

老眼模糊仰看天如何留滯復年年形骸期脫蠶窩繭山澤好尋  
麋迹躔修短蹠回千載恨混同道釋一城仙惡無妨礙善無補大  
笑成狂鴉滿箋

易吾京口三山紀遊詩後題句

羨君歲奉板輿游京口三山又放舟北固西來爭鼎足南徐東望  
豁臨眸丹陽鶴壽徵難老浮玉中冷坐久留慈母春秋不知紀楚  
吳名勝看全搜



訪伯韋不遇讀其案頭近作皆步僕箋字韻一笑題句案頭而去

韓家小屋大於天中走烏蟾照古年

壁 上 碑 板 皆 漢 魏 晉 齊 紀 年

四壁佛光迎

老禿

魏 造 像 極 多

一編詩句界人仙初驚放膽營新構旋笑拈毫依舊

躔顛漢不知何處去留鴉好博薛濤箋

靖侯將行賦詩留別亦賦詩送之

離緒黯難言一隔千百嶺頗欲從君去衰蹇不可騁驚電送流光  
攬鏡時自凜眇想成名人縮如鷄伏隼反覆誦清詩領悟忽若猛  
向來行徑微智井那可綆惜哉言笑乖吟情冷欲屏願勤寄江魚  
昏花儻一問

伯韋抱小星沉落之戚奉句慰唁



朝雲竟別坡翁去為念斯人奈此情逝水有聲如哽咽宵燈無燭

照孤清應追婺女生天界

傷伯韋先有

為摘匏瓜當酒觥醉對雙雛

誌姬氏流傳千載獲佳城

韋姬氏誌借用其字伯固金石名家也

覲侯自金陵寄示近作成短句奉懷

寒深江氣靜冬老嶺容高寂寞成孤坐情親入夢勞龍蟠動吟客

雁繫落聲翔照眼崢嶸句愁心一破牢

荒荒天滿眼滾滾地皆波何處容吾老吞聲向爾歌曲阿無直幹

槃澗欲牽蘿儻得遂深隱放言相對配

此間曲阿也言論多願忌每思君慷慨正言為之浮

一大白心境為  
之一數日清爽

天閔見過還僕點讀之香山集遂邀贈句欣然和之

懶散全無心向詩貪閒沙鳥淡忘飢世聲囂甚歲闌矣老境超然



書繞之曾費丹鉛成舊好重親白髮與情宜過門仙客經滄海滿袖間雲唱好辭

雲來詩有邵看滄海深境忽著開  
淡之謂白詩也竊以為得之

次韻周頌吾見示東坡生日集讌之作

冰雪江山無寸垢白頭清對鬪寒芒佛通眉照嬉三昧老拭眼花

展數行坡叟風流歸健筆阮公狂態在吟觴深慙衰病違陪侍收得明珠發興長

節孝胡母孫太夫人七十壽詩

層疊江外青雲臥高蹈士芳塵經歲隔悵望洪濤閱春風渡梅柳遠枉尺書至喜聞母壽高稀有古所瑞自云不肖人憂傷丁世季隱居自食貧顯榮負明義滄桑深變幻兵氣草木悸以茲謝賓朋未敢受賀饋閉門率孫子繞膝歡承志欲求賢達文恐煩筆墨累



先生抗清躅愛我獨深摯春暉托篇章好作邱園賁再拜受茲言  
撫己有心媿平生蕪陋辭難顯慈仁懿回思十載前侑觴辭學製  
猗歟巾國型大節達天陞旌門表冰蘖霜筠老翠蔚堂下白華絜  
儒行建高幟東魯聖人邦道德所憑寄朝廷重視之烹鮮擇良吏  
敬庵經術深黽勉勤民治政期修禮樂用源體道粹矯首望白雲  
老屋山城邃漆室不恤私勛兒君相誼無端陵谷遷遂急庭闈侍  
挂冠古有師躬耕事足貴潔蘭奉晨昏開館課童穉尊師鄉黨敬  
著書風雨晦以此悅慈顏舞衣不嫌敝懿哉賢母行稽古無同異  
菽水自甘香荆布垂蔭庇安貧率淡懷貌豐識心慰再當獻頌聲  
清歌敬舉觶峨峨黃嶽奇當戶日呈媚上有七十峯峯峯雲霞被  
雲中現濤海羣仙下游戲駕虬乘鳳凰繽紛馳瑤轡中有千年松



巖姿貞幽翠往往生龍鱗時時招鶴至龍潛不行雨鶴清鳴自恣  
下有珠沙泉其泉溫且泌能利世間人湛湛映紅寺澡身曝秋陽  
垢去登佛地凡此靈異境天然爲母置母節峰齊蠹母壽松與比  
母恩似泉深流潤多餘思海仙獻瓜棗松鶴大年致膝下隱葛洪  
能就丹沙事

溫州府



温州府志



温州府志

卷九



岡舊聞齋調刁集卷第十八

桐城方守彝

題範之蘭言偕隱圖

似聞蜀道亂如麻何處鹿門可挽車想見懷鄉話粉社須防臥轍  
擁村家紫芝歌裏期偕老彩筆圖成笑與誇作此商量良不惡春  
來夢入萬桃花

去年臘月十九日東坡生日範之易吾於高等廳廨懸像設  
供饌招客命酒賦詩枉及守彝適寒雨負疴未能趨命追呈  
拙句以誌闕然

東坡居士尚如生不負陰陽造化峻節雄文祇餘事清風朗月  
向來情家山入夢抗懷古香火逢辰照眼明無限滄桑遺韻在掩



關獨夢鶴高橫

範之易吾頻以優禮見待輒叙恐惶用申謝悃

德與功言無一立浪拋七十又三年兵戈劫裏橫流地家國哀來  
仰看天叨枉前騶驚里巷愧疏儒術對仁賢起拈白髮吟風什悵  
望猗猗綠竹妍

致謝伯韋招飲

瀟灑騎驢千歲孫扣門招我酒盈樽新年別有愁難破難遣衰顏  
一笑溫

漫申後約

君家几上梅花好豆子圓勻紅點枝請待開時辦一甕一顛一老  
對成泥



楊鑄秋枉過致春酒之約辭未能赴奉句陳謝

今年還在感天優當逐壺觴覓勝遊幸荷多情憐白髮相邀盡醉  
騁青眸春風且轉千林色人事偏生一腹愁自怪向衰失豪縱高  
齋華燭欠髡留

範之見示自題蘭言偕隱圖詩索和

桃源壯人世舉權去無難兼有同心美易爲容膝安野茅淒覆鵠  
雲路不翔鸞止恐憂隨遂山涯又水干

蓄水仙二盆一盆合植數本雪後春初正月剛半叢枝擁秀  
意態盈盈正當皓魄良宵白頭獨對彌爲神朗戲成一絕句  
酬水仙喜其能慰衰翁寂寥也

可笑孤山林處士梅花作偶太寒人妙顏春到溫如玉我有江妃



又洛神

月是陰精水性情嫦娥光彩月同明良宵喚起千江伴齊整仙容

敬老彭

喻華嚴經有一月千映千江之

總持南歸過訪三年之別相對欣然尋且北去垂衰感別撫  
時惘然得句在比賦之間奉投

風雨沉春縱復橫日搔白髮長愁情幾多入海隨鵬化獨自臨江  
釣鯉烹到眼斯人疑夢見破顏舊好動林嚶餘生相對知能幾不  
惜乖離望太平

寄阮公懷伊蘭

懷君不見意如何坐老江南白髮多貪酒爲增遙路夢闕書難免  
故人詞甘棠應展參天蔭佳句可無斫地歌邊政萬端詩萬首願



加餐衛養中和

敬庵寄戊午己未兩年詩卷讀竟題句次集中聽雨獨飲見  
寄原韻

新詩一卷百回讀廢寢亡餐慰暮年掀我髭髯長到地羨君瀟灑  
寫其天茅堂小築供吟望野色隨拈入畫禪夢上東岡繞渠水滿  
身煙雨也超然

來詩有萬山之句  
雨一詩人之句

近得雪樓書鞍馬風塵勞苦可念既返鳩茲僑舍行李可以  
稍安矣寄示詩二章亦索拙句方欲致慰問之懷遂次其儒  
字韻寄之

笑予自造閉門車就正常思訪老儒有恨明蟾孤舞影忽邀晨雀  
報來書客趨幕府衣塵重居近陶塘柳色舒且願拋忙尋一樂鶯



花三月好時初

雪樓近將琴布其家

先烈牧菴先生遺書取公私傳誌名

輩詩歌冠於前又從山陽魯通父先生集中見有文盛推吾

鄉前輩戴先生蓉洲紀載牧菴先生死事以為得實來書徵

求既發吾先人手訂戴先生遺稟鈔寄復次見示篇中寒字

韻奉簡

五色迷離不耐看要伸正氣稱心安巖巖先烈生天去滾滾橫流

蓋地寒碧血文章存稟本

戴公殉節二年戴先生亦以忠憤客死懷

遠

白頭蒐討廢眠餐眼中零落麒麟老一角崢嶸霄可干

冀平有句云萬壑松風一木魚此詩人以心造境之警句也

邇來清齋眞修冥觸神契遂取以作圖有心境相期之意焉



己未冬南歸過皖出圖卷囑題

何人妙丹青揮灑寫心想層巒深復深神遊縱孤往溪雲藏鶴鶴  
崖松化龍蟒天風起瀨濤大壑開閒敞飛塵到未能猛虎馴不獷  
眞宜出世人鉢魚停錫杖有客遊京華入夢神儻恍醒來黃梁熟  
萬事枕一仰破暄趨沉冥物外求供養探幽發興奇得句欣自賞  
時復置一笑綳嬰那脫繩忽然有所悟佛前大合掌默誦平生詩  
妙契觸其曩三匝繞大雄一心遺世網出語昔偶然今成搔背癢  
圖以當久要不教勝情枉庶幾了大事因果原非兩吾聞十二部  
字字生龍象續續木魚聲菩提日夜長清籟蒼山虛明月青林上  
會看光明殿崔巍壓秦莽徑登獅子座千衆來稽顙朝磬與宵鐘  
更添雲外響



送白華外孫赴德國留學

驟驥嘶風氣不羣怒飛鵬翼勢垂雲一方天地妨寬步萬里波濤  
壯遠勤記取庭闈占雀喜早憑身手搏龍文歸來定有十圍腹笑  
破衰顏霽縐紋

無錫高老愚先生承其先代大儒

忠憲公主靜之學安貧

履道藹然孝弟數十年貞白無染神明泰然沒而學者議私  
謚曰孝愨知先生者無閒言蓋古之潛光君子也二子文彬  
字仲均文海字涵叔趾美前修夙夜無忝兢兢焉懼先德之  
弗曜徵文四方枉及守葬其辭有足感人者傷狂花之飄蕩

望松柏於歲寒成五言詩一章

予生七十四閱世五十年少從先君子多接當時賢當時賢如何



異河同一源人倫正模楷禮樂嚴豆籩或宏濟物量或吐辭高妍  
魁奇與平實一以德爲先尤多韋布彥介石耿貞堅通經篤儒術  
儒行蟻趨羶先君旣下世世運嗟屢遷人隨風中葉一落浩無邊  
溯洄百哀集閉眼淚潛濺昨枉無錫書驚嘆回我虔亟亟讀家傳  
遂披議謚篇陳几十往復欲拜低華顛斯人古之人荒山芬蘭荃  
荒山多惡草幽芳獨充圓悅親怡兄弟安貧養蒙泉躬行厭文炳  
容慎口呐然常德起峻行賁育未許前止憑此誠耳寤寐盡其天  
懿哉老愚翁古道與今縣似我先君友儻交契必專往者侍遊杖  
曾泛惠山船道南謁書院思古仰星躔寧知忠憲公學緒有流傳  
潛德一修儒音塵失佇延仁孝澤何長繼武又參騫上天報好德  
弗與時周旋重起展來書對客談流涎悱惻遠致詞使我肝心鑄



媿無凌雲筆掃雲表高山

毅叔表弟海上寄詩見聞發憤之作也詠其此身同是海浮

鷗之句次韻

黑是烏鴉白是鷗沙邊蕭散晚林愁  
睨蟠啄肉欺陳鬼泛水和煙  
點客舟天上思之有河漢人間何者不戈矛  
商量同起翔寥闊縱浪雲遊到上流

季野寄尊人逸泉先生行述來書援 先人往日銘其先德

遵義公墓事爲仍世文字之敦屬守彝不學無文何能望我

先人之萬一惟逸泉先生潛德高行內切景慕季野賢孝

之思又相感於微輒忘愚陋掇詞成篇詠歌讚仰題於後以

復之



嗚呼典型人細行見大德艱貞歷平生寂寞到易簣俗澆心自靡  
家枯行獨澤執禮恩不移當義威甯嚇最念追遠思尤爲枯骨懜  
俯仰眞恬然仁勇忘轍迹丈夫君子哉兩者無媿色晚近諸小生  
八風吹六賊病狂漫自聖顛倒迷履幘鬼物憑依之驅使失魂魄  
我行犖确間凜凜觸鑱刻三歎思老成一往不再得忍辱而布施  
恩怨略無擇直到究竟地讚仰眞奇特儒也具佛心公平歸佛國  
賤子三毒強佛教以貪嗔  
癡爲三毒聲燄何時寂禮公爲大師識悔從今夕  
反覆述行篇牢記用自敵

往與張嘯琴在海上蒼黃一別遂已十年踪迹迷離不知所  
在昨忽寄二詩知遠客伊蘭爲之情慰亦復惘然次韻奉答  
風雷霧雨送衰年迷悶離愁不可傳萬里題緘破門網十年消息



託詩篇屋梁落月幾番夢蓬鬢如雲各滿顛最是故人情未減長吟醉入酒中仙

南北踉蹌奈爾何鄉江卑溼蝎蛇多潛淵鱗項原能縮出世禪心不受呵張儉鉢中豐客味陳蕃榻上好高歌願君更發靈樞秘

向君

精醫 醫盡人間氣不和

菱湖公圍詩一首題冰如見示長篇後

菱湖風景向來好年年付與湖村老村前白髮照紅蕖飽看花開  
花事了三五盈盈月明中竹籬茅屋來清風一家兒女圍翁媪扶  
上小舟任西東撐篙打頭雜嬉笑時有銀鱗衝月越菱芡翠開荷  
蓋欹一片香光上布衣遠聞柳下罾罟響幾處漁歌起蒼莽露氣  
珠團水上明興來唱答橫雙槳夜深翁媪催回船掩戶鼾齁聲動



椽太平農家湖山曲何似官家住華屋忘機鷗鳥狎犁鋤何似衣  
冠爭蚌漁戰塵起處戰血腥眼裏青山青復青老矣兩忘身與世  
時到湖邊縱遊睇村童野叟接古懽水葉露花送清麗邇來故人  
舒大夫儒雅風流冠此都點綴雲霞結構起晴樓雨檻收畫圖園  
林卻爲邦人拓紛來遊騎喧林雀文酒歌咏集勝流一時元白爭  
灑落我來憑欄忽有思曾繞西冷兩岸寺紅墻綠樹隱疏鐘能引  
禪心入詩意請君於此補闕遺更著精藍倚山翠

範之易吾兩使君曾於月夜泛艇菱湖賦詩酬唱寫入丹青  
張使君垂示詩篇李使君囑題圖冊賦此奉答

平湖萬頃宜城隅風景依稀似畫圖蒼顏北嶺巖壑古長眉南岫  
煙雲腴向來無人與料理綠荷紅蓼空旖旎園林新拓集華軒星



月良宵快輕艤風雅最是張長公文酒跌宕東川翁胸中山水久  
成癖腕下詩篇那得窮知我頽唐兼老懶不遣傳呼分酒盃寫出  
泛舟赤壁圖催動題詩青竹管清風明月不費錢亦擬新秋扣夜  
舩犬吠綠楊村舍遠蟾臨白塔風鈴尖

和鄭觀侯梅花絕句

一山冰雪無人徑寂寞寒香誰賞芳最憶荆釵陪處士林前看鶴

白於霜

清水塘瑞蓮讚

蓮塘西岸即地藏庵慧明有法師講經於此今歲  
蓮花之盛倍異尋常中有一莖雙花光彩殊

特

維清水塘忠宣完節照古照今人心慕悅精忠之心是大淨土佛  
宮湧現蓮花高吐佛子說法法界清淨梵磬一聲慧生禪定八功



德水澄映方塘竝蒂芙蓉妙香風揚月華璇彩日精蟠虹瑞聯合  
璧淨業感通橫流五濁慘淡三災仗佛宏願度拔吾儕頂禮法師  
義宣无量蓮花蓮花光滿華藏

伯韋前送秋海棠雨中衰落戲簡伯韋

瀟瀟暮雨碧梧秋零落寒花不自由只恐夜來風處士一床詩夢

浩難收

伯韋向有韓風子之號曾來詩蓋對花悼亡之詞也

孝岳八姪自北京郵書言將於菊秋初吉祇成嘉禮豫訂儀  
文兼陳志事衰懷岑寂之中欣爲美聞賦成二律一誌喜慶  
一垂期勉

桂花香曉度南鴻字照郵筒日射紅鱗甲欲飛見神采鳳凰入兆  
氣和融賓筵人物山兼斗甥館威儀西合東抱潤先生浩歌老怡



情各有少游風

囊多瑤草又琦花得近蓬萊果不差更欲長風乘客棹大收方物  
極天涯眉光展放通千界心地高明羅百家期爾浮槎超博望風  
塵前路慎三义

易吾使君移官山左憂攀惜別成五言一章爲臨歧之贈

賢者去不留不肖留不去吁嗟皖公城此怨向誰訴涼風翻黃葉  
秃我梧桐樹樹下白髮人惆悵邈四顧有懷不可言言之交衆怒  
衆怒亦何妨寧損幽人度自君臨吾鄉九苞鳴朝曙啁啾困人場  
夢裏聞韶護爽如酒解醒耳傾目爲注往過風節井欄斷柱豔汗  
今對丹堊新星斗森榜署光明一城中大節興遠慕徘徊復徘徊  
眄睠洽衷素首務趨衆忽常流那得預器識古所先舉踵已高踞



司直眞邦特奉親獨若孺承歡不世情善養在志趣山水攬清輝  
雲霞侍遊豫野徑讓樵漁繡衣護慈馭三釜曾參心賢哲通寐寤  
眼中宦遊人屬意勢要處薄恩對庭闈略不關喜懼神明其恬耶  
眞樂豈外具皖山遞岷峨皖水溯灑潁官長蜀中賢化行美待賦  
兩者事邁倫百端基以措其餘關職守燦然難具疏合當十年留  
無刑期富庶如何有新命前馬轉東驅移我天柱雲去作清濟雨  
惡木不剪伐嘉蔭失依護安得萬黃金往行要津賂平生媿董京  
濫枉孫楚顧蛛網破寒門風采映魚蠹嘉招醉壺觴名篇邀章句  
野芹有時獻醜拙不遭忤衰落寂寥中笑言動歡晤一別難計年  
蒼茫看世故搔首望太平濟時才不數才既不數見見矣多艱遇  
才遇兩相值所望功勇赴高駕臨長衢奉鞭進前御巖巖聖人鄉



翹翹猛虎步

易吾以古松一盆玻璃魚缸一架丁邁鈍集古句文一聯投

贈留別其時魚已辭缸丁聯文有未能盡識者賦句呈謝

使君臨別投嘉贈與慰離懷寂寞中分付蒼虬親老醜驚疑明月  
墮虛空名家墨妙非常有古範文高未易通報我化龍雷電去且  
留鱗鬣伴山翁

易吾即日赴山左履新再呈長句

謂前投贈  
別之篇

倚杖天高鴻鵠遠

風狂浪激未渠央五字吟成別意長  
閉門人老水雲蒼手斟深盞酣浮白心與飛塵逐乘黃兩鬢未妨  
霜氣重要攀日觀望朝陽

有感用槃君季野愛景亭唱和韻奉寄季野



生此天地間身已墮大獄如鳥入樊籠偕牛受鞭桔雖然豪傑士  
脊梁豈不曲心亨發光明常若朝昇旭跳號羣妖魔不堪一篋束  
是乃遊方外虛空著兩足生鸞復生梟生頑磨白玉造化作戲弄  
故使相仇觸吁嗟高標人介介力遠俗請看岷上松風霜侵最酷  
無限奸害賢鼠耗太倉粟精英嗟凋零崎嶇幾孤躅笑問誰主宰  
揉雜浪亭毒使我潘夫子槁瘦立沙鵠

病

溼熱下注勢甚猛厲若炷火之炙廢  
眠餐者七日夜呻吟中得句自遣

衰年負疾本尋常快意時危天必殃判挾病魔封馬鬣縱憑野燒  
入羊腸江南自古嗟卑溼海內於今劇慘傷痛苦殘黎相較看我  
身還是慶平康

地震陷鑛爆裂兵戈殘殺飢饉流離  
苛暴縱橫浩劫方且洋溢未有涯也

病起



拋除藥裏靜鑪煙頂禮燒香誓願虔案淨彌陀含笑坐簷高喜雀  
好音傳蕭疏白髮人間世惆悵黃金虛牝年推枕振襟歌一放斜  
陽老木有餘妍

再病遣興

一病成衰廢頽然天地間縐眉奔日月橫枕臥江山夢裏泉聲好  
仰看雲影間擬將一筇去峯壑掩重關

無別秋寒寶氣殊太會更下前英烈既容袖袖幾一圓笑問誰士宰  
道對昧此識理測高懸人分不文家俗滿香清北林風雷對是潮  
景內波衣長似空香兩長主主身主身主身主身主身主身主身  
春榮豈不幽心享靈光門常苦障長賦一遊擊致測不掛一遊束  
主此天世間良日望大慈眼鼻人獎賜言半受嚼林灑然豪翰士



网舊聞齋調刁集卷第十九

桐城方守彝

題伯韋畫

繞屋桃花照眼明  
老松偃臥作濤聲  
小山媚綠淨如拭  
擬喚幽人竝蹇行

如睡春山可笑人  
不能勝酒遇陳遵  
綠蕪芳草鶯花月  
村老酣顏紅滿皴

數間茅屋數株松  
淡淡青山隔水東  
何處幽人浮一葉  
慣乘清曉棹清風

送簡還北京

送盡春光送遠行  
白頭病起動吟聲  
未能江上送兒去  
祇有長途



早暮情

七十五齡一病翁依然無恙在寰中  
汝今放膽京華去報我添丁  
一紙紅

沈乙盦先生垂寄長句手書作幅子屬和依韻郵答

蒲團堅坐收雙視無奈懷人內熾然  
托飯願邀摩詰食渡江難作  
祖生先床堆藥裏疴常負硯積塵  
封懶不前驚喜眉光通遠照龍  
騰虎嘯雁傳箋

前詩發郵後取寄句諷誦數過再依韻成篇

詩篇超妙清華處總說王維孟浩然  
此意就公從問訊於今傳鉢  
孰推先傷心離黍宗周道悟法拈花  
老佛前知熟三乘經卷了偶  
將微笑落吟箋



有會而作

記得清秋夜有霜陶家菊好柳枝長也思日飲柴桑酒第一詩人  
在此鄉

鈔竟季野晒網軒詩以原臬本還去題句於後

縞素衣裳天蘊藉縱橫書卷澤箋毫幽憂欲哭誰知島芳佩孤行  
可作騷把卷一鐙寒不覺挂宵五夜月爲高玄珠探得驪龍去白  
髮摩挲老自豪

槃君將歸爲杯酒之歡賦長句一章以解悶

一笑開顏欲向誰與君勤聚最爲宜憂來世事無從說話到家常  
有許悲零落交遊多厄閔傷殘骨肉又分離酒香且共糊塗飲醉  
倒如泥入聖時



餘情有不能自己者遂復賦之

臘盡冬殘百里行到家兒女動歡聲  
城東有我孫雛在京邑亡娘姨母迎  
知荷愛憐垂過杖為傳懷想繫衰情  
不凋最是凌寒竹又看春回笋怒生

歲宴追傷君幹並念簡京況

爾翁總角契鳴嚶賢秀來歸兒館甥  
謂可百年齊繞膝甯知中路

淚諸嬰艱難學業功名際

簡留學日成本高等工業九年歸國多資  
入最優等君幹伴同年異國多資

力助寂寞京華離散情

君幹卒後長女赴津依者二姨於叔父母回前老

淚久乾無可下悲懷迸作北風聲

風雪夜坐傷五女幼蘭

寒風城郭雪顛狂無地相尋話短長  
別日惆悵還悵望書詞親切



倍尋常芳枝陡折號悲鳥白髮孤清斷寸腸往復低徊追憶處西  
冷湖上上虞堂

瞥眼露珠原上蒿人生修短等奔濤所親幾度拋予老故舊連番  
赴鬼曹顧影靜需佛力度消憂難遣酒情高汝今泉路當尋母陪  
奉清閒不解勞

慎登示所藏鄧少白先生復宜章令書手稿屬題先生爲完  
白山人嗣君工書有名當時

從來上德不忘先一世高名貴有傳最是虎賁神與似何妨大令  
筆尤妍遺翰寶墨明昏視潤色寒儒見古賢曾拜靈光兒負劍摩  
挲此日媿華顛

有查生者困旅館以先生書中爲地道語至  
懇切老輩古心足以風澆俗讀之感動

題朱方蛻農丹徒張貞婦傳略後

傳略全  
文錄載



張貞婦吾邑兩文貞公族裔也父鴻文早世事母劉盡孝性  
貞靜淑婉以四德聞族邨有好駟莊學明者爲其子介祐求  
聘焉張氏不知學明之人而禽也諾焉光緒三十四年八月  
貞婦年十九適介祐姑與夫皆賢之學明顧佻達嫫媪性與  
人殊未彌月伺貞婦服勤左右頗加非禮言語手足市井自  
好者難言之貞婦不能忍泣懇於姑姑戒勿聲曰有我在若  
無恐自是貞婦遇窘急輒奔姑所然學明素虐遇其妻姑實  
不能庇貞婦姑又好牌戲往往竟夜弗歸介祐羈賈業不能  
數歸歸少遲學明輒閉門弗納并傭媪亦遣去家祇有小姑  
一學明益無忌百方誘怵貞婦惴惴如防大寇雖姑亦以歸  
甯爲囑明年三月遂常避居母家四月晦日介祐以近端陽



節自來迎母勿許介祐請期五日矢無他虞母強貞婦隨介  
祐歸學明怒介祐之家宿也連夕輒苦以事侵曉乃罷又明  
日預鍵外戶介祐叩門則怒詈叱去是夜貞婦兄善昌驚悸  
不寐警夢貞婦泣於莊氏門外天明急趨視則貞婦已死牀  
上學明前遁矣詰其姑漫以自縊對時貞婦年二十宣統元  
年己酉五月二日夜事也寡母家人聚哭視貞婦尸血涔涔  
白眼口出兩頰及脣上青紅手印狼藉夾脰亦如之頸下皮  
裂矣而左掌心糜爛尤甚以貞婦叔父廩貢生藻文方客鄂  
姑歛以俟斂時又見兩腋及兩股下並多青傷聞者咸謂非  
圖逞不遂憤嫉致死胡以鱗傷若是百喙莫能掩也藻文歸  
亟鳴於官及啟棺經盛暑十日尸如生官驗咽喉下布帶痕



一道平繞周匝確爲勒斃訊姑李氏備供學明諸無禮狀閱  
三月貞婦仲兄保昌詞知山陽僻寺匿一僧不習經梵惟設  
張氏主晨夕拜禱亟率役往果獲學明大吏檄原驗官會鞫  
具服調姦不從挾恨謀勒獄詞旣上矣學明尋知律應坐抵  
大懼前令之初驗也以頸傷確鑿遂允張氏請未褫尸衣而  
餘傷僅據訴牒錄轉犯提省遂復以自縊狡展獄久不決庚  
戌秋京朝官有以貞婦冤上聞者 旨下江蘇督撫讞定而  
承審員欲改附羞忿自盡律以貸學明之死然梗於原驗尸  
之確鑿則議以覆檢爲翻案計議旣定而國變作矣辛亥有  
所謂檢察廳者復蒸驗於尸腹胃部得碎金百有七粒遂曲  
詞附會定爲服金後自縊謂學明經赦釋不罪然貞婦戕於



強暴貞心毅魄終古不可磨滅則闔都士大夫下至閭巷婦孺咸翕然無異詞今奄忽九載矣同里法部參議劉君夙以治獄仁恕名京師予與互勘全稿確詢事狀相與悲貞婦之冤弗白也因藻文請特傳其始末敬爲天下後世扶植倫常之君子告焉蛻農氏曰哀哉貞婦之死也據覆檢所見吞金逾百粒勢必死未能遽絕而更碎死於強暴之手是一夕之中迫阨至矣艱卓至矣聖人禮以明倫刑以弼教彼淫凶之辜縱一死奚足蔽哉迺頸傷交匝證佐甚備而妄以縊讞彼何人斯惡足以昭雪節烈哉昔道光甲午趙氏婦死於淫姑案與此類提刑滿洲裕公謙表以墓碣徵當時名士作爲詩歌特繫之父姓而定其稱曰王貞婦名以義起今變例從焉



鳴呼先後七十餘年兩貞婦以奇烈著其所由來率遭遇人倫之變非邑之不幸歟然女教之昌百世而後足以風矣歲在丁巳季秋下浣朱方蛻農譔

附錄

按歸震川集有書張貞女死事獄事兩篇實烈婦也嫁汪客之子爲淫姑刃斃改稱貞女而繫其父姓前賢書法不予凶族之有烈婦義至正也第貞女之稱微嫌與在室無別惟邑志載鄉先哲朱士龍魏塋陸毓元詠趙婦死烈詩題皆大書王貞婦於義尤愜實出裕靖節公特筆也然宋史有王貞婦爲元兵所掠題詩青楓嶺上投崖下死史但言其夫家臨海人未詳何姓而藍鹿洲先生女學卷二王貞婦下又有永新



趙貞婦抱兒匿邑校中併死於元兵血漬入甑爲婦嬰狀史

作譚氏婦趙是則書貞婦者例繫父姓古有行之者矣

按節烈繫

姓前史已互見而宋明兩史列女傳

又考宋恭伯姬齊孝孟

姬杞梁妻在後世宜稱節烈而中壘編列女均入貞順傳若

楚昭貞姜白貞姬並以貞諡則於古義稱貞允矣故謹從焉

蠓農又識

修蛇壑底潛猛虎巖穴蹲何來凶狡狐幻入橫目羣政化日頽敗  
風俗滋淫昏毒猛生烈焰岷玉橫遭焚名分正春秋用誅姦人魂  
尊親苟不道仇賊同等論矧若獨夫紂皇皇誓告存貪壬執刑法  
忍使埋奇冤開網縱狼突鸞凰骨燒薰吁嗟天且夢不爲齊婦伸  
金焦當洪流北固壓江濬波濤作悲壯不平鳴衆聞想見當其時



愁雨慘溼雲我欲排天閫再拜求雷神金光百道下聲罪震凶身

拍手齊叫快街巷一時喧又向秋旻禱大鷹爪如銀披腹更裂背

貞婦及叔父及兄弟與  
兄弟之子舉家悲憤呼籲

灑血腥黃塵螻蟻棄弗食烏雛鳴其恩

聞者傷之

兩者不可得得見文中尊直書據正義情盡辭不吞發憤振

風紀排棘出霜筠韓歐倘繼作走筆搖磷响更得李杜輩歌行慷  
慨陳發揚告當世褒貶凜官人光顯同一曜九幽轉悲欣庶幾沉  
痛鬼不復啼哀猿人間工書者未欠王右軍願取貞烈篇寫之刻

貞珉瘞鶴銘邊立千秋金石文

時涵以今年皖中幸得平安度歲郵詩爲賀和韻答之

皓皓山頭笑似翁鶴驚背重覺毛豐魚龍寂靜江河冷狐鼠逃亡  
城社空呈礙縱無鬚雪白詩篇寄到紙猩紅歲闌且得平安幸或



者尋梅一棹東

雪後嚴寒歲亦行盡兒子時褻候官金陵間置頻年一家十餘口有譏寒之色然能堅貧不苟有詩來呈和韻慰勉之

蕭條世界嚴凝日誰可回旋天地春閭井盡成高士臥弓刀間共美人醒齋廚竈冷燒難熱衙鼓聲龐聽不明止可堅安君子分羊腸滿地慎孤征

深淺從吾自奉裳飛車走僕看人忙馬嘶誰識能千里冬盡定能回一陽梅影縱寒無軟骨酒杯雖淺有餘香丈夫合抱固窮節偃促襟懷媿上皇

次韻範之投示辛酉除夕有作既以自調亦以相遣

我亦愁多無計遣濁賢清聖時復中夢來栩栩居然蝶覺後冥冥



戈者鴻過去是非歸覆水利那歲月各衰翁掃除一切隨年盡萬

態春榮貌自豐高三四順化  
高蹈之意

寫意一首示孫用除夕和韻

聰明鑷去無所用囊此全身渾沌中雲路高空娛縱鶴冰絃清澈

過飛鴻嬰兒自養錦綉穉老子何妨藤杖翁看轉洪鈞任天運本

無虧歉不占豐三句所以沾滯有自在之樂清尚高遠之懷常全嬰

兒之天忘老衰之憂順時任運不懼  
不足不求有餘尤為渾沌之實際

冀平過訪問疾為說五台聖境復見贈五台金蓮花一封晨

起烹泉取蓮數朶淪之異香清甘如飲甘露身心怡然次來

韻為謝

昨者道人訪病室能將語句苦回甘羨他踏遍文殊地語我浮空



香海嵐手采金蓮花亦聖氣成纓絡腕中參靈山拜祖歸來意千  
朶芬芳寓妙談

冀平督和前日見投之巢字韻病甚懶吟強以本分白話答  
之

病翁衰懶百事廢日炷鑪香不下巢

去年病後築一小樓居之名貴巢

禮無量壽

生欣厭誦陀羅尼頗佶聳連日大風號萬竅當窗高竹亂千梢世  
囂接耳類如此往結老衲山中交

通伯之梧竹閣供奉其先世孝子公血書經咒又傷長嗣君  
伯固之亡取伯固所藏貝多羅葉四片裝池爲冊繪閣圖錄  
血書經咒副本於後並藏閣上出冊子徵題及守彝題三絕  
句



閣上光明照大千碧雲綠玉護年年佛香經卷皈心處寶樹朱欄  
五色蓮

信願不隨灰劫淪乙翁句裏金剛義前賢後哲俱生天我輩要嚴

自到地信願句本沈乙盒  
先生所題原句

二月春江氣尚寒蓬科煨藥養衰殘聳肩撥火搜題句舊德遺徽

仰故山

久病謝客天閔見訪僕人不能識別於其間聞之惘然懷思

成句遣投

節變園林病未蘇滿庭寒雨長青蕪鳴嚶夢裏來蘭佩塵網門前  
誤莽奴句攪明霞誰與賞癢搔長爪獨成娛幾時老樹橫塘畔靜  
聽吟聲一笑呼



遣意一首和韻天閔見投自題三十三歲照相之作

歷塊奔蹄鳥失飛奚奴那許舉肱揮遭逢荒驛寒  
葛莖鳴感愁人減帶圍撫斷朱絃無窈窕塞空黃  
霧罔從違蒼天詎肯終玄夜珍重九苞遲曉暉

次韻葉仙萸海棠八首

有叙

久病小間葉君仙萸函示海棠詩八首屬和此海棠在皖  
城任家坡或云卽霄漢樓故址後人結屋其上種此花樹  
數十年來枝幹扶疏花時敷盛兄子時涵曾賃居之名其  
書閣曰海棠巢每二月花開集賓友賦咏其間吾亦撰杖  
頻過逐隊唱和今涵移住惠泉山下近乃知仙萸已賃作  
行窩蒼苔屐齒尚可重尋感此因緣觸懷成和



爛縵庭柯無限春結緣深處是詩人看花得意新生句脫帽穿林  
豔滿身賃廡何期逢美蔭酣觴相對更精神會須三月扶筇去飽  
聽吟聲徹四鄰

綠郊堤柳山村外也有春花紅欲然畢竟尋芳貪野徑何如攬秀  
眷庭前丰標作意蠲凡近嬌態不無特靜娟國色名篇兩相副扶  
衰索句自生憐

秋風茅屋杜陵老橙木低松頻入詩想見茲花非著意從知妙色  
未逢時饑寒傲骨孤懷峻憑藉成名運數遲品絕終然眞賞至此  
情今古有餘思

蝴蝶蹁躑化蒙叟文君蘊藉對相如正當天宇陰晴半恰是春閨  
夢醒初虹氣微薰斜照雨蚌胎光吐一林珠杏花村酒時剛熟爲



破青銅買幾壺

就燥避潮結小樓病翁高枕送悠悠窗排碧玉搖風竹室斷紅裙

繫石榴待到海棠開別院花敞宅但較小耳此便如籬菊插蓬頭護花

莫奪春陰去寄語詩家秦少游

霄漢樓頽人去也風流跡掃夢縈弓悵懷崔灝雲中鶴完白郎中人

皆微有登霄漢樓詩音塵已遙來載陶潛桑上鷄陶公有移居南村

顛之句借取詞結屋何人簷宇大種花成榦樹陰低愛茲名貴非

凡豔日日詩囊共客提

竹林移住惠山下愛彼寒梅萬樹花無錫有名園擅湖山之盛劇

念飄零懷舊院塌來風雅出官衙從容未覺勞文牘瀟灑何妨側

帽紗巢上今知棲上客歡來寫句字欹斜



清明上塚佳時節到處天桃與野棠蘋藻緣盈祠外澗杜鵑紅照

墓前坊

紅鄉曲入所名豔山也

獨經歲月蛇歸壑誰與繫維駒食場重

賦名花倍惆悵鴻泥指爪未能忘

喜蒯若木來皖即送歸北京

十年不見意如何飽歷風霜君最多

若蘭州兩度往赴

萬里河山入

長夜四方花雨說多羅

自若木回京以各地講變之幻極矣然歸高

依佛法者日多

談灑落驚賓座健句驃姚起我疴白首欣逢又別去幾時掃徑得

重過

裴伯謙寄示鄉居桃花盛開詩因之託興寄懷次其來韻

夢裏年年淮上村江城霧雨黯苔垣春生藤杖欣聞健詩賦桃夭古意存想見落霞滿花隴苦搔疏鬢動吟魂掃除塵几摩箋讀白



笑荒蕪草塞園

範之以畫舫齋姚江學會圖屬題歐陽八公舊有此齋名範之  
用以題榜於道署東廳

病翁病成懶百事廢不理案蘇硯生苔紙墨縮手指豸繡李使君  
好道嗜文史文高詩且豪道兼儒釋氏官齋淨閒廳開軒臨池水  
竹樹冬蔚坡芰荷夏媚沚屋也作船觀欸乃清風裏抗懷希古人  
名榜準前美簿書一了當都講會於此有客妙丹青作圖入繭紙  
使君繫語句子弟衍餘旨琳瑯眞滿家一一協宮徵裝潢成貝冊  
投我皎昏視命我必有述雖病不聽委我媿嵇叔夜懶未徹骨髓  
邦居當事賢况對盈庭芷贅詞深贊歎義分正宜爾維昔王陽明  
庭前格竹子一旦大徹悟光明復俊偉德功立從容立言成教軌



不貴道問學支離誤日晷獨當尊德行破的用直矢工夫下手地  
先從明心始解垢脫昏塵清光萬丈起方寸日月同大用有本體  
可以任縱橫無不協仁禮雖然欠邃密要之正不詭世禍如今時  
都坐人心死心死何因緣墮落糞溷底臭壤閉痼牢何方可力啓  
惟用王氏學天河倒瓢洗捷徑出奇師賊壘立談毀金針起沉疴  
神速良足喜使君蓋有見茲意吾甚躋拂案滌硯石振懶題册尾  
所期研之精講明入踐履文字相掃除垂果落花藥

馮漢青屢投詩篇賦句贈答

回遡交遊四十年薰蘭得意近仁賢風雲變色黃塵起歲月驚心  
綠鬢捐各以詩篇娛老大何須格律苦鑽研亂鴉隨手塗來好妙  
處從人不可詮



有感自題詩卷

豎身天地際瘡痍發憤長歌當倒卮愁絕光芒千載上奈何坎壈  
一生悲古稱詩好還餘事我愧精枯未透知止把墨磨雙眼淚模  
糊寫句滿江湄

胡味蘭贈天台藤杖

失卻撐天直脊梁形容痴傻僅餘狂蓬鬆白髮貪千古嘯傲黃塵  
望八荒未免龍鍾增老醜賸宜鳩杖助扶將坐思大壑懸巖上瘦  
勁長藤飽雪霜

天台賢宰罷官日萬口碑鐫仁與廉古寺名山留轍跡老藤拄杖  
載輕纖蒼虬成束譁奔穉黃耆生姿笑撚髯分贈里翁兼及我鏗  
然爪甲喜頻拈



次韻淵如病中示句近年來僕頻病近復臥疴月餘與淵如  
兩不相聞也

衰年不耐三折肱厭此塵根衆苦身坐待秋風吹敗葉寂如枯木  
斷芳春相期金玉文章手要作棟梁道法人稍健過邀湖上去荷  
隄柳徑輾雙輪

淵如再示句謂拙和坐待秋風二語真安心人語媿未能也

夫惟大解脫人始得真安心法因復和答

山邱華屋平衡視外置形骸不見身心地高明百病爽情懷浩蕩  
四時春臥蠶縛繭嗟茲老自化鳥搏鵬仰昔人誰識安心真意思  
笑看忙煞兩奔輪

淵如三和有若是情懷浩蕩者必非災苦厭離人之句聞此



呵棒歡喜踴躍亦復早句

極樂原居大悲佛金剛可現穢跡身猛呵昨夜三更夢如坐先生  
一月春藤杖頗宜扶病叟藥鑪正好供閒人詩篇語雋諧名理雲  
吐晴霄月一輪

次韻邠儒範黃亭之作亭新築於黃甲山最高處相傳山谷  
曾讀書山麓舊有山谷祠茲亭危壓城闔吳楚山川極目在  
望

涪翁千歲無消息洞口青牛識舊顏

之地也李公麟為畫山谷騎石牛圖涪翁有句云山谷青石牛自負萬鈞重八風吹得行處處是日用又將十六口去作宜州夢三

祖山去皖不及百里登茲地接風流情望古神來雲檻坐聯班蒼

藤雉堞朝煙上紅綺鷗波夕照閒最好清尊明月夜齊呼坡谷詠



許滄浪孺子攀

縱橫風雨庭梧窗竹間有奇觀焉因憶仙冥寓海棠密葉繁

枝間亦必有摩詰樹杪百重泉之句興到有作用風字韻

一庭飄颻響梧桐寒碧窗前萬个風吟客海棠巢上坐看泉樹杪  
句能工林昏無數鴉翻葉雲裏如麻箭出弓臥看瓦溝思澗壑大  
聲入枕撼江洪

次韻莫仙立秋後遊菱湖公園

苦熱苦與病翁仇扶床一讀逍遙遊老蒙好奇復好誕其言是否  
衷所由六月息當歲中半南溟鯤鵬巧相換不然海大氣炎蒸如  
此大魚何處竄幻想一笑竹窗清昏花霧眼忽生明啄啄敲門鏗  
獸響咋咋翻葉林鵲鳴有使投函通欵曲函襲荷風香簇簇手破



題緘瀉珠璣光滿桐庭白間綠萬柄高蓋中遊行吟興動與湖光  
迎夾堤楊柳綫長短隔水山嵐雲縱橫園林閒敞客不冗茶果甘  
香小几擁紅衣往往出綠叢顏色耿介不爭寵茲湖向來號菱湖  
秋來菱花不可無采菱女兒住何所隱隱菱歌清可娛坐對景物  
思在昔湖光未擬付寥寂農舍牛宮老漁村不到貴遊車馬迹樓  
欄新起盛壺觴文野之間了了別人事變化各一時未來何處問  
消息滄海橫流嘆迷津欲附搏鵬叩蒼碧

梧下納涼自和風韻

藤蘿小院種椅桐爲布高陰召遠風頗喜林成聽嚶友已緣絃絕  
斷斤工濃雲覆榻涼侵酒新月投杯醉臥弓白髮狂癡聊爾爾人  
間獸猛水方洪



慎登連遭家痛世禍亦且岌岌因排遣憂端取先德高祖遺  
著山海經類觀及雜詩殘藁整比裝池成四册繫以七言長  
篇出示守彝屬題

新秋哉明示我詩中有斑斑千點淚儒門世德湘水賢聖學微茫  
道所寄平生春廡有如賓中道忍別白頭懿大男勤學負沈痾更  
以泣血殉孝思繞床小弱嗷烏雛淒厲林颼欺短翅人生中年多  
感傷覺此所遭尤酸鼻風狂雨橫瘴癘深耳邊野哭聲遍地況聞  
南楚九疑問男呼女號蒼旻醉明哲兢兢義若何相期歲寒不改  
翠天運如此且進杯此陶且進杯天運物如句掃渾襟淚一堆古傷心  
者善作計頻中聖人悲可裁

典册高文經幾秦抱殘守缺資來哲弓冶矩矱受高曾收拾留貽



事尤切紛紛智愚難語同於今後生藐先烈假館曹交厭歸求蛛  
網楹書鼠入穴完好縑緙付飄零散亡遑肯勤補綴先德一官晋  
水陽太邱名德見圭臬賦詩自覺訟庭閒著述兼綜羣儒說藁本  
寫定付流傳詩禮門庭世幾閱桑田滄海劫灰飛遂使簡篇有完  
闕先生學問趾前踪好古堅抱固窮節時危恐懼搜篋藏紙本摩  
挲整破裂斬新琳琅到眼明發揚矜護力能竭藏之名山傳其人  
此意千秋不磨滅吾有人境淵明廬庭前高樹亦扶疏山海一經  
願借讀還將寫副白鈔書

題藍田叔高崖僻寺秋樹孤僧畫幅

長雲短雲堆千尺  
勢絕懸崖立石壁  
何年結庵著凹僻  
古屋紅墻倚蒼碧  
坡陀一徑霜葉赤  
杈桠禿樹擎秋色  
仰看巉巖不到翼  
止



有天風吹寥寂惜無絕頂振衣客逸興從中來作劇勢將飛登據  
一席黑獄黃塵掃吾迹放眼九霄騁八極吸清噓濁肝腸滌長嘯  
一聲脇生翮招邀往來古仙伯雲裳霞佩紛絡繹笑談恢疏語不  
擇淨聞超見愉魂魄寬平盤礴藉苔石高臥不歸意真適徘徊之  
間磬一擊山下孤笠來老釋風襟雲袖有異格便擬追從幽險歷  
進前細看乃粉墨惘然自失空嘆息

寄懷雪樓前月至皖頻過病榻察脈示方意拳拳不能忘也  
詩人老去鬢霜侵滿腹羲皇太古心明月悵違三徑夜濁醪獨把  
一尊深頻資春力回生意又長詩芽動舊吟剩願似翁能健飯看  
翁龍臥起爲霖

昨同季野登範黃亭追往話今頗恣言慨季野示句原韻和



之

新亭高敞宜登眺仙侶招邀特破顏放論當醒天夢夢傷時欲淚

雨斑斑古人解脫憂患外

無今夏再讀山谷全集遭遇屯厄略

爾我

何妨歌哭閒眼裏未殊千載上依然江影舊時山

約季野飲雙鶴館酒罷季野示句原韻酬和即送歸里

酒壚往迹聽君說一笑昔人非昔顏

於三十年前季野應郡試曾飲此舊時酒館之僅存者也

看盡狗雲恣意幻生成龍性許誰班零殘魯國諸生老醉對桑田  
浩劫間叔夜於今有二鶴正堪高隱繼淮山

### 太息篇

黃塵袞袞苦相侵誰是汙泥不染心八面風來山鎮定一輪月照  
水清深斯人邈矣歸沈寂矯首望之極照臨太息周餘靡有子東



山無處起蒼霖

讀毅叔盤君兩弟唱和雄字韻長句有感於邇來里聞國狀

次韻寄兩弟

青紅轉眼一林空坐感衰榮氣不雄近事紛傳橘化枳古鄉豔說漢名桐仰思文炳斑風虎多近繡華藻火蟲翠嶺霞峰千丈落小

山甯有桂成叢

藝叔有百年同賦小山叢之句

奔馬頽波年復年那能推後遡從前迷離詹尹難開卦痛哭靈均

懶問天聊縱狂歌和樵唱且安粗糲守山田岐陽石鼓浯溪頌拓

本精摩千百篇

槃君有同情嗜古評豔蠟之句二拓皆國社中興文字願精摩其體勢後來或須煩手畢也

毅叔和江上唱和詩見寄戲次原韻

龍眠羣嶺圍孤邑中有一二冰雪顏堪笑饑鷗閒作態每聯沙鷺



立成班抗情矯首羲皇上得句軒眉騷雅間尙肯不忘江畔老一  
飛清韻渡遙山

即事戲次冀平投句原韻

彈丸脫手傳新句喜動扶床衰病顏鵲昨園管翻个字蜂遊櫺茜

散衙班

時秋晴燥暖遊  
蜂羣集窗紗

布金長者無消息托鉢沙彌遍此間正恐

老僧妨入定海濤洶湧落伽山

寄唐汝梅

問訊唐夫子又添詩幾篇秋心綿遠夢病骨拄殘年騷意饑鳥託  
郵辭素鯉傳

前行寄示饑  
鳥一首

商聲衰怯和應得故人憐

句短情非短路長思更長一燈親若婦九月覺來霜蟾冷寒江岸  
蟲鳴古院墻吟成高枕臥餘意滿匡牀



久欲題明內庭供奉林良蒼松白鶴畫幅屢吟不就乃乘微  
雨出訪天閔聽其談詩語多妙契欣然歸來遂爾成句亦意

兼比興以爲贈篇簡天閔

凝眸畫本欲題詩眞覺太陰雷雨垂

杜公題畫松有黑入  
太陰雷雨垂之句

偃蹇慵

醒伸霧爪孤高聳立破霜皮蒼然久共雲霞老白也甯爭雞鶩奇  
彷彿九皋天半響濤風湧出墨花枝

巾車衝雨訪徐陵塵尾霏微屑玉冰疑是仙翹下明月不嫌蒼禿  
似枯僧瑤絃風入清生瀨羽客丹成纏解藤得意歸來興飛動贈  
篇題畫兩矜能

九月將盡孝徹七姪持其三十歲生日詩來詢知生日在重  
九前一日切鄰佳節應舉觴盡醉以取歡今時已過而酒興



觸發遂和其詩以當快飲

生壓重陽歲三十老夫酒興若爲賒金罍夢裏呼燒燭霜鬢搔來  
要插花青眼我方杜陵叟杜公有青眼高句白衣人到子雲家甯非  
韻事成千古此意正如海不涯

頻以故舊敦迫投簡冀平附以長句

那願頻投當路書貧交頗悔未能疏自無廣廈如天庇忍對饑人  
向壁噓施食建臺高突兀乞香托鉢滿空虛大師居士身兼了莫  
以枯儒付一喏

聞雪樓又添孫蓋其次郎君叔縉之新嬰也寄賀

聞說先生又抱孫鳳雛生子欲盈門八龍會集翁稍待一角稱奇  
衆屢喧白羽贊軍功德大黃花繞座笑談溫病夫頗覺饑涎動風



送醪香醉暗吞

讀丁弢庵憂端長句原韻書其後

誰遣斯人看世事如焚憂思寫將來忍持夢裏生花管化作爨餘  
焦尾材甲仗連城遍山海金銀入窖起樓臺此時君不橫戈去日  
把詩篇闔復開

讀季野庚申後詩題句卷後

不有子蘭譖那成楚些三哀千秋騷裏字萬口誦成雷把卷三三復  
挑鐙百百回蒼天昌大雅妙使古今才

題節孝李母林夫人事略冊子後應範之

慷慨殉節易從容就義難易者原非易難者尤可傷吁嗟林夫人  
芳華摧嚴霜忍死慰姑慈歲月殊未央含悲望遙路緘淚視三光



艱貞三十載子職婦承當勞且勇獨任病以誠孝忘崔魏大臣府  
條理各率章鞠躬盡瘁心順變修厥常才高源德盛淵懿難測量  
聲聞動賢相孚感化一鄉夫子愉靈爽泉臺無傍徨乃如之人兮  
模範人間孀

賢哉李使君夙夜期無忝凜承節母訓寤寐懷永感渾忘非所生  
一念違豈敢成學資典籍風雨勤鉛槧精義深討論高文抗視眈  
出身臨世紛正步無夷險介石協貞吉通方納閑檢宦迹北暨南  
交遊慎擇學碩學與方聞結顯不遺闇大夫君子風見者多退歛  
濁世此清流淵源知有漸推本堂上慈拳拳抱隱憮反覆述德篇  
感我淚灑灑

秋浦許公出示朱子游雲谷詩墨蹟四巨幅子屬題



覺有光生銀海花  
鑪香手額敬深加  
天門地闕龍虎勢  
道氣儒輝文字華  
千劫流傳耿神護  
一心精感眷名家  
後賢事業爭風采  
砥柱橫波正未涯

夜坐賁巢讀天閔近詩題其卷稿

熒熒攤卷擁宵闌  
風掠霜髭強自搏  
落眼涼輝疑皓魄  
驚心文綺起飛湍  
回旋江海龍吟大  
吞吐風騷蠹粉寒  
知嚼虛空星斗碎  
和成笑涕射冰丸

前意未竟天閔見過遂再詠以竟意

時危無計一軒眉  
鍵戶呼醪醺濁卮  
醉裏放歌動神鬼  
古初獨往覓軒羲  
賁巢聊作王官谷  
琴友逢迎鍾子期  
一望腥羶堅四塞  
願君弢錦護朱絲



雪望追次淵如月前枉投篇韻

萬樹禿落枝撐拏一夜北風翻雪花崖溜成柱柱生枒野色迷失  
蛇徑斜竈冷煙沈幾村家玉樓瑤島度年華澄江寒練洗餘霞絕  
鳥蒼山縮老鴉止有吟人發興賒天與詩意殊可嘉開閣不須重  
簾遮憑欄送目飽瓊葩清入肝肺絕汗邪喜到淨土那敢譁自證  
本願原非奢歸房寫句暗暗誇心地汗馬功莫加憑仗佛力不我  
遐

觀劇一首再次前韻

陰蛇恣作龍怒拏芳樹冷噤枯不花長荆叢棘雄繁枒悲風慘澹  
雨橫斜狐鼠踞厦稱大家鸞竄鳳逝梟榮華人血薰日腥騰霞紛  
紛皮肉啣飢鴉魁鬼跳嗥意氣賒姬孔砭呵蹠褒嘉河決瓠子不



可遮騷人發憤揚詩葩正襟危坐思母邪屹靜不管門外譁妖氛  
醜態入筆奢句嚴春秋辭鋤誇李杜之光遙相加國風怨刺義未  
遐

叔節養疴里中歲暮寄句雖有倦遊之意而神情瀟灑依然  
也欣慰次和

春風一轉便欣然鵲乍庭枝破曙煙夢想蒼髯勞引領神完丹頰  
祝增年文章自有千秋在薪火還憑一綫傳衣食得天宜老壽掃  
門待迓地行仙



网舊聞齋調刁集卷第二十

桐城方守彝

元日賁巢獨坐

江山如舊又新年  
手拄霜顛望遠天  
何日春風榮大地  
翁家庭草也生妍

案上南京又北京  
問安賀歲帖鮮明  
回頭故事哀來觸  
一嶺松楸入淚聲

伯嚴去冬寄其散原精舍詩續集來連日披誦題句於後

屯難天心有所昌  
散原憔悴就詩章  
陰陽慘澹侵深念  
桑海微茫著老蒼  
上塚行歌訴靈爽  
客居哀詠寄壺觴  
白頭撫卷三披復  
瀕洞憂端起太行



百鍊青熒柔繞指鑄爲寶劍倚長天星文夜閃虬龍惑匣物霄鳴  
雷電纏肺腑有聲盈八極山河餘淚散千篇浣花野史堂亭遠別  
有樓欄也屹然

去冬偶得姚伯昂先生隸書橫額文曰願花常好月常圓人  
常壽感而題句

好花圓月壽人多止是一長沒奈何造化由來專主宰妄情未免  
取譌訶星雲縵爛歌堯舜鞞鼓淵闐將藺頗最願眼前尙皇古無  
人相許手空搓

孝旭六姪客歸過皖留度歲孝朗大姪孝澈七姪均因緣在

皖得集一堂衰病餘生尤以爲幸六姪有詩喜而和之

喜爾提攜春氣回新詩落手錦箋裁風塵插脚世情了天日擡頭



襟抱開往事掃除隨舊臘新年笑語對傾壘竹林倘許前賢繼得意能忘白髮催

新歲亟思消遣悶懷璉孫遂邀伯韋葆明良甫詠芋並孝朗  
孝旭孝徹同集東方新館高樓欣然盡醉扶歸仍前韻成句  
難得新年聚一回正多愁思正宜裁切雲樓館廚香遠照眼須眉  
酒量開莫笑糊涂巢幕燕正當酪酏臥糟罍曷看風雨聲圍檻天  
教沉酣作意催

即事代簡答範之

穀然聲與耳爲謀惱亂衰翁不自由放懶久思從叔夜逃虛正喜  
得莊周散原住在頭條巷

伯嚴金陵所住續集吟披賁叟樓

伯嚴去冬寄散原精

舍續集來詩冊夜火曉窗聯雪鬢邇來最是秣陵遊



使口語心心有聲心聲無語卻分明貴神自合遺形迹得意由來  
在默成白雪傳歌新板本青鐙有味飽詩情前關分付牢牢閉又

把歡樓詩卷橫

範之近贈其新  
印詩卷歡樓集

天閔投示春陰一首觸懷戲答

抉眼挂高空太華一坵坵西望須彌山芥子納瑣屑漢魏作者林  
軒車風雅轍唐宋角其雄巍然岌門闌一口咬嚼之熊魚平吞咽  
氣體隨運移風裁在人傑前水源嶽岑後水循滯嶮歲月相續流  
江河成派別游泳嬉波瀾鯨橫鷗亦潔仁智適性情小夫妄優劣  
闐市耳代目電火燒眉瞥閉門有孤笑芳佩蘭自結默養千秋靈  
傳與萬億月惜取翠袖寒空谷絕代子春陰宜老懶冷靜不可熱  
深居狎青氈自媚須間雪詩來如美人一下杯中物



雪樓危病健起來皖上軍府枉過歡然深慰懷思因聞方呻  
吟患苦中今哲配徐夫人一再割臂進湯飲遂得安全徐夫  
人可謂賢矣雪樓五十九歲生日在四月間爰賦長句三章  
誌垂衰相晤之可喜即以爲頌禱之詞

掩關寂莫度衰年無限離思到夢邊慰意笑談眞覺少惱人聞見  
苦爲緣轟傳健起扶藤出便作狂顛倒屣前喜得舉帷迓明月華  
須相照若多妍

戟門兵衛凜森嚴蛛網雀羅深自緘野性難移田舍叟亂頭不整  
布衣衫杜陵幕府深心敬仲蔚蓬蒿著手芟翦韭瀝巾期盡醉緣  
慳無分接杯銜

辭翰詩篇動一時風流儒雅鬢成絲爲人本是慈悲佛示病偶同



摩詰師法喜至誠親割臂金剛堅固慶齊眉大椿從此八千歲笑  
撚吟髭奉壽卮

次韻雪樓追寄留別長律

自笑吟詩未作家工夫尙要十年加便當寢廢餐忘頓無奈頭昏  
眼已花望裏斯人切師友寄來好句動咨嗟離情忽滿江邊柳愁  
絕風橫細雨斜

今年二月二十一日爲清明時節以人事牽呈至二十八日  
偕七姪孝前赴太乙山莊恭修墓祭北風甚厲寒噤幾不可  
耐路人往往以上冢延遲生議論聞之深愧悚也歸成諸篇  
以誌內疚且示後來

墓傍龍山箬笠峯清明載酒謁雙封因循世累逾時節道路人言



警惰慵今日神靈示薄譴當春郊野凜寒風菜花飄落桃花盡提挾江濤入嶺松

孤兒白盡髮兼須常恐龍鍾廢拜趨大地河山方慘澹經天日月正模糊松楸瞻顧生憂思碑碣摩挲有淚濡維我先人功德

厚綿綿應得藉神扶

遠羅層嶺兒孫繞近帶雙溪侍從良綠野村田春漠漠白雲煙樹

曉蒼蒼冲和德士襟懷廣穴山氣似之磅礴文篇日月光前形後勢如左右山

氣山容安體魄歲時蘋藻有餘香

長松短松氣蓋山石楠貓耳樹連環青楓翠柏森相向修竹新杉

蔚作班華表親題賢達字揚州陳六舟中丞巡撫安徽時手題墓前華表文曰循吏真儒此謂不朽溪雲

嶺月想其人享堂卜築水塘灣太湖王少谷庶常念祖三門次到山既長



白聯額曰桐城公元時守安慶祠堂題

後昆永永勤將護省此篇章莫等閒

賁巢絕句四首

前年病後結小樓移居名之曰賁巢

新鋪柿葉木香花春滿北窗長短枒萬片綠雲千點雪勾詩不出  
手頻叉

寒碧蕭蕭千百竿時閒細雨響沙灘東窗曉日穿林上潑墨風枝  
倚枕看

老梧出屋蔭南窗看作青山高壓江誰與衰翁破岑寂林間時有  
鳥雙雙

鑿穿西壁別開門小室如囊貯果飧清嘯有時疑老鶴巢高常被  
白雲吞

网舊聞齋絕句



滿地苔紋滿壁蘿一春寒雨未嫌多  
綠陰深處有潛叟猶唱堯時  
擊壤歌

有弟有弟住龍眠相望枯槁兩倉髯  
殷勤黃耳傳消息風雨離思  
老更添

有兒有兒南北京餬口分飛惜此情  
最羨小山籬落下農家父子  
課春耕

有女有女不在旁一隔江山一死亡  
未可傷心自妨老拋除淚點  
洒蒼茫

回首交遊秋樹林紛紛落葉滿荒岑  
出門曳杖多惆悵何處朱絃  
一曲琴

經卷文篇數百箱可憐付與蠹魚忙  
當年燈火丹黃下未向驪龍



探夜光

自笑殘年學賦詩  
槁梧那得有春姿  
篇成不見驚人句  
止見烏鴉翻墨池

日日鑪香一炷燒  
蓮池瞻拜不嫌遙  
止憑信願十分力  
會有金容佛見招

門外高城江水環  
江頭山與白鷗閒  
衰翁送老無奇計  
時看鷗羣點黛鬢

三月春深綠已齊  
庭梧分碧韻  
玻瓈狂來手把如霜髮  
醮墨臨窗句自題

代簡奉寄範之使君金陵惜賢者去吾皖不獨悵別之私誼也



橫風吹白雲飄然不可繫雲情良高矣悵望實勞倅榮祿區區耳  
甯關賢達意且復置交情憤慨在公義善人國之寶所在一方利  
諄諄載前簡邈邈懷古治忝職長國家於此應深計奈何采菅棘  
輕忽棄松桂炎熱失本衷顛倒取容媚坐使正氣亡鄙夫日狂肆  
國情盡如斯淚眼看大地親切眷吾鄉吁嗟尤酸鼻卓哉李使君  
擺落世蕪穢政事本德行文學富篇製醴泉出秦阿淵源由來異  
頗見前賢風晚近眼中最風雅有性情瀟洒成韻致篤於君子交  
殷勤扶貧滯平等運慈悲略無貴仕氣仁禮秉庭聞詩書養道器  
士林所歸依官箴清白吏無端解職去在今非怪事今正懷襄時  
分當蹄跡恣走也學殖疎衰病近益蔽謬荷高誼敦論交追前世  
瓦缶側璆琳蕭艾當蘭蕙華筵頻尊學窮巷勤鞭轡笑言歲月深



寂莫用私慰青眼照白頭匪德遭神忌一旦與乖分感媿雜憂畏  
戒行眞慷慨追送失攬袂留書那忍讀閉門起遐思金陵古名都  
君昔曾遊侍緬維尙書公舊恩猶未替父老尙能言遺賢存一二  
義甯散原翁星斗朗躔次老健伸私祝起居聲憑寄過從想頻仍  
論詩默領契秦淮清溪間莫愁半山寺風采聯畫橈奚囊逐驢隊  
篇成動推獎得意顏共霽更看繞郭青且喜遺塵累遙知極陶然  
回首皖山未皖山望雲人病榻縈夢寐願且小息勞時至還振勵  
霖我五十城我人眷舊惠走或拋藥裹追尋定鼓枻寫句據此懷  
雖惡不可制一笑鑒欵忱於詩寬責備君擬秦岱遊幾時車渡濟  
行李慎紓徐前途須警衛倘見張長公爲致相思字

癸亥秋病痢二十餘日後重前瀉甚苦楚也醫治至七月二



十一日之中夜病勢大減生意蒙動獨臥賁巢久不成寐東窗修篁風送清響忽感成口號

自支生計度餘年懶向庭階問蕙荃久悟風花聚萍水笑看蟾魄過雲天呻宵一榻蕭疏獨伴老千竿寒碧圓極望西方歸去好彼

間眷屬頗完全

佛門以同修爲眷屬極樂九品俱在故完全

槃君五弟以甲子仲春六十生日詩見示久病小閒展覽之餘感懷成和

衰病頹唐廢吟詠荒山黃草掩秋風飛鳥奔兔催人老封豕長蛇滿眼雄仍把詩書敦宿好力將憂患付虛空一樽今日壽吾弟後事無窮屬髯翁

時涵呈五十六歲生日詩賦句寫意



生日燒香堂上拜汝能存此舊家風滄桑換世嗟新態雲狗驚人  
亦偶雄和氣盈懷儒有道達天安命佛談空兼茲二者能延壽記  
取斯言出乃翁

公拓外甥以予久病來視作詩見投意極懇摯兼以西門外  
地藏庵三聖大像成立贊揚歡喜和句爲答

殘年待盡身多疾鎮日呻吟臥賁巢賢爾關懷聲屢至作詩投贈  
誼何高西方蓮座遍香火南土金容照寂寥長江數千里從此齋  
心同所願彌陀相見不嫌遙



清封中議大夫太常寺博士方賁初先生墓誌銘

同里潘田撰

先生諱守彝字倫叔號賁初又號清一老人姓方氏先世自婺源遷桐城縣北魯嶠山遂爲桐城人九傳有諱孟駿者讀書超邁有器識時同縣有宿儒曰方閒阿講學宗朱子而與其友胡莫齋以呂氏鄉約教於鄉孟駿命子從之游自是質行文儒相繼並起至儀衛柏堂益大柏堂與儀衛三從兄弟先生考也先生少遭亂轉徙窮山飢困至不能得食然未嘗一日廢學既習聞庭訓又游興國萬清軒貴筑黃子壽之門嘗爲辨祔祧議見賞於武昌張廉卿然先生以爲文章之事古今作者寥寥才幾人與其不能過絕流輩不如退而闡修各尊所聞之爲得顧好爲詩爲之至勤晚年寫



定曰網舊聞齋調刁集凡二十卷又工尺牘言語妙天下書法自然臻古所寫詩或與人書得者爭藏弄裝池亦時作書應人求請不拒也嘗一就有司試棄去又入貲爲太常寺博士然不樂仕其爲詩自世所尊唐宋以來杜甫白居易韓愈李商隱梅堯臣蘇軾黃庭堅陳師道諸家靡不涵茹錯綜香山宛陵尤所誦玩然絕去模襲揆藻驅瀾質厚內函巧力旣極乃以拙勝取徑造格高厲孤騫又非唐宋所能囿也辛亥己後足跡造東南山水佳處所至賦詩尤盛天性和易不爲崖岸蘄絕之行士尤樂親焉惟先生亦以友朋爲性命也旣嬰世變稱疾屏居猶與其徒唱和往後極酣嬉淋漓不厭內行孝友柏堂先生病偏痺製小輪輿平地推挽兄弟親執其役喪葬一遵古禮兄培濬早卒事嫂如母旣以子時涵爲



之後又刊其遺文附柏堂集以行卹孤甥友季弟曲盡其道於先  
世著述尤盡心始刊柏堂集字畫一準鄒書既又集諸家評選爲  
柏堂文集後錄並爲文數篇繫於後而畀同縣姚叔節序之家世  
儒術至先生頗涉佛典多方外游然卒之年獨反復易禮諸經及  
羅忠節西銘講義遺令戒子舉西銘爲訓至再三蓋猶其先世之  
風類也卒民國甲子年十一月六日春秋七十有八曾祖諱護祖  
諱松皆篤行不仕以柏堂先生貴贈如其官考諱宗誠卽柏堂先  
生由諸生薦官棗強知縣給五品卿銜曾祖妣甘氏祖妣金氏妣  
甘氏蘇氏皆封恭人先生蘇出也配王淑人前卒四子時涵清縣  
學生直隸州知州出後兄培濬時襲清縣學生江蘇常熟縣知縣  
時簡清翰林院庶吉士安徽實業廳廳長時翮清法科舉人國務



院法制局編纂女二壻清光緒丁酉舉人常熟宗嘉祿安徽含山縣知事義烏虞德元孫七人璉德煥德琦德瑄德珂德珽德瑄德皆襲出曾孫二人鐵生桐生孫女四人曾孫女三人以卒之明年三月十日葬於懷寧縣北車津澗保義公山前去柏堂先生墓五里而近先生志也所著詩集外有文集尺牘若干卷諸子俟畢大事刊行吾縣自明以來士大夫多好爲詩見於先木厓公龍眠風雅者幾於家戶相望至方劉姚諸先生出乃以古文名天下然海峰惜抱故皆工詩儀衛繼之說詩尤多微言精詣先生晚出承遺緒而益恢之桐城之詩殆將與文並重於世嗟呼風雅道喪至今日而極矣先生之歿豈惟一鄉邑之不幸抑亦文學興替之所繫也夫先生嘗出全集授田使評點似謂可與言詩又索田詩錄副



至再三竟不得匿其虛懷獎善多此類敬爲銘曰

古云少達窮乃工先生不仕亦不窮辭譎義貞吁可恫知言並世  
乙盦翁龍山之西石門東中有箬笠亭亭峰昔構丙舍環楸松車  
津溯源龍所宮寒泉一盞生清風遺令葬此吾親從後有過者詩  
人封

桐城方賁初先生墓表

陳澹然

甲子冬十一月六日賁初方先生卒於皖江邸第澹然既哭奠弔  
厥孤孤流涕請曰先君行誼知莫若公敢請以文章厥墓余喟然  
太息曰嗟乎自晚清末造黨禍紛乘民國革新帝制間作知名之  
士匪潛巖壑輒玷厥身惟先生名重當時身居都會不夷不惠理  
亂條然可謂明哲君子已其曷敢辭初咸豐之亂先生隨尊考京



卿公避地魯碭山讀書種菜凡數年京卿公赴山東幕挈長君哲甫以行先生侍母山居寇益熾急則擔弟妹輾轉龍舒崖壑間嘗苦雪嚴寒炊屢絕則躬擷野菜濟之其困絕如此哲甫負奇驚老宿先生質敦厚圭角渾然哲甫歿山東京卿公慟甚自汴而鄂而皖蘇而畿輔曾文正李文忠推許甚自幕入官家事一畀先生先生則日夜攻苦博極羣書毅然合義理攷證詞章鎔爲一貫而田廬鉅細綱紀飭然少時精舉業不售則絕意科名捐例宏開才者輒謀速化先生獨夷然不屑自葆厥天欲然以厲學砥行爲急京卿之學探原經史歸本程朱發爲文章不矜詞采先生則探索百家獨精許鄭深研騷選古藻斑斕文躡靈臯詩探韓杜賤儕魏晉字逼鄭碑醞釀旣深眞精磅礴屹然若鉅舟橫海波浪不驚老鶴



搏霄聲大而遠當時師友若張廉卿吳摯甫恆歎奇之先生獨拳  
拳歛抑廣納羣流故所業愈閎所存益遠京卿公著書名天下先  
生刻所著柏堂全書數百卷躬自校讐海內推爲精本京卿公謝  
官歸皖彭剛直巡閱長江至皖輒先修謁士大夫慕京卿重望爭  
謁其門先生鐘聲偉幹晉接其間儀觀雍容見者輒欽風采先生  
獨恥營宦達進退綽如肫肫以推士進賢爲務大府訪京卿諮大  
政先生必擇士夫賢者各揭其才行奉堂上達之賢而久困則擇  
其當者推挽之宏獎風流靡幽弗濯故一時俊彥謳頌弗渝京卿  
公嬰末疾數年言動盭如先生則聽覩無形必得歡乃已及當大  
事喪葬之禮哭泣之哀尤爲賢士大夫所稱道葬畢則取京卿公  
行誼撰事略以求身後之文廣播柏堂書於天下復以事京卿公



者事太夫人嚴其大事慨然以一身外親賓友內綜萬端不以室家勞子弟俾子若弟潛心問學繼軌先人故其弟磐君節行文章迥超流俗諸子亦發名成業克世厥家卒躋京卿公於清史中以垂不朽蓋其發揚先烈啟迪後賢實有非朋舊所能逮者晚清末造聲望益尊白髮朱顏不勞杖策大吏賢者若馮蒿菴撫部沈乙盦方伯時與唱酬先生獨請延名宿荆存古學堂不談國事改革後避居海上研精釋氏拜誦益虔歸臥皖江杜門謝客大府至輒婉謝之其皦然不滓如此往者東漢之袁郭有道獎拔賢才不羅黨錮明季方明善獨成子弟不入東林偉哉先生其殆躡兩公芳躅者歟先生諱守彝字倫叔號賁初居士國變後號清一老人桐城魯砥方氏先世自竹圃公開程朱之學儒風大啓名哲迭生至



儀衛柏堂兩先生撰述閎深族乃大著柏堂者京卿公避亂讀書地而因以名集者也先生質本中資苦心獨至友朋文藝非點圈三匝莫肯置詞故能力紹前修獨成鉅業文不苟作亦不示人晚遊吳越佳山水與東南豪俊交遊悲愉欣戚一託諸詩故其詩獨著所著網舊聞齋詩二十卷古文書札若干卷藏厥家生平恥作文人喜治煩劇百端紛擾未嘗一日廢書物理人情洞澈靡間見一善獎譽津津過則爲之覆匿所薦拔或相背負終默不言賢士往來慇懃獨摯以此數十年皖上名流靡不推爲宗主而教子尤難子幼則督以嚴師衣之粗布長則導之宦學用淬厥材善無顯褒過無顯斥深宵密室談笑語之其深摯如此嘗謂陶公竹頭木屑皆寓經綸沒後藏書百四十篋按册秩然故家室纖釐靡施不



附錄 五  
當又謂太邱道廣不殊藏否人或衆棄獨與盤桓往往得其死力  
故朋游酬接至老弗衰其事皆足爲世法甲子夏獨書遺訓萬言  
題曰賁初傳語舉凡塋墓田廬圖書字畫極之死喪殮葬靡瑣弗  
詳而獨書張子西銘冠其顛闡發存順沒寧知命樂天之旨留示  
子孫不數月而竟沒蓋其立身行己隱法橫渠不爲理障晚耽禪  
悅神照淵湛歸期已洞燭也沒當民國十有三年春秋七旬有八  
官太常博士以子官封中議大夫配王淑人子四時涵直隸州知  
州爲哲甫後時襲江蘇南匯常熟知縣時簡清翰林院庶吉士安  
徽實業廳長時翮舉人國務院法制局編纂孫七人曾孫二乙丑  
春二月葬於懷寧集賢關北鵝公山之原澹少孤寒從京卿公問  
學先生拯其危難迪其狂愚食飲提攜感深骨肉嘗謂先生氣體



魁碩意量淵涵使生乾嘉當在文達文端之列而惜乎其獨晚也  
昊天不弔隕此碩人追溯遺型悲愴曷極爰綜大節著之碑以告  
來者庶焉有考

賁初先生傳

黔縣胡元吉撰

賁初先生者桐城方君守彝倫叔也父宗誠世稱柏堂先生以諸  
生薦授棗強縣知縣合肥李文忠督直隸稱爲循良第一督學使  
貴恒上其學行於朝給五品卿銜子長培濬次先生又次守敦槃  
君方氏自九世祖竹圃以下代有聞人號清門然世貧至柏堂貧  
甚咸豐初粵擾亂避地魯嶺山中里中子弟多從受業先生亦侍  
學暇則佐其母躬樵汲之役已而柏堂授經齊魯音問梗阻先生  
奉母携弟妹避寇轉徙窮山絕壑間時或採野蕨供餐如是者逮



十年至同治己巳柏堂以曾文正公辟薦至直隸留先生於皖治家事始得安居先生讀書一本家學後從萬清軒黃子壽諸先生游喜網羅舊聞搜尋古義至立身行詣終守洛閩之說與同里姚閑伯仲實叔節投詩唱和斐然有追踪龍眠先輩風雅之志父執姚慕庭及吳摯甫徐椒岑諸友甚稱之性孝友柏堂致仕後得風痺疾先生左右侍養飲食寢處務求中意製小輪車躬挽於前使子姓推於後日游庭室中如是者五年幾不知沉疴在體也兩親歿喪葬如禮歲時祭祀極其誠敬伯兄早逝事寡嫂如母既以長子時涵爲之嗣又刊其遺箸於柏堂集後弟槃君賢而能文相爲師友晚年回居桐城相望百里郵筒唱和不絕於道來必置酒流連有時並立江干白髮飄然見者咸羨謂東坡子由風雨聯牀之



契未必或過之也善交游篤於故舊居皖久海內賢士大夫過皖者必詣其門光緒丙申丁酉閒吉林于公蔭霖與襄平趙公爾巽同時官皖提倡正學宏獎風流元吉被聘與阮子仲勉爲敬敷書院學長因得識先生與槃君時馬子通伯授經藩幕姚子仲實客淮陽道署纂修鹽志叔節主揚州梅花書院每來江上皆主先生所講學論文極一時之盛元吉年最少先生屈齒爲友獎掖惟恐不及尤時於座上獲瞻當世通人長德以自淑改革後諸友或死或老或窮困旅食江湖惟先生巋然皖上先生於詩最富晚年輯爲二十卷元吉爲之序集中朋友唱和玩遊山水之作爲多蓋先生平生於時俗榮辱得喪絕不介懷惟山水朋友爲性命早歲省親棗強取道山東游大明湖登秦岱七十後筋力猶健每就家人



親戚踪跡所寄之地探尋名勝至金陵游崖山十二洞至常熟登  
虞山劍門絕頂至上虞登東山游鳳鳴山洞及金壘山訪魏伯陽  
隱處經會稽探禹穴訪蘭亭縱懷孤往盡寓於詩其天趣橫生迥  
出意表淵雅宏大如其爲人或謂先生曷爲號賁初乎曰此先生  
之志也同治中興廣開賢路士爭進取先生高門世胄年方少壯  
獨恥就有司試亦不應徵辟旣老諸子踵起家門鼎盛鄉里爭艷  
稱之先生泊然無與日手一編如老諸生配王淑人卒室無姬侍  
齋居凝靜經案繩牀翛然塵埽之表與周易舍車而徒之義不其  
合乎市朝鼎革驚時者自不難裂冠毀冕以趨利祿而高不仕之  
節者又往往岸然自異矯激招尤先生履道坦坦不激不隨易簣  
之際幅巾深衣蓄髮猶守古制白賁無飾方協无咎其先生之謂



乎卽以賁初爲先生私諡可也其卒也以甲子十一月六日享年七十有八子時褻時簡時翮俱仕越明年乙丑三月諸子奉柩葬於懷甯峩公山下仲實爲文表於墓道元吉更次其交游聞見而爲之傳

方君倫叔墓表

同里姚永樸撰

君諱守彝字倫叔姓方氏先世居桐城魯嶺山曾祖諱護祖諱松考諱宗誠由諸生以人才薦授直隸棗強縣知縣加五品卿銜世稱柏堂先生有四子君其次也爲人沈厚澹於榮利論學宗洛閩兼及考據詞章終身手一編鏤而勿舍當咸豐同治中吾鄉耆宿永樸及見者柏堂先生最爲先輩吳摯甫蕭敬孚徐椒岑諸先生繼之其後乃有阮仲勉馬通伯陳靜潭吾兄弟肩隨其間然此數



人者皆柏堂弟子或又執贄於摯甫獨君名聲早出儕輩上始友摯甫敬孚椒岑後更與數人者交四五十年來仰跂俯引賓禮恐後以居皖久鄉之英俊過必詣其門甚至淹留旬月乃去往往因之獲瞻海內賢士大夫蓋極一時之盛矣今國事孔殷嚮之老成人殂落殆盡吾兄既早亡弟叔節去歲又殞餘多窮老轉徙江海之交而君之訃復至嗚呼永樸其能無唏耶君事親孝柏堂先生得痺疾於皖君晨夕在視飲食寢處必求中意嘗製小輪車躬挽於前使子姓推於後日游庭室中如是者五年先生竟忘所苦兩親既歿喪葬如禮悼伯兄逝既刊柏堂集并附遺文事嫂如母與季弟相友愛老而彌篤爲文醇雅與人簡牘咸斐然可誦而尤工詩有調刁集二十卷憶光緒末永樸過君讀之歎其詩神似山谷



君曰子知吾爲此之由乎吾初不能詩一日持謁尊丈顧大驚喜  
促使多作曰君詩奇他日當讓子出一頭地吾乃勤爲之今先考  
沒二十餘年君之詩果宏富若此然吾尤服君晚歲究心釋氏書  
而理家仍遵儒術其將終也處分井然不紊殆真有得於中者君  
享年七十有八官太常寺博士娶王氏封恭人先君卒子四時涵  
直隸州知州出爲伯兄後時娶江蘇常熟縣知縣時簡翰林院庶  
吉士安徽實業廳長時翮國務院法制局編纂孫七人曾孫二人  
乙丑歲三月十日葬於懷寧峩公山下銘幽之文既有所屬矣永  
樸乃撫其學術行誼之大略俾揭於阡庶昭茲來許焉



网舊聞齋調刁集下册刊誤表

二十	八	六	二	十八	十六	十五	十一	十	六	五	十二	廿一	十九	十八	十七	十四	十一	九	八	六	五	四	二	十一	卷數	
八	六	二	九	六	二	廿二	廿二	廿二	七	六	四	十二	十	三	廿一	十	三	廿一	廿一	廿一	廿一	廿一	廿一	廿一	八	頁數
週	週	週	週	週	週	週	週	週	週	週	週	週	週	週	週	週	週	週	週	週	週	週	週	週	更正	
週	週	週	週	週	週	週	週	週	週	週	週	週	週	週	週	週	週	週	週	週	週	週	週	週	錯誤	
十五	二	九	十五	十六	十四	一	十六	四	六	十九	十七	十九	十二	十二	七	四	十六	十五	十一	九	八	八	六	十四	卷數	
二	一	廿一	二十	廿一	十四	一	十六	四	六	十九	十七	十九	十二	十二	七	四	十六	十五	十一	九	八	八	六	十四	頁數	
九	十五	十六	十四	一	十六	四	六	十九	十七	十九	十二	十二	七	四	十六	十五	十一	九	八	八	八	六	十四	行數		
嚶	嚶	嚶	嚶	嚶	嚶	嚶	嚶	嚶	嚶	嚶	嚶	嚶	嚶	嚶	嚶	嚶	嚶	嚶	嚶	嚶	嚶	嚶	嚶	嚶	更正	
皇	皇	皇	皇	皇	皇	皇	皇	皇	皇	皇	皇	皇	皇	皇	皇	皇	皇	皇	皇	皇	皇	皇	皇	皇	錯誤	
附	二十	十九	十八	十七	十六	十五	十四	十三	十二	十一	十	九	八	七	六	五	四	三	二	一	廿一	二十	十九	十八	卷數	
六	五	三	一	七	五	三	二	十八	十七	十六	十五	十四	十三	十二	十一	十	九	八	七	六	五	四	三	二	頁數	
九	十一	六	二十	一	三	十九	六	四	十三	十八	十二	九	九	十二	七	一	廿二	十六	四	十六	十七	十一	九	十一	行數	
匪	咸	撰	復	萌	蒼	徹	查	實	贊	耀	綠	勝	兮	弋	賽	閒	躊	萎	忘	模	光緒	士	段	萎	更正	
說	歲	說	後	蒙	倉	說	曷	闌	盤	驪	綠	盛	弓	戈	塞	閒	惆	亡	模	宜統	仕	段	蕘	穎	錯誤	







溫州府 函 文 館